


0 10 20 30 40 50 60 70 80 90 100 110 120 130 140 150 160 170

centimetres  
1  
2  
3  
4  
5  
6  
7  
8  
9  
10  
11  
12  
13  
14  
15  
16  
17  
18  
19  
20  
21  
22  
23  
24  
25  
26  
27  
28  
29  
30  
31  
32


Kodak Color Control Patches



246/17  
252/13  
11







凡堪輿三家四部十卷一部無卷數

彭祖養性經一卷

隋書經籍志

唐劉貺真人肘

按唐書經籍志

卷唐書藝文志

徐州朱自華醫書簡要四卷

舊唐書志宿遷吳隱

按唐書藝文志

成宿遷志

國朝銅山崔嶽痘疹詳辨陳式瀚醫中易知錄十卷

凡醫六家六部十八卷二部無卷數

漢陸賈賦三篇朱建賦二篇宗正劉辟疆賦八篇陽城侯劉德

賦九篇劉向賦三十三篇

漢書藝文志

諫議大夫劉向集六卷

隋書經籍志

志按唐志宋志馬攷俱作五卷

太中大夫劉歆集五卷

隋書經籍志按唐志同

晉鎮北將

軍劉隗集二卷

隋書經籍志按唐志作三卷

太尉諮議劉簡之集十卷柴桑

令劉遺民集五卷錄一卷太常卿劉宏集一卷錄一卷

唐志作三卷

光祿大夫劉毅集二卷錄一卷

隋書經籍志按唐志同

劉恢集二卷錄一



卷隋書經籍志宋司空劉緬集二十卷錄一卷隋書經籍志齊太常卿劉

峻集二十卷錄一卷隋書經籍志梁吏部郎劉瑱集十卷從事中郎

劉繪集十卷太子洗馬劉苞集十卷廷尉卿劉孝綽集十四卷

按唐志作十二卷鎮西錄事參軍到洽集十一卷都官尚書劉

孝儀集二十卷唐志太子庶子劉孝威集十卷按唐志前集十卷後集十卷宋

志一太子洗馬徐悱妻劉令嫺集三卷唐志作六卷以上劉孺

文集二十卷梁書彭城劉峻平西參軍集六卷江南北齊儀同

劉逖集二十六卷隋書經籍志按北史劉芳傳作劉唐劉子元

集三十卷劉迥集五卷劉伯芻集三十卷劉軻文一卷唐書藝

王駕詩集六卷唐書藝文志按江南通志作王守素集六卷注

侯劉商詩集十卷宋史藝文志劉彙集三卷唐書藝文志五代李良

弼鍾凌集豐縣志宋顏復集十三卷宋史藝文志顏太初臯繹處士集

十卷宋史本傳翁公輔下邳小集九卷宋史藝文志陳師道後山集二十

卷後山詩集六卷外集五卷後山詞一卷馬氏經籍攷案四庫

十四又語業一卷宋史藝文志晁迥翰林集三十卷宋史本傳李淑別集

百餘卷宋史本傳豐縣姚錫孝雞肋集舊志案東都事畧晁補之有

侯宋汝為忠嘉集豐縣志元曹伯啟曹文貞詩集十卷四庫全書

志作漫泉詩文十卷續稿傅汝礪詩集八卷詩法源流一卷北

偶袁渙友山集豐縣志明徐州馬蕙蘭齋集江南通志李向陽孝

乾文集舊志萬壽祺隰西集又內景集舊志重輯隰西草堂集五卷

附遜渚唱和集一卷沛縣張貞觀掖垣諫草五卷凡兵垣二卷

國朝孫運錦重編又野心堂集沛縣志蔡桂五宜亭詩草沛縣志張楊吹

垣二卷四庫全書總目經籍攷



騷集又彙騷集沛縣志閻爾梅文集抄本豐縣史可傳清白堂遺稿

五卷豐縣志張盛治粉榆社正續集豐縣志渠澄清三餘漫草豐縣志

崔連雲天問閣稿豐縣志董漢儒去菴草豐縣志蔡河鑿東集豐縣志

蕭縣高遜志嗇菴遺稿明詩綜孟知性素言集蕭縣志任汶赤石居

稿蕭縣志歐陽憲文東山社遺稿蕭縣志寇文英雙壽堂集又野樓

集蕭縣志縱慎蒙苜蓿詩草蕭縣志許作楫春問亭集蕭縣志邳州索

承學桐岡集明詩綜陳鐸雪秀亭稿又秋碧軒稿又秋碧樂府舊志

宿遷何九州春亭詩集又白雪堂集宿遷志陸奮飛雲液草宿遷志

碭山劉士嘉濡泗詩草碭山志國朝徐州楊妍藜村詩集舊志李蟠根菴詩文集銅山志張鐸晏如

草堂詩集銅山志張翹同聲集銅山志宋邁拜石堂詩稿銅山志李綺

古今體詩集四卷銅山志張彥琮韜峯吟稿銅山志張彥珍致爽齋

集銅山志孫文蔚北坡草堂詩草銅山志蔣士桓西麓古文詩三卷

銅山志張彥琦逸園詩文集銅山志經迺濟李杜聯吟又集陶詩銅山志

徐以柏桐陰閣詩古文集六卷楊廷蘭惜陰書屋詩草一卷

程苞九復齋遺稿王兆麟湘川詩草朱玉森退思山房詩集杜

士津浣溪詩草王秀章漪園詩存程譽慶蛾術山房古今體詩

傅天璽冬餘齋詩草孫運錦垞南詩集與我周旋齋文集拾世

盤柳村詩集以上銅山志蕭縣任增寓圃詩草蕭縣志任觀瀛夢鼎堂

集四卷見山堂詩集一卷又若耶溪詩集蕭縣志縱翼滋圃詩草

蕭縣志徐靄鶴山集蕭縣志任懋華樹聲軒集蕭縣志任果中子賦草

蕭縣志王士毅士元覆瓿集蕭縣志張名宿晒堂詩草蕭縣志縱司灼

經籍攷

司台徐州府志卷第十九

三



竹溪詩草蕭縣志張符升蘇門山人集蕭縣志劉廣基南岡集劉廷

偉閒情雜詠徐志汶泗濱釣客草張仁渠敬思軒詩集劉廣居

偷餘詩草礪山周應溪綠雲軒集豐縣劉湘觀海樓集又看花

集又蒼檜館詩豐縣志季之翰白駒山樵集豐縣志孫三元沈詠堂

詩鈔豐縣志劉培豐醉雨山莊詩沛縣閻圻泗山文集又閱耕樓

詩集憩養堂詩集舊志郝繼隆式穀集沛縣志閻文源愚泉古文集

閻焯貞刪餘詩草閻焯貞榕莊詩草閻渠宣亭詩草王定勳雲

笠山人集八卷古樂府二卷葉湘管漱芳齋詩文集葉崇崑願

學齋集楊淇含光樓詩稿王者都澹松集又山水音又崑崙詩

草沛縣志周士珠南村漫詠沛縣志朱重光汲村山人集沛縣志朱錫

藩寶硯堂詩稿朱敬修看劍齋詩草朱訓典謙谷詩草宿遷徐

用錫圭美堂集二十六卷四庫全書總目吳隱中和齋集又寄幻吟宿遷志

吳之珩含穎稿宿遷志臧錫輅半村集宿遷志高飛浮峯集蔡良

材半村集臧魯高環山堂集錢琛願學齋吟稿二卷張偉庚白

雲軒存稿一卷陳玉鄰秦晉詩存二卷琴海集陸從星小雲液

草陳錦鸞情影軒存稿二卷卓洽靈石軒存稿二卷卓筆峯借

園詩存二卷錢侍宸棣華軒存稿二卷葉紹聞愈愚齋集又知

足知不足齋集王芝齡香草山人集睢甯邱園卜頤菴全集舊志

邱端迂樵詩文集邱汝玉鴻軒詩草邱堂玉香圃詩草邱澤編

訥齋詩草王錫田蘅浦稿

凡詩文集百五十一家百八十六部六百五十六卷百十二部

無卷數

經籍攷



梁釋僧祐佛像雜銘十三卷諸寺碑文四十六卷又雜祭文六

卷又眾僧行狀四十卷隋書經籍志唐文館詞林一千卷唐劉伯莊等撰唐書

藝文志劉餗樂府古題解一卷唐書藝文志孫邈文格三卷宋李淑著豐縣志

李淑詩苑類格豐縣志明李向陽唐宋八家文錄舊志

國朝蔣士桓選唐宋八家二十二卷銅山志孫文瑞選同聲詩鈔

八卷所錄皆郡人銅山則有王兆麟徐恬徐文標孫人麟孫人

鳳朱玉森孫文林楊夢蘭程譽慶韓奕許福田耿佐沙明

沙謂師道隆周大謨佟發之拾世盤杜士津鄭蘊中孫忠懋葛

賢舉孫文瑞丁昌峻陳策言韓德增馬家駒戴洪瑞徐百盈凡

二十九人蕭縣則有劉綦陵劉廣基劉廣居劉廷偉王庚王懷

智吳煜董作礪吳鳳翔胡近垣徐鈞郝筠楊照范大聰王檄徐

開軒徐開先劉簡王蔭采劉魯士徐志汶陶鳳臨鄭有恒劉佩

藻凡二十四人礪山則有注元琛賈永華凡二人豐縣則有孫

翔鳳李大蘊李著烈孫璧師正勳李有蕃李思勳張履明劉介

眉劉培豐李有价凡十一人沛縣則有魏志梁張允杰葉浙蘭

劉承堯閣憑朱錫蕃葉崇桂葉崇崙吳雲舒凡十一人宿遷沛

則有陳玉麟陳錦鸞王芝齡凡三人睢甯則有王錫田一人沛

縣朱其闔唐詩彙鈔

凡總集九家十二部干一百三十九卷三部無卷數

宋陳師道後山詩話一卷宋史藝文志明李向陽離騷注舊志

國朝蕭縣劉青藜閱躬軒詩話礪山周應溪詩話

凡詩文評注四家四部一卷三部無卷數



優廩生武其文校

同治徐州府志卷第二十

碑碣攷

夫邑耆邁往之行郡政循革之緒或不詳于史閒逸于紀載厥有貞珉表績穹谷泐名稽古之士用以裨補闕漏該貫見聞而乃翳黜塵沒榛莽年世失序歲月不詮言念前修愍焉興喟爰輯鄴注歐錄趙洪諸家哀舉之日凡見于邳徐者益以蒐采所及纂次先後都爲一帙若夫鐘彝尊爵璜琥珪璋之屬遑離往古散遺遐陬鼎系旣沈泗淵闕絕攷索勿逮是則非方志之過也

漢高祖廟碑

右高祖廟碑見水經注泡水又東經沛縣城內有漢高祖廟

碑碣攷



廟前有三碑後漢立廟基以青石爲之階陛尙存云則此廟爲後漢時立也攷後漢書蓋延傳延與劉永戰於沛西大破之永棄城走湖陸延遂定沛楚臨淮修高祖廟延所修者當在沛城內之廟故酈注謂後漢時立廟章懷注言廟在泗水亭中疑唐時城內之廟久廢卽階石亦不可見惟泗水亭廟尙存故章懷誤爲一耳

漢泗水亭高祖廟碑

右泗水亭碑見水經注泗水南經小沛縣東縣治故縣南坨上東岸有泗水亭漢祖爲泗水亭長卽此亭也故亭今有高祖廟廟前有碑延熹十年立案班孟堅有泗水亭碑銘續漢郡國志注泗水亭有高祖碑班固爲文是也是泗水亭之高祖廟當立於後漢之初酈注云延熹十年或至桓帝時重修之耶或碑本有二孟堅爲文者爲立於亭之碑延熹十年者爲故亭廟內之碑耶侯攷

漢司徒袁安碑

右司徒袁安碑水經注徐州治城內有袁安等數碑列植街右咸曾爲楚相也天下碑錄云在子城南門外百步今碑文俱佚案後漢書袁安傳稱安爲楚郡太守時當楚王英得罪國除爲郡故稱太守水經注與徐庶等連文故統言楚相非誤也

漢巖訢碑

右巖訢碑案隸續云碑無額政和中出于下邳文與費鳳兩

碑碣攷



碑略相似銘詩亦五言列種諸奇樹一句又同豈此碑亦卜君所作乎訢以威宗和平元年卒其云歲治東宮星屬角房月建朱鳥中呂之均者謂庚寅四月也此碑東牟侯相之下長之上闕四字趙作下邳祝漢無祝縣蓋亦闕一其字下邳本屬東海東海則有祝其疑此邑嘗割隸耳攷和平元年桓帝卽位之四年也其時下邳立國已久史無祝其割隸之文漢以祝名縣者有祝其祝阿惟祝其故城在今贛榆縣西南去下邳最近洪氏疑闕其字理或然也碑在下邳故邳州志謂訢卽下邳人今碑文錄人物嚴訢傳下洪氏僅見拓本碑在宋時已不經見今久埋沒矣

漢高祖感應碑

右高祖感應碑案豐縣東北有龍霧橋明一統志云卽漢高祖之母遇神處詳古蹟攷天下碑錄云高祖感應碑在豐縣北延熹十年豐令劉疊立今碑堙文佚蓋去龍霧橋不遠文則頌高祖感生之祥也攷後漢書桓帝紀延熹僅九年逾年爲永康元年六月改元是此碑立在五月未改元以前故猶稱延熹十年耳水經注謂泗水亭碑立于延熹十年亦與此同

漢度尙碑

右度尙碑碑今不存文見隸釋與後漢書本傳大略符合惟碑不言爲文安令洪氏以爲闕文又碑言封右鄉侯遷遼東太守傳作遷桂陽太守而云尙爲遼東太守在復爲荊州刺史之後遂卒於遼東趙氏以爲史誤洪氏以爲碑闕按碑于

碑碣攷



遷遼東太守下卽云歲貉甯輯會楊賊畔於云云則守遼東正在朱蓋胡蘭未叛以前且傳云以尙爲中即將將幽冀黎陽烏桓步騎二萬六千人此皆北方兵尙時守遼東就近調撥之耳漢時部民爲官長立碑例皆書其卒官此碑之額明云漢故荊州刺史度侯之碑見隸釋其不卒於遼東太守可知趙氏說是也水經注言碑在湖陸隸釋云在湖陵荒野政和王辰巡檢王當世始遷于官廨也今滕君欲徙碑於沛舟三載三覆沒於水後劉宗儀攝事乃能立之使星亭明嘉靖閒楊升庵尙見碑額今已不知其處矣又案尙以桓帝延熹九年卒碑載永康元年則葬後立碑在逾年五月以後故改稱元號也

漢太尉陳球碑有碑陰陳球後碑

右陳球碑在墓前本有三碑後魏時猶存水經注泗水篇泗水東南過下邳縣故城又東南至下相縣故城城之西北有太尉陳球墓墓前三碑是弟子管甯華歆等所造是也至宋時僅存其二金石錄曰球有兩碑皆在下邳其一已殘隸釋云兩碑皆在淮陽宋淮陽軍治下邳縣是也今三碑俱佚隸釋載碑文二篇今錄古蹟陳球墓下碑陰多缺可見者凡四十餘人隸釋又曰水經注云是管甯等所造此碑所見皆故吏故民而無管華姓名豈與劉寬碑相類其一則弟子所立乎又姓苑載吳氏引漢太尉陳球碑陰有城陽吳橫此碑亦不見之若非石損則恐是彼一碑也洪氏又疑水經注所稱三碑似



指碑陰爲一恐非是又案隸續碑篆額二行行四字題漢故太尉陳公之碑文在穿下凡十九行後有裂者石又下斷所存者行二十四字碑陰前兩行書二人之事餘存二十行行二人復有一碑卽指後碑也篆額二行文二十行行三十七字其下亦有斷者又案球以靈帝光和二年下獄死碑文雖殘缺尙存光和二字蓋紀臨歿事蹟立碑當在其時隸釋碑目注光和二年是也

漢張侯殘碑

右張侯殘碑趙氏金石錄云張侯者子房也碑已斷裂磨滅不可次敘獨其額尙完題漢故張侯之碑在今古畱城子房廟中驗其字畫蓋東漢時所立又言寰宇記引城冢記云良

封陳畱而此碑漢人所立乃在彭城然則子房所封非陳畱明矣城冢記誕妄蓋不足信也今案古畱城已陷沒碑額并佚

漢處士嚴發碑

右嚴發碑見隸續云碑所存十有二行行凡十字大略載桓譚陳章所言處士嚴發有曾閔之行引春秋褒儀甫之事後有聽表門閭復之文蓋道官稱發之行遂表其門閭復其租徭爲碑之所由立也未有丞汝南番君及戶曹掾題當是其時官僚其首行日月之下有彭城字乃其鄉國也云云按西漢會要郡掾下無戶曹惟縣掾下有戶曹掾史注云尹賞爲長安令都曹戶掾史據此知譚實縣令陳章等皆縣佐無



疑發爲彭城人則諱章等皆彭城官吏可知碑版既亡文又殘缺依理尋究錄存于此諱卽古響字見隸續

### 漢劉熙碑

右漢劉熙碑天下碑錄云在徐州蕭縣二十五里今碑文俱佚爲墓碣爲廟碑皆不可攷案隋書經籍志釋名二卷漢劉熙著又注孟子七卷唐書藝文志劉熙又著列女傳八卷文獻通攷經籍門下云劉熙字成國北海人公車徵士碑泐劉熙疑卽此人攷之他史漢裔劉熙又有三一見後漢書獻帝本紀建安十六年封子熙爲濟陰王一見唐書宰相世系表臨淮劉氏出自漢光武皇帝子廣陵思王荆又五世孫熙魏尙書郎一見晉書載記漢劉元海族子曜曜子熙案濟陰王

熙身爲帝子封國曹單無預于蕭尙書郎熙爲魏時人不當稱漢劉曜則自稱趙帝熙爲太子亦不當立碑蕭邑稽其時代成國爲近

### 古司馬城鐵碑

右古鐵碑天下碑錄云在金鄉縣東南四十里云漢浮陽侯司馬耀所封邑豐縣志司馬城縣西北三十五里有鐵碑紀司馬勛績今爲司馬集蓋其地在宋屬金鄉今割入豐境也司馬耀前史不詳其人浮陽爲渤海郡屬縣不當食邑於此恐非漢物碑錄爲宋時書流傳甚古今姑存之

### 古落馬碑

右古落馬碑姜州志云在豐縣中陽里俗傳漢祖幼時暗指碑碣攷



始皇落馬卽其地後人立碑今剝落不可識豐縣志云子案  
寰宇記高祖幼時聞父老言秦皇之暴指一塹曰會見秦皇

落馬於此及爲天子卽其地立碑今淤

宋張方平題落馬碑詩縱酒疎狂懶治生

中陽有土不歸耕偶因亂世  
成功業更向翁前共仲爭

### 古泗水石梁畫像

右畫像二石碣準漢慮虎尺其一長八尺四寸寬三尺四寸  
六分厚四寸右有斷痕左端缺角凡畫三方中列古彝器左  
車馬右缺落不完人或坐或立衣冠勾勒奇古邊首左側皆  
有紋缺其右其一碣已斷爲三裂縫適合邊首有紋長丈九  
寸寬三尺三寸二分厚六寸亦三方中刻人物鹵簿車馬樓  
屋楹柱明了可辨左方三圖二圖兩人執刀對舞一圖一人

若迎拜狀一人鞠躬應之右方中缺徑尺許駁蝕最甚中有  
題識字類八分漫漶不可釋其車馬軒蓋衣冠旌節悉合古  
制與漢武梁祠畫像略同嘗攷金石書畫像石刻凡三十餘  
種皆漢時物自魏晉而後造像盛行畫像遂廢故知此碣爲  
漢代故物無疑舊存沛之夏鎮康阜樓下製作樸古人莫能  
識或疑爲古壙槨牆然準今尺寬僅二尺餘淺不容棺決非  
古槨可知又碑陽上方泐石稍薄兩端鑿溝寬三寸許深約  
三分尋攷規制實古石欄也案水經注泗水篇泗水南經小  
沛縣東縣治故縣南坨上東岸有泗水亭漢高祖爲泗水亭  
長卽此亭也水中有故石梁處遺石尙存今康阜樓去故沛  
邑泗水亭甚近酈氏所謂故梁遺石殆卽此歟徐海兵備道



吳世熊徙度郡城今存監司署中

漢龔勝墓碣

右龔勝墓碣見舊志銅山古蹟今不知所在

漢絳侯墓碑

右絳侯墓碑在豐縣縣志云明初碑石猶存今堙

魏鄭陂頌

右鄭陂頌石刻久堙案水經睢水篇注昔鄭渾爲沛郡太守於蕭相二縣興陂堰民賴其利刻石頌之號曰鄭陂其事亦見三國志鄭渾傳渾當魏文帝卽位爲駙馬都尉遷陽平沛郡太守是此碑立於黃初時又三國志傳稱渾於蕭相二縣界興陂邊開稻田攷今蕭縣南以相山爲界山南麓卽古相

城是魏之蕭相界今則全爲蕭縣地所謂鄭陂蓋卽浮綏梧桐諸陂之類也

魏中郎徐庶碑

右徐庶碑水經注獲水下云徐州治城內有魏中郎徐庶等數碑列植街右咸曾爲楚相也三國志諸葛亮傳注引魏略云庶先名福荊州內附與同郡石韜俱來北黃初中仕至右中郎將御史中丞太和中諸葛亮出隴右聞元直仕財如此歎曰魏殊多士耶何彼不見用乎庶後數年病卒有碑在彭城云云攷魏志彭城王據傳據以黃初三年徙封彭城一歲四遷國相理事日淺疑無治績可紀及太和六年據再徙彭城又在元直遷官中郎之後尋攷歲月當非據相案後漢書

碑碣攷



彭城孝王和在位六十四年薨於建安十九年元直以建安十二年北返孝王之五十七年也彭城當凋敝之後和高國無事薨後孫祇嗣立七年而魏受禪庶爲國相其在是時歟故魏略不載庶爲彭城相略其爲漢官也碑稱中郎則知立碑在魏黃初太和時故列鄭陂頌之後

### 魏鎮東將軍胡質碑

右胡質碑今佚水經注云泗水東過下邳縣下邳郡城有三重其大城中有四碑一爲鎮東將軍胡質碑三國志胡質傳質由荊州刺史遷征東將軍假節都督青徐諸軍事廣農積穀有兼軍之儲置東征臺且耕且守嘉平二年薨疑質卒於下邳故下邳人爲之立碑耶史言征東將軍而碑作鎮東當以碑爲據又榮酈注連列四碑不分時代攷質歿於魏子威刺徐州又在魏咸熙中則是碑當爲魏碑非晉碑也

### 魏樂安長劉世碑

右劉世碑久湮沒天下碑錄云在彭城縣北隸釋云天下碑錄所稱魏代亦有元魏者非得碑不能區別也今攷漢書地理志樂安縣屬千乘郡續漢郡國志屬樂安國方輿紀要云樂安漢縣晉省北齊改博昌爲樂安魏收地形志青州樂安郡無樂安縣惟霍州僑郡縣下樂安郡領樂安縣其地在今六安州霍山縣案魏書孝靜帝紀武定七年得梁江北諸州郡逾年魏亡是元魏之有樂安縣僅止一年曹魏之有樂安土著數十年則此碑當爲曹魏時立也

### 碑碣攷



晉司馬石苞碑

水經注下邳大城中有四碑一爲司馬石苞碑晉書石苞傳云苞由瑯邪太守遷徐州刺史文帝之敗東關也苞獨全軍而還遷監青州軍東關之敗在高貴鄉公甘露元年計苞爲徐州不過一年耳晉武受禪始遷大司馬碑立於苞卒之後故云司馬石苞知此當爲晉碑也碑文俱佚

晉司徒王渾碑

右王渾碑見水經注云在下邳大城內碑文今佚晉書王渾傳武帝受禪加揚烈將軍遷徐州刺史時年荒歲饑渾開倉振贍百姓賴之爲之立碑其以此歟傳又言太熙初遷司徒惠帝卽位加侍中後又錄尙書事而碑祇稱司徒或碑立於

太熙初歟

晉監軍石崇碑

右石崇碑見水經注下邳大城中有四碑一爲監軍石崇碑晉書石崇傳崇由南中郎將荊州刺史徵爲大司農去官又拜太僕出爲征虜將軍假節監徐州諸軍事鎮下邳攷惠帝紀惠帝卽位改元永熙秋八月遣南中郎將石崇等屯兵四出次年爲永平元年夏四月以太子少傅阮垣爲平東將軍監青徐二州諸軍事以此證之崇監徐州軍似當在阮垣之後傳言其與徐州刺史高誕爭酒相侮或引爲晉初徐州治下邳之證辨見職官表序或當時誕偶以事至下邳耶晉書嵇紹傳爲徐州刺史時崇爲都督崇雖驕暴紹將之以道崇甚親敬

碑碣攷



之宿遷縣志縣東有倉基湖相傳爲崇置倉建閘之所蓋崇  
在下邳親任得人政紀不廢邳民鑽石頌德良有由也碑文  
今佚

### 後魏太武帝磨崖

右魏太武帝磨崖阿彌陀佛四字宋賀鑄和張謀父遊石佛山  
詩序云案南北史彭城圖經魏太平真君十一年太武南侵  
至瓜步築宮駐蹕聲欲渡江宋人患之遣使請婚饋百牢以  
犒師明年春旋師渡淮復畱連徐方再旬始北去今彭城南  
五里因山鑿佛高十許丈東北百步有大磐石欹枕小溪劃  
然四字曰阿彌陀佛皆徑尺餘蓋當時太武以鐵筆畫是字  
非刊刻也乙丑初張謀父賦詩要余屬和焉其詩曰中區昔  
也否代邦天所

開鴻圖屬太武不世英雄才南洗洛陽血西盪長安灰瓊車  
十萬乘略地驅風雷一葦濟長淮築宮瓜步隈東隣拜牢餽  
走使爲婚媒雲旗卽歸路覽勝此徘徊俯揮鐵馬鞭頑石同  
陶壞劃成四大字屹栗陰虹摧淪精入崖壑怒氣羞蟠回茫  
茫六百年風雨生莓苔偉蹟澆銷泯威靈安在哉君  
爲訪古遊賦詩追七哀人生誰不爾零落全塵埃按磨崖

字跡今猶存雲龍山東麓直行四字東向稍南有金人題名  
凡三行行四五字不等字多漫漶可見者三人後三行行四  
字書正大元年七月上旬同觀皆南向又稍西有元人題識  
凡二行四五字不等可見者大德八年九月日三人凡九字  
皆東南向蘇子由魏佛狸歌睥睨山川俯畫  
地畫作西方佛名字蓋卽指此

### 唐靈泉頌

右靈泉頌駱賓王撰文爲蕭主簿宋思禮泐石文見宦  
績傳案賓

王集蕭縣尉柳冕句下注云蕭縣後改爲蕭山縣屬紹興府

### 碑碣攷



注意此泉在浙東故于文內此邑城近騫山句作城控剡山  
注亦云剡山在嵯縣攷隋唐以前各史地志蕭縣絕無移置  
浙東之證至蕭山縣地始於儀鳳二年置永興縣天寶元年  
更名蕭山見唐書地理志今案頌文稱宋思禮以調露二年  
來佐百里其年上距永興置縣之歲纔及三載下至天寶改  
元凡六十三年思禮賓王物故已久是儀鳳調露之際浙東  
不特無蕭縣并無蕭山賓王何緣逆知更名先著蕭縣之日  
後人欲爲浙東生色妄加竄改於是注者附會剡山之誤而  
指爲蕭山尉又緣飾蕭縣尉句而謂蕭山本名蕭縣委曲彌  
縫幾欲亂眞不可不辨宋思禮爲蕭縣主簿見唐書孝友傳  
文內城近騫山地連禹穴句見舊州志未詳所本以理度之

州志爲近

唐丁思禮豎心經碑記

右心經碑記在沛縣夏鎮崇勝寺案金石萃編載碑高五尺  
八寸五分廣二尺一寸五分分作四截書上截心經十七行  
行十七字次截記十六行行十九字三截五行皆尼僧名下  
截十六行行八字至十一字不等行書今第三截以上與前  
書所載同惟前書錄記闕文過多蓋拓本不清非碑剝落所  
致今增可辨者二十六字文見古蹟攷又記後題大唐天寶八載  
七月廿一日豎前書誤作大曆八載又前書列第四截題名  
及治平二年二月十五日記又第三截書大宋國崇甯元年  
二月丁酉日記等字今已淤沒又碑側三行行十七字行書



題

上闕三字

度左僕射轄冠軍大將軍行右清

闕二字

府

闕一字

開國

公食邑五百戶上柱國夏侯

闕一字

貞元十五年孟春之月於

此主務故記之耳共五十一字今皆漫漶不甚可辨蓋是碑始建于唐元宗天寶時故稱載不稱年後德宗時加記至宋英宗徽宗復題名并識歲月也又第三截題名今可辨者七八金石萃編僅列六人而首行院主前書作像主末行妙隆前書作妙德則亦前書誤也

唐圮橋石表銘

并序

石圮橋石表銘梁肅撰文

見邳州古蹟攷恭讀

欽定全唐文小傳肅字敬之一字寬中世居陸渾建中初中

文辭清麗科累轉翰林學士皇太子諸王侍讀卒序載大歷

開子旅遊次墮履之地於是鑽石勒銘揚於邳圮知肅曾親到圮橋泐石為表明趙筠寒山堂金石時地攷云在淮安下邳蓋是碣明代尚存河徙汨沒今款識不可詳矣

唐徐泗濠三州節度掌書記廳壁記

右掌書記廳壁記韓愈撰文

見唐職官表序

石刻埋沒攷昌黎年譜

愈以貞元十五年二月抵徐及秋節度使張建封奏為推官明年夏去徐泐石當在是時又案愈上建封書云有小吏持院中故事節目十餘事來示愈有自九月至明年二月之終皆晨入夜歸非有疾病事故不許出據此知唐方鎮故事凡推官從事皆日入使院理事所謂掌書記廳即在院中無疑舊使院久圮書記廳亦不可攷矣

碑碣攷

司台徐州府志卷第二

三



唐沛上原廟碑銘

右沛上原廟碑銘柳宗元撰文見祠碑久埋沒款識無攷案

宗元以德宗貞元九年成進士憲宗元和十四年卒年四十七恭讀

欽定全唐文列是碑于劍門銘之前劍門作于憲宗元和初則此碑當立在德宗朝貞元末也沛上原廟祀漢高祖辨見祠祀攷

唐使院新修石幢記

右使院石幢記幢八面各高六尺七寸七分廣七寸以下皆準宋三

司布帛尺文三行行三十八字題名四行正書在今府治儀門外

左側唐支度副使檢校司封郎中侍御史高瑀撰文見唐職官表序

節度判官譚藩書元和十二年九月十二日立石文後節度

僚佐題名凡十九人磨滅者四人餘詳職官表李愿下書元和六年十一

月四日上潛研堂金石跋尾云舊唐書憲宗紀元和六年十

月以李愿充武甯軍節度使史書除授之日碑紀到任之日

故差一月是也金石萃編謂兩唐書高瑀傳綜其前後未嘗

為支度副使與碑結銜不合疑別一高瑀而唐書無傳者然

攷瑀傳瑀曾累辟諸府從事碑文內一云徐之從事立石府

庭一云明誠中和從事之道也是唐制節度副使以下皆謂

之從事即此高瑀無疑案金石萃編碑前署款稱節度判口

口御史內供奉譚藩書今攷碑字下截剝落撰書兩人連列

一行排計字數迄無容處疑御史內供奉五字非碑原文也



碑末一行題大宋皇祐六年甲午歲二月二日申使乞差兵匠自金銅門外出取到舊使院碑幢二座於新使院內豎立都孔目官銀青光祿大夫檢校國子祭酒兼監察御史朱吉案紀元編宋仁宗皇祐止五年踰年爲甲午至和元年也宋史仁宗本紀至和元年四月朔下德音改元碑鐫二月在未改元之前故仍稱皇祐六年非誤也據此跋知石幢本有二座皆當在府署今僅存其一字畫端好學者寶貴之乾隆五十八年徐州府知府永齡作亭覆之并署跋其後

宋蘇軾題百步洪東崖石刻

右百步洪石刻舊志云明成化中主事尹珍於洪東崖石間得石刻一上書郡守蘇軾山人張天驥詩僧道潛月中遊十

六字蓋軾守徐時筆也因建蘇墨亭今沒於河又案鐵佛寺有蘇書石刻姜州志宣德四年寺僧廣善因修寺得之又有蘇書黃茆岡碑志稱久湮淮徐同知孫國瑜重摹泐石今皆不可攷

宋蘇軾登雲龍山詩磨崖

右蘇軾詩磨崖方廣一尺五寸長一尺九寸詩凡六行行九字正書後二行題元豐元年九月十七日張天驥蘇軾顏復王鞏始登此山二十二字案詩載蘇集今見古蹟攷黃茆岡跋亦見詩集注今存雲龍山書院講堂庭右山石西面

宋蘇軾書黃樓賦石刻

右黃樓賦石刻四面形方而每面寬窄不一一廣二尺四寸



四分凡十行一廣一尺五寸七分凡七行一廣二尺二寸凡  
十行一廣一尺八寸凡八行高七尺一寸每行三十四五字  
不等正書蘇轍撰文見銅山古蹟攷金石萃編云碑無書人不知何  
人所立按匏翁家藏集引書畫譜云黃樓賦蘇子由所作而  
其兄子瞻所書也石刻在徐州爲方柱周遭書之其後磨一  
面而碑首相接處復失其半行相傳爲雷所擊今碑在黃樓  
其東面北溢於泗南溢於濟等句猶畱半行如匏翁集所云  
乃北面復有此文字跡完好疑首行本在東面日久磨滅後  
人續成之遂移首行於北面其三面則原碑無疑又據東坡  
年譜子由作賦先生跋云元豐元年八月癸丑樓成九月庚  
辰大合樂以落之今此碑無建立年月計樓成作賦當在元  
豐元年九月以後矣

宋彭城縣令石記

右彭城令石記陳師道撰

見宋職官表序

案宋史陳師道傳師道以

元祐中爲本州教授此碑當立於哲宗時縣令故署今不詳  
所在碑亦湮沒無攷

宋白雲洞磨崖

右白雲洞磨崖在今九里山白雲洞口凡題名四行行九字  
十字十一字不等其文自左迤右首題大宋政和乙未十一  
月壬申案乙未徽宗政和五年也其題名皆彭城官僚凡四  
人見宋職官表後書五言律詩一首四行行十二字詩自右迤左  
款書朝散大夫前太子舍人王延軌題皆正書蓋亦政和五



年同遊時作也詩見山川攷  
白雲洞下

### 宋蕭縣儒學碑記

右儒學碑記晁端中撰文見學攷紹興五年八月庚寅立石今

沒於河案陽山縣志有宴嬉臺碑記宋李釜撰書  
今碑久佚文辭歲月皆不可攷姑附于此

### 金利國監奉聖院帖

右奉聖院帖在今利國驛案碑金正隆四年十月十二日武

甯軍節度使給帖付僧德誠住持奉聖院碑首泐帖文左書

使院官五行結銜書姓署押蓋當時帖式也額題誠公山主

和尚住持記凡三行行三字攷正隆為金海陵年號又案金

史烏延蒲里黑拜武甯軍節度使在海陵伐宋之前碑列驃

騎上將軍武甯軍節度使烏即是人也餘皆佚其名

### 金昭慶寺牒

右昭慶寺牒在今浦縣夏鎮北高村古昭慶寺內篆額題敕

賜昭慶寺碑碑文連額四截長七尺五寸寬三尺第二截右

二行書尚書禮部牒僧宗遇有禮部印文略言寺本奈賓院

大定三年納錢乞牒賜名昭慶寺中三行書牒奉敕可特賜

昭慶寺牒至准敕故牒左書官銜姓押第三截中右皆列發

賣所官銜姓左列滕沛官吏銜姓第四截書碑記凡二十八

行行二十七八字不等末署蘄縣主簿兼知縣尉李開記文

沛縣古蹟攷文後題名兩層上層十一人下層六十餘人皆本村

耆民施主也案金石萃編莊巖禪寺牒跋曰大定初寺觀納

錢請賜名額之事金史無攷據同官縣靈泉觀記云大定初



王師南征軍須匱乏許進納以賜宮觀名額今得於陝西者  
凡十四碑云云今此碑結銜與莊嚴寺牒正同蓋通頒各州  
軍同一例也又案金史地理志滕州本宋滕陽軍大定二十  
三年升爲滕陽州二十四年更今名沛縣屬焉碑立於大定  
三年故猶稱滕陽軍沛縣與史合也

### 金龍興禪院牒

右龍興禪院牒在銅山縣古寶峯寺沙石填淤僅存其半長  
四尺寬二尺二寸行書額三行題敕賜龍興禪院六字次截  
書敕結銜與昭慶寺牒同惟字跡漫漶不載年月蓋亦大定  
三四年頒賜名額也下截益磨滅可辨者僅尙書禮部牒  
行五字武甯軍一行三字耳

### 金明五郎石幢

右明五郎石幢在府城北寶峯山寺凡八面高三尺五寸每  
面寬六寸第一面首刻佛像中題篆額書明五郎焚身石塔  
記下書記文記言彭城人明革誦經禮佛發願焚身於九里  
山之巨石上傍有遺文一槭乃平日指迷詩頌也乃爲記及  
所遺指迷詩頌併刻于石云云後題大金泰和柴闕三閏八

月日將仕郎前彭城縣主簿兼管勾河防常平倉事張邦闕二

字闕一卿里人張闕一書丹篆額其記文書于第一面之下半截

及第二三面後接題篆文明革辭世詩頌并序在第三面之  
末行序在第四五面之上截發願頌在第四面下截自歎頌  
在五面中截皆七言四句歎世頌在第五面下截七言八句

### 碑碣攷



其第六面凡六截首截五行書第一供養諸佛云云凡十七字次截書發願頌五言四句又次截書第二供養觀世音菩薩云云凡二十字又次截書頌七言四句又次截書第三報答父母云云凡十五字又次截書思父母頌七言四句第七面凡四截首截書第四救拔一切眾生云云凡十五字次截書救拔一切眾生頌七言八句又次截書發心頌又次截書勸妻頌皆七言四句第八面二截上截書頌亦七言四句下截題名十五人末又書書丹人族兄下頌文俚鄙款識舛互蓋鄉人爲之泰和爲金章宗年號距今垂五百年例得錄存以備一格

元蕭縣儒學碑記

右蕭縣儒學碑傳汝礪撰文見學宮校攷學宮既遷碑亦堙沒文稱至元丁丑縣尹耶律廷瑞慨然興復役興于戊寅春正月收功于冬十月稽其年歲實元世祖至元十五年也

元徐州洪神廟碑

右洪神廟碑傳汝礪撰文見祠祀攷舊在百步洪上廟遷碑亦淤沒不詳建立年歲案文稱國朝收復殘宋車書混一云云宋以元至元十六年亡是碑蓋立於至元末年也又攷湧幢小品稱金龍四大王神姓謝名緒爲南宋咸晚宋亡投江死明初兵起神助明敗元兵於呂梁洪然此碑文則云曩歲江左未附民不聊生廟亦草創銘則云孰其尸之護國金龍稽其時代與湧幢小品所記不合疑元人指龍神爲金龍王後世



求其人以實之耳

元宿遷創修廟學記

右創修廟學記李凱撰文

見學  
校攷

廟學以元世祖二十八年興

工至成宗元貞元年落成則此碑當立於元貞初矣迨明萬

曆五年廟學遷建碑遂堙沒無攷

元重摹大風歌石刻

右大風歌石刻今存沛縣歌風書院案舊州志歌風碑在沛縣歌風臺碑有二一豎于東不知年伐西則元大德摹刻者舊碑中斷束以鐵金石存引汪蛟門歌風臺記元大德間摹刻于石者邑令羅士學也案舊碑不知刻自何時相傳爲漢曹喜書亦無可據自大德中已經重刻其碑卽非漢刻亦必

唐宋人所爲何近在彭城而歐趙皆不收錄也金石萃編載碑高一丈一尺廣四尺四寸四行行八字案今二碑僅存其一爲大德間重摹者碑已斷下截每行闕二字僅高六尺五寸矣其文作古篆攷之辭季宣書古文訓禹貢江漢朝宗于海東流爲漢漢字皆作滅今碑作燹凡禹貢海字皆作彙今碑作藜允征威克厥愛威字作畧今碑作畧說文古古文作夙今碑作夙知其文皆古文體而小變之威與畏通故與古通也舊碑據乾隆府志云相傳爲蔡邕書旣無款識不詳年月然自唐以後始有以歌詩泐石者指爲漢人書皆附會說也無所附麗并識于此

元袁氏阡碑

碑碣攷



右袁氏阡碑袁氏阡者學士袁遵道之先塋也在豐縣縣志云袁遵道阡碑姚燧撰文見古蹟攷趙孟頫書郭貫篆額時稱三絕萬厯閒知縣常思溫嘗昇碑出土字畫如新其拓本海內爭寶焉今復埋沒案碑文言至大庚戌曾孫遵道求銘先德云云知碑立于武宗至大三年也

元昭惠靈顯真人祠碑記

右昭惠靈顯真人祠碑記元曹元用撰文見祠祀攷在呂梁東文稱皇慶壬子秋重構知碑立於仁宗皇慶元年也姜州志云此記與吳善元武殿記並趙孟頫書石為世所重今碑汨沒不可復睹良可惜也

元呂梁洪關尉廟碑

右關尉廟碑趙孟頫撰文見祠祀攷并書案元仁宗皇慶初驛丞下邳董恩作廟於呂梁洪上徵孟頫為文文成於二年十月十七日今碑沒於河互詳銅山古蹟攷

元龍泉庵記

右龍泉庵記首題嶧山五華頂遠塵裔嗣晚褐春陽教道顯撰書丹并篆額文見宿遷古蹟攷後書四至地名末題時在延祐年歲次乙卯立石碑在今宿遷縣北峒崑山七真洞碑稱嶧山者疑元時舊名乙卯歲元仁宗延祐二年也

元慶真觀碑記

右慶真觀碑吳善撰文見銅山古蹟攷趙孟頫書并篆額今碑在銅山縣東南鳳冠山書院裂為兩截題額已亡碑長八尺廣三

碑碣攷



尺行楷書凡十九行行五十二字末書延祐六年立是爲仁宗卽位之八年也

### 元興國寺碑記

右興國寺記在今邳州過滿山古興國寺內篆額四行行四字題邳州偃武鄉孟家疇興國寺記碑長七尺廣三尺一寸凡二十四行行四十餘字不等行書首題鄉貢進士缺邳州儒學缺學正缺下邳缺趙缺撰并書丹後題泰定三年立末行書邳州官吏銜姓字跡磨滅不可盡辨文見邳州古蹟攷案邳州志引舊州志過滿山有興國寺宋泰定三年建新志疑宋無其年今碑文稱寺建自至元丙戌至泰定丙寅首尾四十一年云云丙戌爲元世祖至元二十三年丙寅爲泰定帝二年

中歷成武仁英四宗前後年數相合其爲元代無疑舊邳志誤也

### 元淵德公廟碑

右淵德公廟碑

文見祠祀攷

邳州志云案前三志皆載此文爲焦

景秋譔今廟有一碑建於元統二年四月焦景狄書其文略曰元統二年夏四月奉議大夫劉公寅來守下邳徧謁羣祀岨山之陽淵德公其一也土人云水旱灾厲凡有禱必應焉初不之信旣而淫雨數旬不止民以爲病公率僚屬往禱焉潦水不克渡望祭於河之壘明日開霽公頗異之秋冬大旱二麥將槁公方爲憂及春之交時雨丕降闔境霑足實神之惠公備祭品往禱焉顧瞻祠下斷碑猶存字畫磨滅莫究其



由徘徊久之悵然興懷欲改立石刻其舊文論諸左右莫能  
知者歸而訪及耆宿得之于焦斗南然非舊矣乃前同知梁  
彥中之所作也公覽而悅之遂割已俸命工刻石著其本末  
以示不朽噫使淵德公之神聞而復彰非劉公之力孰從而  
明之其存心仁矣哉是可尙已以下全載前文而略加點竄  
其忠肅次子歸德監下有蠻蠻公三字則忠肅次子之名也  
言於州之僚佐下有皆同諾曰吾輩久願爲也繼因鄉耆劉  
慶等之請爲蠲其徭役專力撤而新之等語紀當日事也其  
尾又有延祐丙辰八月至九月不雨上下憂懼以爲將無麥  
禱而大澍農不失種丁巳春旱愈甚眾以爲將無苗禱而又  
雨隴卽回青二事志靈感也攷延祐三年下至元統二年僅

十九年不應斷碑磨滅莫究其由如後碑所云其前碑爲焦  
景秋作後碑爲焦景狄書又未知後碑中之焦斗南復是何  
人卽景秋與否所謂梁彥中之所作復是何文詞不別白莫  
能詳究再攷延祐紀元爲甲寅之歲所云丙辰八月不雨正  
立前碑之月意所謂欲改立石刻其舊文卽指前碑而點竄  
原文增其前後凡三百餘字乃舊志又皆見前碑而不見後  
碑皆事理之可疑者也邳州志存疑未斷剖析甚難然細繹  
兩碑文似尙可推尋原委案其前碑云唐貞元九年大構祠  
宇宋因之封以淵德公詔立碑紀其事其後碑云瞻顧祠下  
斷碑猶存字畫磨滅是所指斷碑乃宋時原碑故下文得之  
于焦斗南句下特接然非舊矣乃前同知梁彥中之所作也



二句蓋梁彥中之文在元統二年劉寅守下邳時僅見錄本未見碑版劉君求唐宋原文不得卽以梁文泐石而加跋語以識其事此碑顛末本不難辨自明聞人詮著南畿志載梁彥中所作淵德公祠記誤作焦景秋譔江南通志府州志悉從之蓋緣碑題焦景狄書采訪者未審跋文語句又誤狄爲秋譔謬沿襲致多疑竇至碑刻舊文較諸志所載增其前後則方志所引藝文往往與碑版不合如明漕運新渠記等碑舊志所錄與原碑俱不符也又諸志重在藝文非攷金石故但載前碑不具後跋今錄原文入祠祀淵德公廟下詳紀跋語于此而攷釋之碑後題名俱詳職官表

案碭山志有元修大成殿記王旭撰修廟學記張忠撰先農祠記袁景撰成郡伯墓碑張起巖撰旌段興妻貞節墓碑孔庸敬撰今碑文歲月無攷姑附于此

案今戶部山武廟鳳冠山書院皆有關侯畫竹石刻雲龍山頂有唐李白書壯觀二字石刻大士岩前有吳道子觀世音畫像兵備道署有宋黃庭堅書修竹篇石刻鳳冠山書院有朱子墨蹟石刻湖山楊氏有重摹聖教序及蘇軾赤壁賦石刻岳飛出師表石刻皆好事者流傳摹泐無關本郡故實特以膾炙人口附存篇末云



代理徐州府教授丁鎮瀛校

同治徐州府志卷第二十一上

宦績傳

社稷之心重則寵利之見泯矣懷保之念摯則戲怠之意消矣  
雖剛柔殊用弛張異宜及其殫精竭誠陶物振俗未有枹權而  
鼓不應磁引而鍼不躍者也昔人有言舉中於理則強梁褫氣  
片言違正則廝臺解情况乎躬寄人牧手握天憲升墜由其憎  
愛安危捷於影響或乃虓鬪爲情慢易恣欲肆縉雲之饕餮嗤  
潁川之鳳凰卒致俗偷術窮釁積名喪揆夫專一慈惠之吏何  
宅心之殊塗乎詩曰豈弟君子民之父母言舉斯心加諸彼而  
已故狂逞者法隳而毒厚感被者人亡而思存今輯古今吏治  
政術有聞者並著於篇其非本郡官僚而犯難勤事有裨茲土

宦績傳

同治徐州府志卷第二十一上



功勩亦不可沒列其行事區而載之

漢

穆生白生申公皆魯人與楚元王交俱受詩於浮邱伯元王既王楚皆爲中大夫呂后時浮邱伯在長安元王遣子郢客與申公俱卒業文帝聞申公爲詩最精以爲博士元王薨申公隨郢客歸郢客嗣立復以申公爲中大夫傅太子戊戊不好學病申公初元王敬禮申公等穆生不耆酒元王每置酒常爲設醴及王戊卽位常設後忘設焉穆生退曰可以逝矣醴酒不設王之意怠不去楚人將鉗我於市稱疾臥申公白生強起之穆生日易稱知幾其神乎君子見幾而作不俟終日先王所以禮吾三人者爲道之存故也今而忽之是忘道也忘道之人胡可與久

處遂謝病去申公白生獨留王戊稍淫暴與吳通謀二人諫不聽退居教授終身不出

漢書楚元王傳申公傳

張尙楚王戊相戊應吳王反尙諫不聽見殺景帝錄其子爲山

陽侯

楚元王傳

趙夷吾楚王戊太傅亦以諫戍見殺景帝錄其子爲商陵侯

元王傳

唐長賓東平人楚太傅事王式王扶琅邪人爲泗水中尉師事

山陽張長安傳王式之學

漢書王式傳

蕭咸字仲東海蘭陵人爲丞相史舉茂才好時令遷淮陽泗水

內史張掖弘農河東太守所居有迹數增秩賜金

漢書蕭望之傳

何武字君公蜀郡郫縣人成帝時由京兆尹左遷楚內史沛郡

宦績傳

同治徐州府志卷二十一

七



太守武爲人仁厚好進士獎稱人之善在楚厚兩龔在沛厚兩  
唐及爲公卿薦之朝廷此人顯於世者何侯力也世以此多焉  
其所居亦無赫赫名去後常見思

漢書本傳

牟融字子優北海安邱人以司徒茂才爲豐令視事三年縣無  
獄訟爲州郡最司徒范遷上其理狀永平五年入爲司隸校尉  
後漢書本傳

江革字次翁齊國臨淄人鄉里稱之曰江巨孝永平初補楚太  
僕月餘自劾去楚王英馳遣官屬追之不還復使中傅贈送辭  
不受

後漢書本傳

袁安字邵公汝南汝陽人永平十三年楚王英謀爲逆事下郡  
覆考明年三府舉安能理劇拜楚郡太守是時英辭所連及繫

者數千人顯宗怒甚吏案之急迫痛自誣死者甚衆安到郡不  
入府先往案獄理其無明驗者條上出之府丞掾史皆叩頭爭  
以爲阿附反虜法與同罪不可安曰如有不合太守自當坐之  
不以相及也遂分別具奏帝感悟卽報許得出者四百餘家

後漢書本傳

楊統字仲通廣漢新都人善圖讖學及天文推步之術建初中  
爲彭城令歲大旱統推陰陽消伏縣界蒙澤太守宗湛使統爲  
郡求雨亦卽降澍自是朝廷災異多以訪之統在縣休徵時序  
風雨得節嘉禾生於寺舍人庶稱神

後漢書楊厚傳并注

張禹字伯達襄國人元和三年爲下邳相徐縣北有蒲陽坂傍  
多良田而堙廢莫修禹爲開水門通引灌溉遂成熟田數百頃

宦績傳

司台余州府志卷第二十一

三



勤率吏民假與種糧親自勉勞遂大收穀實鄰郡貧者歸之千餘戶後歲至墾田千餘頃民用溫給功曹史戴潤故太尉掾也

權動郡內有小遣禹令自致獄然後正其法自長史以下莫不震肅

後漢書本傳韓稜字伯師舞陽人章帝時為下邳令多異政邑獨不電徵拜

尚書邳人廟祀之南畿志今按後漢書本傳不言為下邳令南畿志蓋本元焦景秋祠堂記

謝夷吾字堯卿山陰人善風角占候章帝時以鉅鹿太守左轉

下邳令所在愛育人物有善蹟豫剋死日如期果卒後漢書本傳

蘇章字孺文扶風平陵人安帝時出為武原令時歲饑輒開倉

廩活三千餘戶後漢書本傳

張皓字叔明健為武陽人永元八年出為彭城相薦隱士問耶

邈等永甯初徵拜廷尉後漢書本傳

費汎字仲慮後漢紀作仲虞吳興烏程人舉孝廉除郎中屯騎司馬遷

蕭令視民如子先教後罰在任九年風化大行奸慝不作時沛

有蝗獨不入境朝廷嘉之遷梁相後漢紀費府君碑梁相諱汎

文為魯大夫有功封費曰妣為姓秦項兵起避堅于此遂苗家焉

君也業稼穡好學禮樂大漢之關向司相繼絕而復續至梁府廉除郎中屯騎司馬遷蕭令

更郡右塞鄂直在公履法察孝廉除郎中屯騎司馬遷蕭令

更郡右塞鄂直在公履法察孝廉除郎中屯騎司馬遷蕭令

更郡右塞鄂直在公履法察孝廉除郎中屯騎司馬遷蕭令

更郡右塞鄂直在公履法察孝廉除郎中屯騎司馬遷蕭令

更郡右塞鄂直在公履法察孝廉除郎中屯騎司馬遷蕭令

宦績傳 司台余川府志卷第二十一上



相多行不法朗與更相章奏幸臣忿嫉欲中之會九真賊起眾  
共薦朗為九真都尉後漢書黨錮傳

史弼字公謙陳畱考城人議郎何休訟弼有幹國之器宜登台  
相徵拜議郎侯覽等惡之光和中出為彭城相會病卒後漢書本傳

陳登字元龍陶謙收徐州表登為典農校尉是時世荒民饑登  
乃巡土田之宜盡鑿溉之利秔稻豐積三國志張邈傳注

步游張漢時汝南人少孤四歲母拾麥為人所賣游張後為取  
慮令春月按行高年至里有病嫗馬不前白下問訊乃其母也

誠願宿馮而冥感昭徵矣水經注并太平寰宇記

梁習字子虞陳郡柘人太祖為司空辟召為漳長累轉乘氏海  
西下邳令所在有治三國志本傳

溫恢字曼基太原祁人舉孝廉為廩丘長鄆陵廣川令彭城魯  
相所在見稱三國志本傳

孫堅富春人熹平中為鹽瀆丞轉盱眙丞又徙下邳丞歷佐三  
縣所在有稱吏民親附三國志本傳

關 河東解人建安四年先主殺徐州刺史車胄使守下邳行  
太守事三國志本傳

徐庶字元直潁川人建安時為楚相有碑在彭城三國志諸葛亮傳注水經注

### 三國魏

武周沛國人為下邳令刺史臧霸敬異周身詣令舍從事認詞  
不法周得其罪便收考竟霸益以善周三國志臧霸傳

### 宦績傳



呂虔字子恪任城人爲魏太祖從事將家兵守湖陸文帝時遷徐州刺史請王祥爲別駕民事一以委之世多其能任賢三國志本傳

王祥字休徵琅邪臨沂人呂虔檄爲別駕委以州事時寇盜充斥祥率厲兵士頻討破之州界清靜政化大行時人歌之曰海沂之康實賴王祥邦國不空別駕之功累封睢陵侯食邑一千

六百戶

晉書本傳

胡質字文德壽春人爲徐州刺史諸葛誕舉兵淮南簡銳卒爲游軍以備外寇正始中爲征東將軍都督青徐諸軍事廣農積穀有兼年之儲置東征臺且佃且守又通渠諸郡利舟楫嚴設備以待敵海邊無事三國志本傳晉書石苞傳

胡威字伯虎質之子也少有志行厲操清白咸熙中爲徐州刺

史有殊績

三國志胡質傳并注引晉陽秋

晉

王渾字元冲晉陽人泰始初遷徐州刺史時歲饑渾開倉賑贍

百姓賴之

晉書本傳

司馬佃宣王子封琅邪王泰始中出爲鎮東大將軍假節都督徐州諸軍事代衛瓘鎮下邳佃鎮御有方得將士死力吳人憚之晉書本傳

胡奮字元威安定臨涇人泰始中爲徐州刺史所在有聲績晉書本傳

本傳

嵇紹字延祖譙國銓人太康中拜徐州刺史時石崇爲都督性雖驕暴而紹將之以道崇甚親敬之晉書本傳

宦績傳



祖逖字士稚

一作雅

范陽道人也京師大亂避地淮泗以所乘車

馬載同行老疾躬自徒步藥物衣糧與眾共之又多權略眾推

爲行主達泗口元帝逆用爲徐州刺史尋徵軍諮祭酒遷奮武

將軍豫州刺史渡江中流擊楫而言曰祖逖不能清中原而復

濟者有如大江卒能開拓司豫副此志也功未就而卒

晉書本傳

劉遐字正長廣平易陽人建武初爲下邳內史初沛人周撫與

同郡周默因天下亂各爲塢主以寇抄爲事默降祖逖撫怒遂

襲殺默以彭城叛石勒遣騎援之詔遐領彭城內史與徐州刺

史蔡豹等討撫於寒山撫敗走詔徙爲臨淮太守後爲兖州刺

史太甯初自彭城移屯泗口後爲徐州刺史

晉書本傳

蔡豹字士宣陳畱圉城人元帝時爲徐州刺史豹在徐上內撫

將士外懷諸眾甚得遠近情後討徐龕以軍敗誅人聞其死多

悼惜之

晉書本傳

荀羨字令則潁川臨潁人永和中除徐州刺史假節監徐兖二

州揚州之晉陵諸軍事羨將經畧中原自京口移鎮淮陰屯田

於東陽之石鼈尋加監青州諸軍事又領兖州刺史鎮下邳時

石季龍死羨撫納降附甚得眾心

晉書荀崧傳

南北朝宋

王仲德名懿以字行太原祁人晉太元末徙居彭城後從宋武

帝平長安爲太尉諮議參軍武帝受命累遷徐州刺史加都督

尋免官元嘉九年又爲鎮北將軍徐州刺史仲德三臨徐州威

德著於彭城

宋書本傳



申恬字公休魏郡魏人高祖踐祚拜東官殿中將軍轉員外散騎侍郎出爲綏遠將軍下邳太守轉在北海加甯遠將軍所至皆有政績

宋書本傳

垣閭下邳太守二十七年北魏抄掠清河郡從東安東莞出下邳閭閉城拒守保全二千餘家

宋書申恬傳

魏恭子元嘉初遣大使巡行四方兼散騎常侍孔默之王韻之等上言彭城內史魏恭子廉恪修慎在公忘私安約守儉久而

彌固請加褒賚以勸於後乃賜恭子絹五十匹穀五百斛

宋書良吏傳

吉翰字休文馮翊池陽人爲將佐十餘年清謹剛正歷官著美績甚得方伯之體元嘉八年爲徐州刺史監徐兗二州豫州之梁郡諸軍事時有死罪囚典籤意欲活之因翰入關齋呈其事

翰語且去明旦呼之來取昨所呈事視訖謂之曰卿意當欲宥此囚死命但此囚罪重不可貸旣欲加恩卿便當代任其罪因命左右收典籤付獄殺之原此囚生命其下畏服莫敢犯禁

宋書

本傳

張暢字少微吳郡吳人孝武鎮彭城暢爲安北府長史沛郡太守元嘉二十七年魏太武南征太尉江夏王義恭統諸軍出鎮彭城魏眾近城數十里彭城眾力雖多軍食不足義恭欲棄彭城南歸計議彌日不定時沈慶之欲趨歷城何勗欲奔鬱洲暢曰今城內乏食人無固心但以關扃嚴密不獲走耳若一搖動則潰然奔散欲至所在其可得乎今食雖寡朝夕未至窘罄豈有舍萬安之術而就危亡之道若此計必用下官請以頸血汚

宦績傳

司台余州府志卷第二十一上

八



君馬迹孝武聞暢議謂義恭曰長史言不可違也義恭乃止魏主既至登城南亞夫塚於戲馬臺立壇屋暢於城上與魏尚書

李孝伯語暢隨宜應答音韻詳雅魏人美之

宋書本傳

顏竣字士遜琅邪臨沂人延之之子受職於武陵王爲安北鎮軍府主簿盡心補益魏太武還自瓜步過彭城復求互市竣議以爲不可武陵從之

宋書本傳

王孝孫京兆灃陵人王脩之子

宋書廬陵王義真傳

爲武陵王鎮軍錄事

參軍元嘉二十八年魏太武過彭城遣人語城內須麥熟更來江夏王慮敵復至議芟剪麥苗移民堡聚孝孫曰敵不復來既自可保如其果至此議亦不可立百姓閉在內城饑饉日久方春之月野采自資一入堡聚餓死立至民知必死何可制耶敵

若必來芟麥無晚四座默然莫之敢對長史張暢等勸從孝孫

言議遂寢

宋書張暢傳

蕭思話南蘭陵人元嘉二十七年魏攻懸瓠思話時爲護軍將軍領精甲三千助鎮彭城魏軍退卽代孝武爲徐兗二州刺史監四州軍事尋免官元凶弒立以爲徐兗二州刺史思話卽率部曲還彭城起義以應孝武孝武卽位徵爲丹陽尹思話歷十二州所至愛才好士人多歸之

宋書本傳

王元謨字彥德太原人武帝臨徐州辟爲從事史後爲劉義賓司馬帶彭城太守義賓薨元謨上表以彭城要兼水陸請以皇子撫臨州政乃以孝武出鎮大明五年爲徐州刺史加都督時北土饑饉乃散私穀十萬斛牛千頭以賑之

宋書本傳

宦績傳

司台余州府志卷第二十一

九



沈曇慶吳興武康人大明元年爲徐州刺史時殿中員外將軍  
裴景仁助戍彭城景仁本北人多悉戎荒事曇慶使撰秦記十  
卷敘苻氏僭僞本末其書傳於世曇慶謹實清正所泄有稱績

世以長者稱之

宋書本傳

蘭陵儼爲平北長史薛安都叛儼密欲圖之見殺追贈光祿勳

宋書薛安都傳案魏書劉芳傳有蘭陵繆儼靈奇其弟子承先  
隨薛安都至京師云云疑蘭陵儼卽繆儼恐係宋書脫字之誤

梁

江革字休映濟陽考城人幼而聰敏有才思弱冠舉南徐州秀  
才爲梁鎮北豫章王長史被敕隨鎮彭城城旣失守爲魏人所  
執元延明聞革才名厚加接待革稱患脚不拜將害之見革辭  
色嚴正更相敬重乃命革作丈八寺碑並祭彭祖文革辭以囚

執旣久無復心思將加箠扑革厲色曰江革年六十不能殺身  
報主今日得死爲幸誓不爲人執筆延明知不可屈乃止後革  
還梁武帝大晏舉酒勸革曰今日始見蘇武之節

南史本傳

後魏

尉元字苟仁代人天安元年薛安都以徐州內附請援獻文以  
元爲都督諸軍事與孔伯恭赴之元入彭城以宋將張永仍據  
險要乃命安都等固守身率精銳分擊呂梁大破之遣使諭東  
徐州刺史張讜等相與歸命元表曰彭城倉廩虛罄人有饑色  
求運冀相濟兗四州粟取張永所棄船九百艘沿清運致可以  
濟救斯民詔從之又表分兵置戍進定青冀又書與宋徐州刺  
史王元載示其禍福宿豫淮陽皆棄城而遁於是遣高閭與張



同治... 李燦與畢眾敬對為東兗州刺史拜元都

督諸軍事鎮東大將軍開府徐州刺史時徐州妖人司馬休符

扇惑百姓元遣將討平之魏書本傳尉元徐州上皇帝表臣受

命出疆載離寒暑進無鄧艾一舉之

功退無羊祜保境之畧雖淮岱獲振而民情未安臣以愚昧屬

當偏任苟事宜宣徹敢不以聞臣前表以下邳水陸所轄先規

殄滅遣兵屢討猶未克定然彭城下邳信命未斷而此城之人

元居賊界心尚戀土輒相誑惑希幸非望南來息耗壅塞不達

雖至窮迫仍不肯降彭城民任元朗從淮南到鎮稱宋將任農

夫陳顯達領兵三千來循宿豫臣即以其日密遣覘使驗其虛

實如元朗所言臣欲自出擊之以運糧未接又恐新民生變遣

子都將于杏千劉龍駒等步騎五千將往赴擊但征人滄久逃

亡者多迭相扇動莫有固志器仗敗毀無一可用臣聞伐國事

重古人所難功雖可立必須經畧而舉若賊向彭城必由清泗

過宿豫歷下邳趨青州路亦由下邳入沂水經東安即為賊用

師之要今若先定下邳平宿豫鎮淮陽戍東安則青冀諸鎮可

不攻而克若四處不服青冀雖拔百姓狼顧懷倖倖之心臣愚

以為宜釋青冀之師先定東南之地斷宋人北顧之意絕愚民

南望之心夏水雖盛無津途可因冬路雖通無高城可固如此

則淮北自舉暫勞永逸今雖向熱猶可行師兵尚神速久則生

變若大雨既降或因水通運糧益眾規為進取恐近淮民庶翻

然改圖青冀二州卒未可拔臣輒與僚佐具議咸以為然若隱

而不陳懼有損敗之責陳而無驗恐

成誣罔之罪惟天鑒懸量照臣愚款

孔伯恭魏郡鄴人天安元年以鎮東將軍副尉元救彭城皇興

元年以書喻下邳宿豫城內率眾渡水破宋將陳顯達又與沈

攸之合戰大破之遂攻拔宿豫淮揚二年以伯恭為彭城鎮將

都督徐南兗州諸軍事魏書本傳

韓念祖淮陽郡上黨令始臨之初舊民南叛全無一人念祖撫

綏招集愛民如子南來民費係先等前後歸附戶至二百有餘

南濟陰郡睢陵縣人趙憐等辭稱念祖善於撫綏清身潔已請

乞念祖為睢陵令尉元表上詔從之魏書尉元傳

李長仁字景安勃海脩人累遷平南將軍沛郡太守仍為彭城

臣績傳



太守又從尉元討定南境還除北海內史凡在三郡吏民安之

魏書李叔虎傳

元雲太武孫封任城王延興四年爲征東大將軍開府徐州刺史以太妃蓋氏薨表求解任獻文不許雲悲號動疾乃許之性善撫綏得徐方之心爲百姓所追戀送遺錢貨一無所受獻文

嘉之魏書本傳

崔鑿字神具博陵安平人延興時出爲奮威將軍東徐州刺史鑿欲安悅新附有年老者表求假以守令詔從之又於州內治

銅以爲農具兵民獲利魏書本傳

元嘉太武孫代任城王爲徐州刺史假梁郡公甚有威惠魏書廣陽

王建閭傳

薛虎子代人太和四年徐州民桓和等叛詔虎子爲征南都副

將與尉元討平之以本將軍爲彭城鎮將在鎮雅得民和除開

府徐州刺史時州鎮戍兵資絹自隨不入公庫任其私用常苦

饑寒虎子上表陳白孝文納之在州戍兵每歲交代虎子必自

勞送喪者給殮帛州內遭水二麥不收上表請貸民粟民有車

牛者詣東兗給之並如所奏民得安堵孝文從容問祕書丞李

彪曰卿頻使江南徐州刺史政績何如彪曰綏邊布化甚得其

和帝曰朕亦知之沛郡太守邵安下邳太守張攀咸以贓汚虎

子案之於法在州十一載卒魏書本傳薛虎子徐州陳政事表

臣聞金湯之固非粟不守韓白之勇非糧不戰故自用兵以來莫不先積聚然後圖兼併者也今

江左未賓鯨鯢待戮自非委粟彭城以彊豐沛將何以拓定江關掃一衡霍竊惟在鎮之兵不減數萬資糧之絹人二十四匹即

自隨身用度無準未及代下不免饑寒論之於公無毫釐之潤宦績傳



語其私利則橫費不足非所謂納民軌度公私相益也徐州左  
右水陸沃壤清汴通流足盈激灌其中良田十萬餘頃若以兵  
絹市牛分減戍卒計其牛數足得萬頭與力公田必當大獲粟  
稻一歲之中且給官食半兵耕植餘兵尙衆且耕且守不妨捍  
邊一年之收過於十倍之絹暫時之耕足充數載之食於後兵  
資惟須內庫五稔之後穀帛俱溢匪直戍士有豐飽之資於國  
有吞敵之勢昔杜預田宛葉以平吳充國耕西零以疆漢臣雖  
識謝古人任當邊守庶竭塵露有增山海再陳政事表臣聞先  
王建不易之軌萬代承之聖王垂不刊之制千載共仰惟陛下  
道洽羣生恩齊造化仁德所覃迹超前哲遠崇古典留意治方  
革前王之弊法申當今之宜用定貢賦之輕重均品秩之厚薄  
庶令百辟足以代耕編戶膏其餘畜魏乎煥焉不可量也臣竊  
尋居邊之民蒙化日淺戎馬之所資計素微小戶者一丁而已  
計其徵調之費終歲乃有七縑去年徵責不備或有貨易田宅  
質妻賣子呻吟道路不可忍聞今淮南之人思慕聖化延頸企  
足十室而九恐聞賦重更懷進退非惟損皇風之盛慮傷慕義  
之心且臣所居與南連接民情去就實所諳知特宜寬省以招  
未至其小郡太守數戶而已一請止六尺絹歲不滿匹既委邊  
捍取其必死邀之士重何吝君輕今班制已行布之天下不宜  
忤冒以亂朝章但猥藉恩私備位藩岳憂責之地敢不盡言

元澄字道鎮任城王雲子襲封孝文時爲徐州刺史甚有聲績

魏書任城王雲傳

李元茂趙郡人太和間除鎮威將軍彭城鎮副將民吏安之賞

帛百匹穀二百斛 魏書李靈傳

元衍字安樂陽平王新成之子封廣陵侯太和中爲徐州刺史  
衍性清慎居官廉潔歷牧四州皆有稱績始衍至州病重帝敕  
徐成伯乘傳療之疾差成伯還帝曰卿定名醫賚絹三千匹成  
伯辭請受一千帝曰詩云人之云亡邦國殄瘁以是而言豈惟  
三千匹乎其爲帝所重如此 魏書陽平王新成傳

盧淵字伯源范陽涿人太和中京兆王愉鎮徐州以淵爲長史  
愉時年少事無鉅細多決於淵淵以誠信御物甚得東南民和  
南徐州刺史沈陵密謀外叛淵知之潛敕諸戍微爲之備屢有



表聞朝廷不納陵果殺將佐勒宿豫之眾逃叛淮濱諸戍由備  
得全陵之餘黨頗見執送淵皆撫而赦之惟歸罪於陵眾心乃

安

魏書盧元傳

元鑒字紹達襲父爵爲武昌王景明初爲徐州刺史屬徐兗大  
水民多饑饉鑒表加賑恤民賴以濟先是京兆王愉爲徐州王  
既年少長史盧淵寬以御下郡縣多不奉法鑒奏免梁郡太守

程靈虬徵還京師於是徐境肅然

魏書本傳

盧景字叔達前長史淵之弟宣武時爲徐州刺史寬和矜恕善  
於撫綏其在徐州戍兵疾親自檢恤至番兵年滿不歸願充後  
役終景一政然後始還人庶稱之

魏書本傳

李彥字次回散煌人宣武時爲徐州刺史延昌二年夏大霖雨

川瀆皆溢彥相水陸形勢隨便疏通得無淹漬之害朝廷嘉之

頻詔勞勉

魏書李寶傳

封回渤海椿人延昌中由太尉長史行徐州事回立朝以正直

見憚牧州郡政績尤著

魏書封懿傳

蕭寶夤字智亮齊明帝子國亡奔魏神龜中爲徐州刺史起學  
館於清東朔望引見土姓子弟接以恩顏與論經義勤於政治

吏民愛之

魏書本傳

高諒

一作諱

字修賢渤海人正光中爲驍騎將軍徐州行臺屬元

法僧反逼諒同之諒不從爲法僧所害朝廷痛惜之詔以諒臨

危受命誠節可重贈使持節平北將軍幽州刺史諡忠侯

魏書高法僧傳

元顯和濟陰王鬱從子爲徐州安東府長史元法僧叛顯和與

宦績傳

司台徐州府志卷第二十一上

古



戰被擒法僧執手命坐顯和曰顯和與阿翁同源別派皆是磐石之宗一朝以地外叛若遇董狐能無慙德遂不肯坐法僧猶欲慰諭顯和曰乃可死作惡鬼不能生為叛臣及將殺之神色

自若

魏書濟陰王  
小新成傳

元延明襲父猛爵為安豐王元法僧反梁遣豫章王蕭綜入守彭城詔以延明為東道行臺督諸軍討法僧延明先牧徐方甚得民譽招懷舊土遠近歸之綜既降延明因以眾乘之復東南之境至宿豫而還遷都督徐州刺史徐州頗經師旅人物凋敝延明招携新故人悉安業百姓咸附

魏書安豐王猛傳

常景字永昌河內温人清儉自守澹於榮利安豐王延明征彭城蕭綜降附遣景持節馳與行臺都督觀機部分尋授景徐州

刺史會杜洛周反於上谷仍以景為北道行臺討之

魏書本傳

崔孝芬字恭梓博陵安平人孝昌三年梁將成景儁率眾逼彭城除孝芬甯朔將軍為徐州行臺景儁築柵造堰謀斷泗水以灌彭城孝芬率大都督李叔仁等迎戰景儁退走除孝芬安南將軍兼尚書為徐兗二州行臺

魏書崔挺傳

辛紹先隴西狄道人也明敏有識量自中書博士轉神部令皇興中薛安都以彭城歸魏時朝廷欲緩安初附以紹先為下邳太守為政不苟激察舉其大綱而已惟教民治產禦賊之備及宋將陳顯達蕭道成蕭順之來攻道成謂順之曰辛紹先未易侵也於是不歷郡境徑屯呂梁卒於郡贈并州刺史晉陽侯

魏書

本傳

宦績傳

同治徐州府志卷二十一

七



羊深字文淵泰山平陽人孝昌末徐方多事以深為東道慰勞使即為二徐行臺初爾朱榮殺害朝士深弟侃據泰山降梁深在彭城忽得侃書招與同逆深慨然流涕斬侃使人并書表聞

莊帝下詔褒其忠烈

魏書本傳

潘永基字紹業廣宗人永安二年遷鎮東將軍東徐州刺史時蕭衍將曹世宗馬洪武等率眾來寇永基出討破之永熙中復除東徐州刺史前後在州為吏民所樂

魏書本傳

楊昱字元晷恒農華陰人孝昌末為徐州刺史尋除鎮東將軍東南道都督羊侃叛梁遣將軍王辯侵徐州蕃郡人續靈珍擁眾攻逼蕃城昱遣別將擊斬靈珍王辯退走侃兄深時為徐州行臺府州咸欲禁深昱曰昔叔向不以鮒也見廢春秋貴之奈

何以侃罪深也宜聽朝旨不許羣議

魏書楊播傳

房謨字敬放洛陽人興和中由兗州刺史轉徐州刺史始謨在兗州彭城慕其政化及為刺史合境欣悅謨為政如在瑕邱先是當州兵皆寮佐驅使饑寒死病動至千數謨至皆加檢勒不令煩擾以休假番代洗沐督察主司親自檢視又使傭賃令作衣服終歲還家無不溫飽全濟甚多時梁魏和好使人入其界者咸稱歎之神武與諸州刺史書敘謨等清能以為勸勵魏朝以河南數州鄉俗絹濫退絹一疋徵錢三百人庶苦之謨乃表請錢絹兩受任人所樂朝廷從之

北史本傳

慕容紹宗代人武定二年梁人劉烏黑寇徐方令紹宗率兵討擊大破之因除徐州刺史執烏黑殺之五年侯景反命紹宗為



東南道行臺節度三徐二兗州軍事與大都督高岳等擒梁貞陽侯淵明於寒山迴軍討侯景於渦陽大破之

北齊書本傳

辛術字懷哲東魏武定六年除東南道行臺尚書與高岳等破侯景擒蕭淵明遷東徐州刺史爲淮南經略侯景徵江西租稅術率諸軍渡淮斷之燒其稻數百萬石還鎮下邳人隨術北渡淮者三千餘家

北齊書本傳北史辛雄傳

北齊

趙彥深名隱以字行平原人天保中爲東南道行臺徐州刺史政尚恩信爲吏民所懷多所降下所營軍處士庶追思號趙行臺頓文宣璽書慰勞

北齊書本傳

蘇瓊字珍之長樂武強人皇建中爲徐州行臺左丞行徐州事

城中五級寺忽被盜銅像一百軀有司徵檢四鄰防宿及蹤跡所疑逮繫數十人瓊一時放遣寺僧怨訴不爲推賊瓊遣僧謝曰但且還寺得像自送爾後十日抄賊姓名及贓處所徑收掩悉獲實驗賊徒欵引道俗歎服舊制以淮北禁不聽商販輒度淮南歲儉啟聽淮北取糴後淮北人饑復請通糴淮南遂得商估往還彼此兼濟水陸之利通於河北

北史循吏傳

徐遠字彥遐石門人天保間累遷東徐州刺史河清二年除使持節都督東楚州諸軍事東楚州刺史爲政寬和有恩惠邑郭大火城民亡產遠躬自赴救對之流涕仍爲經營皆得安立

北齊書本傳

北周

宦績傳



王軌太原祁人武帝時陳將吳明徹入寇呂梁徐州總管梁士  
彥頻與戰不利退保徐州城明徹遂堰清水以灌之列艦城下  
以圖攻取詔以軌爲行營總管率諸軍赴救軌潛於清水入淮  
口多樹大木以鐵鎖貫車輪橫截水流以斷其船路方欲密決  
其堰以斃之明徹知之乃破堰遽退比至清口水勢已衰船艦  
並礙於車輪不復得過軌因率兵感之明徹及將士並就俘獲  
仍拜徐州總管軌性嚴重多謀略兼有呂梁之捷威震敵境陳  
人甚憚之初軌數言太子失德帝深然之而不能用及宣帝卽  
位軌自知禍及謂所親曰此州控帶淮南鄰接疆寇欲爲身計  
易同反掌但忠義之節不可虧違吾止於此待死義不爲他計  
冀千載之後知我此心大象元年宣帝令內史杜慶信就徐州

殺軌

周書本傳

源雄字世畧西平樂都人周武帝時檢校徐州總管及尉遲迥  
起兵時雄家累在相州迥潛以書誘之雄卒不顧迥遣將據蘭  
陵陷昌慮下邑雄遣徐州刺史劉仁恩儀同劉宏分擊平之又  
定東潼州之亂進位上大將軍拜徐州總管

隋書本傳

隋

爾朱敞字乾羅秀容契胡人開皇二年爲徐州總管在職數年  
號爲明肅民吏懼之以年老乞骸骨歸於河內

隋書本傳

盧昌衡字子均魏長史淵孫由尙書祠部郎出爲徐州總管長  
史甚有能名吏部尙書蘇威考之曰德爲人表行爲士則聞者  
以爲美談

隋書盧思道傳

宦績傳

隋書卷一百一十一



房兆本姓屋引氏代人為徐州總管剛毅有武略名顯當時北史劉

劉高彭城人大業時為蕭令政有恩惠時長吏多賦污高清節

愈勵風教大治獄無繫囚為吏民所稱隋書循吏魏德深傳

唐

李元軌高祖子封霍王歷徐州刺史閉門讀書以吏事委長史

司馬謙慎未嘗與物忤數引見處士劉元平為布衣交或問王

所長於元平答曰無長問者不解元平日人有短所以見長若

王無所不備吾何以稱之新唐書本傳

宋思禮字過庭事繼母徐以孝聞調露二年補蕭縣主簿會大

旱井池涸母羸疾非泉水不適口思禮憂懼且禱忽有泉出諸

庭味甘寒日不乏汲縣人異之尉柳晃刻石頌其孝感新唐書本傳

晃亦耿介之士也

駱賓王靈泉頌聞夫元功幽贊靈心以有德是親至道冥符篤行以通仁為本若乃天經

地義色養叶於因心夏清冬溫愛敬宏於錫類下逮六幽之奧

上洞三光之精不有至誠孰云斯感有廣平宋思禮字過庭皇

朝永州刺史昉之恩長增思慕之痛弱不好弄長而能賢趨庭聞

親禮之風亢宗勗曾閱之行事後母徐以孝聞北面與悲泣高

堂而咎己東遊下位歡微祿以逮親調露二年來佐百里俯就

微班之列將申反哺之情敬立身其若斯於從政乎何有時歲

亢早金石行銷遠近川原殆將埋絕澹井皆為湯谷通波盡化

汚池太夫人在遲暮之年有溫勞之疾非濫漿不可以適口非

源泉不可以疏導其源遂流注而不竭味甘若醴氣冷如冰此邑

而自生因疏導其源遂流注而不竭味甘若醴氣冷如冰此邑

城近騫山地連禹穴基址多石岡阜無津爰自興建以來久微

穿汲之利非精誠貫於有道純志泱於無私孰能洽冥覲以通

幽導靈泉而致養者也昔漢臣忠烈窮井飛於一言姜婦孝思

宦績傳

司合余州府志卷第二十一上 九



若人之積誠見賢思齊仰圭璋而有地揮毫興頌鏤琬珉以無  
慚乃作頌曰粵若稽古厥初生民其誰不孝獨我難倫義不悖  
道仁不遺親愛敬盡力孝弟通神顧我罔極因心感異冥契動  
天甘泉涌地洽洽無竭烝烝不匱曾是我私永錫爾類爰有哲  
人景行芳塵事諧則感道洽斯親孝為禮主  
名為實寘倘斯文之不墜知盛德之有鄰

王燾郡人永甯公珪之孫為徐州司馬性至孝母疾彌年不廢  
帶數從高醫游遂窮其術著外臺秘要討繹精明世寶焉後守

鄴洽聞於時

唐書王珪傳

陸餘慶蘇州吳人武后時舉制策甲科補蕭縣尉遷武陽尉餘  
慶以道自將雖仕不赫赫訖無悔尤

唐書陸元方傳

姚元之陝州峽石人景雲中為徐州刺史政條簡肅人為紀德  
於碑

唐書本傳

李少康元宗時以高第擢拜徐州刺史先是歲比大歉人流者

什五六少康條奏逋逃之名削去其版節用務本薄征緩刑歲

復大穰歸者益眾優詔嘉獎賜帛二百匹

獨孤及李公神道碑

常恒鄭州武陽人逍遙公嗣立之子開元初為碭山令政寬惠

吏民愛之天子東巡州縣供張皆鞭扑趣辦恒不立威而事給

唐書常思謙傳

李孟孳字公悅泗州刺史清明簡肅治行第一病疴癘卒於開

元十九年

李軫李君神道碑

蘇誦字廷言雍州武功人宰相瓌子自給事中出為徐州刺史

治有聲迹

唐書蘇瓌傳

白季庚下邳人建中初為彭城令時李正己據河南十餘州叛  
正己宗人洧為徐州刺史季庚說洧以彭門歸國因授朝散大

宦績傳

唐書徐州府志卷二十一

七



夫徐州別駕並徐泗觀察判官舊唐書白居易傳

張誠一作字老萊吳郡人遷宋州碭山縣令時睢陽當大兵後

野無草里無人撫之一年襁負至二年汙萊闢三年衣食足及

解印去縣民相率泣而餞之君子以為知政白居易張公神道碑

張建封字本立鄧州南陽人貞元四年為徐泗濠節度使初李

洎以徐降洎卒高承宗獨孤華代之地迫於寇常困蹙不支至

是李泌請以建封代之益與濠泗二州由是徐復為雄鎮久之

加檢校尚書右僕射十三年入朝帝眷遇異等敷奏悉嘉可將

還鎮帝賦詩以餞又以所持鞭賜之曰卿節誼歲寒弗渝故用

此為况十六年以病求代尋卒建封治徐凡十年躬於所事一

軍大治善容人過至健黠亦未嘗曲法假之其言忠義感激故

下皆畏悅士無賢不肖游其門者禮必均故其往如歸許孟容

韓愈皆奏署幕府子愔嗣為節度治徐七年其政稱治唐書本傳

許孟容字公範長安人辟武甯張建封從事李納以兵拒境建

封遣使諭止前後三輩往皆不聽乃使孟容見納敷引逆順納

即悔謝為罷兵表為濠州刺史唐書本傳

韓愈字退之鄧州南陽人張建封辟府推官操行堅正鯁言無

所忌唐書本傳

李藩字叔翰趙州人張建封辟為節度巡官未嘗察苛細建封

卒濠州刺史杜兼疾驅至陰有覬望藩泣謂曰公今喪君宜謹

守土何棄而來宜速還否則以法劾君兼錯愕去恨之因誣奏

建封死藩撼其軍有非望德宗怒密詔徐泗節度使杜佑殺之



佑雅器藩得詔十日不發召見藩曰世所謂死生報應驗乎藩曰殆然曰審若此君宜遇事無恐因出詔示藩藩色不變曰信乎杜兼之報也佑曰慎毋畏吾以闔門保君矣帝未之信亟追藩既入望其狀貌曰是豈作亂人耶釋之拜秘書郎後相憲宗

唐書本傳

溫造字簡輿并州祁人客游下邳張建封妻以兄女李希烈反德宗以范陽劉濟方輸忠款未能盡達朝廷倚賴之意密詔建封選縱橫士往諭之建封署造節度參謀奉使幽州傳達上詔濟感泣願效死節造還建封以聞詔造馳驛入朝以寵異之子璋咸通末爲徐泗節度使徐州牙卒曰銀刀軍頗驕橫璋至誅其惡者五百餘人自是軍中畏法

唐書本傳舊唐書

田牟平州人會昌時武甯軍節度使康季榮不卹軍士部下噪而逐之投於嶺外上以牟曾任徐州有政聲特開延英殿召對再命往建鎮一方於是安帖

獨異志舊唐書田宏正傳

王紹字德素京兆萬年人元和初自東都畱守爲武甯軍節度使自張愔後兵驕難治紹蒐輯軍政推誠示人裨將安進達唐重靖謀亂紹以計取之出家資賞士舉軍安賴

唐書本傳

李愿洮州臨潭人西平王晟之子元和中爲武甯軍節度使會伐青鄆數有功後以疾去

唐書李晟傳

李愬字元直愿弟元和十三年代愿爲節度使理兵有方略與賊戰金鄉凡十一遇擒賊隊將五十俘馘萬計淄青平進同中

書門下平章事

唐書李晟傳

宦績傳

司台余州府志卷第二十一上

三



高瑀冀州舊人太和六年爲武甯軍節度使瑀寬和居官無赫  
然譽所至稱治士人懷之唐書本傳

崔珙博陵人文宗時徐州以王智興後軍驕數犯法節度使高  
瑀未能制天子思材望威烈者檢革其弊見珙意氣慷慨先嘗  
爲泗州刺史得士心卽謂宰相曰欲武甯節度使者無易珙才  
遂以珙代瑀居二歲徐人戢畏唐書本傳

薛元賞文宗時自京兆尹出爲武甯節度使罷泗口猥稅人以  
爲便俄徙邠甯唐書本傳

盧宏止字子強蒲州人宣宗時出爲武甯節度使徐自王智興  
後吏卒驕沓銀刀軍尤不法宏止戮其尤無狀者終宏止治不  
敢譁優詔褒勞唐書盧簡辭傳

王式揚州人咸通三年徐州銀刀軍亂以式檢校工部尙書徙  
武甯節度使詔許滑兵自隨視事三日悉以計誅亂兵會詔降

武甯爲團練罷歸唐書王播傳

崔彥曾齊州全節人咸通初由太僕卿爲徐州觀察使龐勛反  
彥曾料丁男乘城或勸率衆奔兗州彥曾曰我方帥也奉命守  
此惟有死爾斬議者一人號於衆俄而勛傳城彥曾悉誅賊家  
屬勛超墉入囚彥曾大彭館尋遇害贈刑部尙書唐書崔融傳

溫廷皓并州祁人署崔彥曾幕府龐勛反以刀脅廷皓使爲表  
求節度使廷皓給曰表聞天子當爲公信宿思之乃歸與妻子  
訣明日勛索表倨答曰我豈以筆硯事汝耶速殺我勛熟視笑  
曰儒生有膽耶吾勒衆百萬無一人草檄乎囚之更使周重草



表及彦曾遇害廷皓亦死詔贈兵部郎中時焦璐李悅崔蘊柳  
泰盧崇嗣常廷範同為幕府寮官並遇害詔贈官有差

唐書溫大雅傳

又崔融傳

五代唐

劇可久字尚賢范陽人同光初為徐州司法參軍以幹職聞

宋史

本傳

李周字通理邢州內邱人長興中自靜難節度使徙鎮武甯所

至多善政

五代史本傳

晉

侯益汾州平遙人天福四年晉祖追念虎牢之功遷武甯軍節  
度同平章事遣中使謂益曰朕思卿前年七月九日大立戰功

故復以此月此日徙卿鎮彭門領相印仍賜門戟改鄉里為將  
相鄉勛賢里九月徐州大火益出金帛賑之

宋史本傳

漢

鞏庭美徐州都押牙楊溫徐州團練使初贊將入嗣漢畱二人  
守徐州聞贊不得立乃閉城拒命周太祖拜王彥超徐州節度  
使下詔諭庭美溫許以刺史并詔贊赦其罪皆不從及彥超克

徐州並死之

五代史溫陰公贊傳

周

王晏徐州滕人顯德初為武甯軍節度使境內安靜吏民詣闕  
舉畱請立衣錦碑世宗初復請立德政碑世宗命比部郎中張  
正撰文賜之

宋史本傳

宦績傳

司台徐州府志卷第二十一上

晉



宋

高繼冲字贊平故荆南節度使奉表納土授徐州大都督府長史武甯軍節度使徐宿觀察使繼冲鎮彭門幾十年委政僚佐

部內亦治

宋史荆南高氏世家

侯贊太原人開寶中以右武衛將軍知徐州有善政

宋史本傳

楊覃字申錫太平興國八年舉進士授徐州觀察推官覃勤於

吏治所至以幹濟稱

宋史本傳

曹彬字國華真定靈壽人雍熙四年為武甯節度使彬仁敬和厚知徐州日有吏犯罪既具案逾年然後杖之人莫知其故彬曰吾聞此人新取婦若杖之其舅姑必以婦為不利而朝夕答詈之使不能自存吾故緩其事然法亦未嘗屈焉

宋史本傳

查道字湛然歙州休甯人端拱初曹彬鎮徐州辟為從事深被

禮遇道性淳厚所在務寬恕

宋史本傳

梁鼎字凝正華陽人至道中知徐州居官峻厲名稱甚茂

宋史本傳

戚綸字仲言應天楚邨人大中祥符中知徐州綸善談名理雖至清顯不改其純儉既歿家無餘貲

宋史本傳

陳興澶州衛南人景德三年以本州團練使知徐州興起行伍

有武畧所至頗著聲績

宋史本傳

張亢字公壽家於臨濮歷官至徐州總管馭軍嚴明所至有風迹民圖像祀之亢兄奎以龍圖閣直學士知徐州治身有法度

風力精強所至有治跡吏不敢欺兄弟皆知名一時

宋史本傳

王臻字及之汝陰人景德中以大理評事通判徐州性剛嚴善

宦績傳

司台余川府志卷第二十一

七



決事所至有風迹

宋史本傳

吳元裒字君華太原人尚太宗女蔡國公主大中祥符初以檢校太傅知徐州四年卒於官元裒性謹讓在藩鎮有憂民心待賓佐以禮真宗於帝婿中獨稱其賢

宋史吳延祚傳

王德用字元輔趙州人仁宗時武甯軍節度使徐州大都督府長史德用善射知軍中情偽善以恩撫下故多得士心名聞四

夷婦孺皆呼黑王相公

宋史王超附傳

孔道輔字原魯宣聖四十五代孫天聖中知徐州明道二年由右諫議大夫再知徐州道輔性鯁挺特達天下莫不以直道許之仁宗思其忠特贈尚書工部侍郎

宋史本傳

梁適字仲賢東平人知淮陽軍奏減京東豫買紬百三十萬又

論景祐赦書不當錄朱梁後仁宗記其名

宋史本傳

程珣字伯溫河南人慶厯初知沛縣會久雨平地大水穀既不登晚種不入珣謂俟可種而耕則時已過矣募富民捐菽數千石以貸農使布之水中水未盡涸而甲已露矣是年遂不艱食有句於市者自稱僧伽之弟愚民爭遺金錢珣杖而出之境

宋子

文集

趙及字希之偃師人仁宗時以侍御史知徐州後又以右諫議大夫知徐州及和厚謙退內行尤篤所治有聲民吏愛之

宋史本傳

徐起字豫之濮州鄆城人仁宗時知徐州就為轉運使募富室得米十七萬斛賑餓殍又移粟以贍河北京西者凡三百萬

宋史

本傳  
宦績傳



王洙字原叔應天宋城人皇祐初知徐州時京東饑朝廷議塞商胡河賦榷薪輸半而罷塞洙命更其餘爲穀粟誘願輸者以舖流民因募其壯者爲兵得千餘人盜賊衰息有司上其最爲

京東第一

宋史本傳

孫沔字元規會稽人京東多盜乃以知徐州明購賞嚴誅罰盜

遂止

宋史本傳

呂溱字濟叔揚州人嘉祐中以侍讀學士知徐州性開敏善折

獄尋徙知成德軍

宋史本傳

關景仁字彥長會稽人

一作錢唐

治平二年知豐縣政尙清簡與民

休息嘗改作鳧鷖亭賦詩記之仁愛之意藹然見於辭祀名宦

豐縣志

韓贄字獻臣齊州長山人熙甯中知徐州贄性行淑均自奉至

約政簡而治以吏部侍郎致仕

宋史本傳

傅堯俞字欽之濟源人熙甯時知徐州以論新法忤執政請提

舉崇福宮尋坐事削官徐前守侵用公錢堯俞至爲償之未足

而去後守移文堯俞使償久之考實非堯俞所用卒不辯司馬

光嘗謂邵雍曰清直勇之德人所難兼吾於欽之見焉雍曰欽

之清而不耀直而不激勇而能溫是爲難爾

宋史本傳

趙槩字叔平虞城人熙甯初拜觀文殿學士知徐州槩秉心和

平與人無怨怒雖在事如不言然陰以利物者不少

宋史本傳

蘇軾字子瞻眉山人熙甯末知徐州時河決滙於城下漲不得

洩城將敗富民爭出避水軾曰富民出民皆動搖吾誰與守吾

宦績傳

司台徐州府志卷第二十一上

七



在是水決不能敗城驅使復入詣武衛營呼卒長曰河將害城  
 事急矣雖禁軍且為我盡力卒長曰太守猶不避塗潦吾儕小  
 人當效命率其徒持畚插以出築東南長堤首起戲馬臺屬於  
 城雨日夜不止城不沈者三版軾廬於城上過家不入使官吏  
 分堵以守卒全其城復請調來歲夫增築故城為木岸以虞水  
 之再至朝廷從之宋史本傳節錄蘇軾上神宗皇帝書臣以庸  
材備員州府出守兩郡皆東方要地私竊以  
 為守法令治文書赴期會不足以報塞萬一輒伏思念東方之  
 要務陛下之所宜知者得其一二章具以聞而陛下擇焉臣前  
 任密州所建言自古河北與中原離合常係社稷存亡而京東  
 之地所以灌輸河北併竭則壘趾唇亡則齒寒而其民喜為盜  
 賊為害最甚因為陛下畫所以待盜賊之策及移守徐州觀覽  
 山川之形勢察其風俗之所移而考之於載籍然後又知徐州  
 為南北之襟要而京東諸郡安危所寄也昔項羽入關既燒咸  
 陽而東歸則都彭城夫以羽之雄畧舍咸陽而取彭城則彭城  
 之險固形便足以得志於諸侯者可知矣臣觀其地三面被山  
 獨其西平川數百里西走梁宋使楚人開關而延敵材官驍發

突騎雲從真若屋上建瓴水也地宜菽麥一熟而飽數歲其城  
 三面阻水樓櫓之下以沐泗為池獨其南可通車馬而戲馬臺  
 在焉其高十仞廣袤百步若用武之世屯千人其上聚櫺木炮  
 石凡戰守之具以與城相表裏而積三千糧於城中雖用十萬  
 人不凡戰守之具其民皆長大膽力絕人喜為剽掠小不適意則有  
 飛揚跋扈之心非止為暴而已漢高祖沛人也項羽宿遷人也  
 劉裕彭城人也朱全忠礪山人也皆在今徐州數百里間耳其  
 人以此自負雄傑之氣積以成俗魏太武以三十萬眾攻彭城  
 不能下而智興以卒伍庸材恣睢於徐朝廷亦不能討豈非以  
 其地形便利人卒勇悍故耶州之東北方六十里即利國監自  
 古為鐵冶商賈所聚其民富樂凡三十六治治戶皆大家藏鏹  
 巨萬常為盜賊所窺而兵衛寡弱有同兒戲臣中夜以思即為  
 寒心使劇盜致死者十餘人白晝入市則守者皆棄而走耳地  
 既產精鐵而民皆善鍛散治戶之財以嘯召無賴則烏合之眾  
 數千人之仗可以一夕具也順流南下辰發已至而徐有不守  
 之憂矣使不幸而賊有過人之材如呂布劉備之徒得徐而逞  
 其志則京東之安危未可知也近者河北轉運司奏乞禁止利  
 國監鐵不許入河北朝廷從之昔楚人忌弓不能忘楚孔子猶  
 小之况天下一家東北朝廷從之昔楚人忌弓不能忘楚孔子猶  
 隘乎自鐵不北行治戶皆有失業之憂詰臣面訴者數矣臣欲  
 因此以徵冶戶為利國監之翰屏今三十六治治各百餘里人  
 採礦伐炭多飢寒亡命疆力驚忍之民也臣欲使治戶每冶各  
 宦績傳



擇有材守而忠謹者保任十人籍其名於官授以劍及刀槊教  
之擊刺每月兩班集於知監之廷而閱試之藏其及於官以待  
大盜不得役使犯者以違制論治戶為盜所擬久矣民皆知之  
使治出人自衛民所樂也而官又為除近日之禁使鐵得北  
樓櫓敵惡又城大而兵少緩急不可守今戰兵千人耳臣欲乞  
移南京新招騎射兩指揮於徐此故徐人也嘗屯於徐營壘材  
石既具矣而遷於南京異時轉運使分東西路畏餽餉之勞而  
移之西耳今兩路為一其去來無所損益而足以為徐之重城  
下數里頗產精石無窮而奉化廂軍見闕數百人臣願募石工  
以足之不聽差不出使此數百人者常採石以鑿城數年之後  
舉為金湯之固要使利國監不可窺則徐無事徐無事則京東  
無虞矣沂州山谷重阻為逋逃淵藪盜賊每入徐州界中陛下  
若採臣言不以臣為不肖願復三年守徐且得兼領沂州兵甲  
巡檢公事必有以自效京東惡盜多出逃軍逃軍為盜民則望  
風畏之何也技精而法重也技精則難敵法重則致死其勢然  
也自陛下置將官修軍政士皆精銳而不免於逃者臣常考其  
所由蓋自近歲以來部送罪人配軍者皆不使役人而皆使禁  
軍軍士當部送者受牒即行往反常不下十日道路之費非取  
息錢不能辦百姓畏法不敢貸亦不可復得惟所部將校乃  
敢出息錢與之歸而刻其糧賜以故上下相持軍政不修博奕  
飲酒無所不至窮苦無聊則逃去為盜臣自至徐即取不係省

錢百餘千別儲之當部送者量遠近裁取以三月刻納不取其  
息將吏有敢貸息錢者痛以法治之然後嚴軍政禁酒博比期  
年士卒皆飽暖練熟技藝等第為諸郡之冠陛下遣使按閱  
所具見也臣願下其法諸郡推此行之則軍政修而逃者衰亦  
去盜之一端也臣聞之漢相王嘉曰孝文帝時二千石長吏安  
官樂職上下相望莫有苟且之意其後稍稍變易公卿以下轉  
相促急司隸部刺史發揚陰私吏或居官數月而退二千石益  
輕賤吏民慢易之知其易危小失意則有離畔之心前山陽  
徒蘇合縱橫吏士臨難莫肯有仗節義者以守相威權素奪故  
也國家有急取辦於二千石二千石尊義者以守相威權素奪故  
嘉之言而考之於今郡守之威權可謂素奪矣上有監司伺其  
過失下有吏民持其長短未及按問而差替之命已下矣欲督  
捕盜賊法外求一錢以使人且不可得盜賊克人情重而法輕  
者守臣輒配流之則使所在法司復按其狀劾以失入惴惴如  
此何以得吏士死力而破奸人之黨乎由此觀之盜賊所以滋  
熾者以陛下守臣權太重也臣願陛下稍重其權責以大綱  
畧其小過凡京東多盜之郡自青鄆以及徐沂齊曹之類皆慎  
擇守臣聽法外處置強盜頗賜緡錢使得以酒子之敵以為他  
牙然緡錢多則難常少又不足於用臣以為每郡可歲別給一  
坐賊論賞格之外歲得酒捕盜賊得以酒子之敵以為他  
數百斛亦足以使人矣

宦績傳

司台余川守志卷第二十一上

完



孫覺字莘老高郵人元豐中知徐州徐多盜捕得殺人者五其一僅勝衣疑而訊之曰我耕於野與甲遇彊以梃與我半夜挾我東使候諸門不知其他也問吏法何如曰死覺止誅其首後

遂為例宋史本傳

李昭玘字成季濟南人少與晁補之齊名為蘇軾所知登進士

第徐州教授守孫覺深禮之每從容講學及古人行已處世之

要相得歡甚用李清臣薦為秘書省正字宋史本傳

楊時字中立將樂人元豐末為徐州司法叅軍名臣言行錄

陳師錫字伯儵建陽人元豐末官監察御史為用事者所忌出

知宿遷縣元祐初蘇軾三上章薦其學術淵源行已潔素議論

剛正器識靖深德行追蹤於古人文章冠絕於當世乃入為秘

書省校書郎宋史本傳

馬默字處厚單州城武人哲宗時知徐州屬城利國監苦吳居

厚之虐默皆革之後以寶文閣待制復知徐州宋史本傳

馬建中單縣人令豐民安其政有和鳧鷺亭詩傳於時又有韓

侯淄川人令豐博雅好古士民欽之皆祀名宦豐縣志

彭汝礪字器資鄱陽人元祐中為中書舍人汝礪言動取舍必

合於義以論蔡確事落職知徐州宋史本傳

杜純字聖錫郵城人以蔭入仕范純仁韓維王存孫承交薦之

司馬光稱其議論詳盡元祐間以右司郎中知徐州宋史本傳

曾肇字子開南豐人元祐七年自吏部侍郎出知徐州更十一

州類多善政宋史曾肇傳

宦績傳

司台徐州府志卷二十一



張愔紹聖三年知蕭縣行峻言直不畏彊禦鑿汜水新渠民免

水患歿祀名宦舊蕭縣志

舊府志

田畫字承君陽翟人建中靖國初知淮陽軍歲大疫日挾醫問

病者藥之遇疾卒淮陽人祀以為土神宋史鄒浩傳

孫文紹聖五年為蕭令政通人和又有梅某嘉祐三年以尚書

虞部員外郎知縣事嘗作清心亭曾南豐為之記舊蕭縣志

米芾字元章吳人徽宗時由禮部員外郎出知淮陽軍用文雅

為治尚禮教祛淫祀秩滿歸橐蕭然遇風舟危作詩矢諸神風

頓止江南通志

王復以龍圖閣待制知徐州建炎三年金人自襲慶引兵圍徐

復與男倚同守城率軍民力戰外援不至城陷復坐廳事語粘

罕曰死守者我也監郡而次無豫願殺我而舍僚佐百姓粘罕

欲降之復嫚罵求死闔門百口皆被殺獨一子佾先去武衛都

虞侯趙立奪門出夜半殺守者入城求復屍瘞之事聞贈復資

政殿學士諡壯節趙立奏為復建廟楚州號忠烈同時教授鄭

褒巡檢楊彭年皆以罵敵死宋史趙立傳

王之才宣和中為豐縣主簿民稱為王清水豐縣志

李寬建炎三年守淮陽城破寬死於敕書樓大金國志宋史高宗紀云金兵執淮

陽守臣

李寬

蕭仲宣本名野黑補遼人皇統間歷武甯節度使為政平易小

吏不敢為奸賄賂禁絕金史本傳

宦績傳

司台余川守志卷第二十一上

三



蒲查金宗室領猛安大定二年充邳州刺史知軍事蒲查性廉潔忠直臨事能斷凡被任使無不稱云

金史本傳

阿喜宗室子世襲猛安好學問聽訟明決人信而愛之察廉能

厯海邳二州刺史

金史本傳

紇石烈桓端西南路忽論宋割猛安人貞祐四年爲邳州刺史充徐州界都提控紅襖賊數萬攻邳州桓端破之於黃山賊復來追擊敗之賊圍沂州桓端率兵救擊殺萬餘人賊乃去樞密副使僕散安貞上其功進同知武甯軍節度興定二年代石蓋女魯歡權僉徐州行樞密院事後以疾召至京師卒

金史本傳

完顏仲德本名忽斜虎合懶路人宣宗時授邳州刺史增築城壁滙水環之州由是可守哀宗卽位同僉徐州行樞密院事徐

城東西北三面皆黃河而南獨平陸仲德壘石爲基增城之半復浚隍引水爲固民賴以安天興二年復以仲德行尙書省事於徐州總帥王德全反覆仲德誅之已奉詔赴行在議遷蔡國

亡赴汝水死

金史本傳

張特立字文舉曹州東明人正大中官監察御史當路者忌其直陰擠之左遷邳州軍士判官士論惜之

金史本傳

徒單益都以正大九年正月行尙書省事於徐州北兵守徐張益渡徐危甚益都籍民兵拒守北兵燒南關去旣復來襲坎南城而上守者皆散走益都不及甲率夜直兵三百由黃樓而南力戰禦敵軍勢稍振復奪張益渡取蕭縣破白塔戰於上山救被俘老幼五千還徐六月徐州兵亂益都挈妻子奔宿州駐城



南會宿人殺其節度請益都主帥府事益都不從曰吾國家舊人爲將帥亦久方逃罪不暇豈有改易髻髮奪人城池以降外

方乎即日率官吏行至穀孰東遇蒙古兵不屈死金史本傳

完顏賽不金始祖弟保活里之後有識略天興二年七月行尙

書省事於徐州未幾元帥郭恩召叛將郭野驢麻琮襲破徐州

賽不恐被執投河求死流三十餘步不沒軍士援出之又五日

自縊於州第又完顏兀論移刺長壽相繼來爲徐州元帥天興

元年先後與蒙古戰死金史本傳

張邦憲字政叔秦州人登正大中進士第爲永固令天興二年

避兵徐州會源州帥卓翼率兵至城邦憲被執將驅之北邦憲

罵曰我進士也蒙朝廷用爲邑長可從汝曹反耶遂遇害金史禹顯

傳

元

郭侃字仲和華州鄭縣人中統二年益都李壇及徐州總管李

杲哥俱反宋夏貴復來犯邊史天澤薦侃世祖召見問計賜尙

衣弓矢馳至徐斬杲哥夏貴焚廬舍徙軍民南去侃追貴過宿

遷縣奪軍民萬餘人而還賜金符爲徐邳二州總管侃行軍有

紀律野爨露宿雖風雨不入民舍所至興學課農吏民畏服元史

郭寶玉傳

伯岳斛蒙古人家於鄆至元中爲豐縣達魯花赤剛正嚴明忠

誠廉幹門無私謁吏絕侵漁舊志

三寶住至正辛丑進士性廉介所至搏貪猾無所貸以江浙行

宦績傳

司台徐州府志卷第二十一上

三



省郎中為徐州兵馬司指揮舊志

耶律廷瑞至元中為蕭縣尹改建學宮士風一振江南通志

馬徹里西夏人大德中監蕭縣有捍水患功舊志

完哲篤字仲玉至正中監蕭縣政簡賦平吏畏民懷行部所至

一飯必酬其直江南通志

楊泰大德十一年為碭山縣尹加意庠序勸課農桑政教兼舉

民懷其德江南通志

曹簡字士廉沂州人大德中豐縣主簿有德政舊志

劉士保定人至正十年為豐縣尹廉慎稱職舊志

郭瑄字廷玉至正五年為豐縣尹沉毅有為凡有大興作皆不

動聲色人爭趨之江南通志

王宗舉元末為豐尉時值兵亂據守全城民賴以安豐縣志

趙野字子開濟南人大德初為沛縣尹勸農興學政平訟理人

多稱之有去思碑南畿志

馬珪字君章兗州人至元中沛縣尹為政循良頗有古風民思

之不念為立去思碑明一統志

李茂字庭實德州齊河人沛尉有美政邑人為立碑舊志元虞集沛縣尉

李君美政記沛人有尉善其職其父老愛之願列姓名于石以示遠久國子生張復邑人也疏其邑人之頌云舟車衝衝出我

沛邦我任我載唯尉之從力用不窮歲饑有盜尉制之有道田則有蝗尉除之有方泗漢患水防隄善地尉將役人如視妻子

民有無告尉繕其屋有繫在獄尉哺之粟顧瞻學宮乃歸乃塘釋其弓刀揖遜有容復之言曰尉嘗學于濟南李昌道先生故

知愛人之說其父奉使平陽罹地震之禍尉以恩得官故能感

世之豪民狂吏以動搖劫持為能視一秩滿尉何有此乃以終



同治徐州府志卷第二十一  
愛聞不亦善夫使尉益自勵所至不倦雖古循吏何以過之有  
司用材者能無效於斯乎尉姓李名茂字廷實德州齊河人初  
為濮州觀城尉遷沛尉父老曰張仲昂

楊溫大德間知邳州有惠政繼之者為吳文德亦有遺愛舊志淮安

府志

魯呂曲丁或作魯曲呂丁赤不利金俱大德間邳州達魯花赤以廉能

稱舊志

苗澤懷慶人大德六年知睢甯縣有幹濟才勸耕興學歲饑建

言宜蠲賦賑給河水衝決置大舟以濟民涉南畿志

代理徐州府學教授丁鎮瀛校

同治徐州府志卷第二十一下

宦績傳

明

汪舜民婺源人正德初以山東副使按徐廉介剛正威惠並著  
屬吏無敢侵漁部下者值歲饑多方拯救仍請巡撫發粟以賑  
全活萬餘人祀名宦

余祐字子積江西鄱陽人正德中為徐州兵備副使中官王敬  
進鮮多挾商船與知州樊準指揮王良詬良發其違禁物敬懼  
詣祐求解祐不聽敬誣奏準等毆已遂并逮祐謫南甯府同知  
李珏字廷重開州人正德末任兵備副使性敏決案無稽贖山  
東賊王堂掠及豐沛珏調健卒拒之旗幟以李兵為號賊大敗

宦績傳

同治徐州府志卷第二十一下



遁去山東河南官兵剿捕者皆假其旗號賊望見輒走其威望如此

何鼇字子魚廣東順德人嘉靖九年爲徐州兵備副使州有驛館夫役久爲民病鼇議罷其役歲省民財以萬計

楊宜衡水人嘉靖中爲徐州兵備副使汰冗役八百餘人諸不便於民者皆除之時鄉試屆期集諸生於書院聘名士第其文藝又併商稅修浮橋辨疑獄居五月遷河南叅政去

徐節山西臨汾人嘉靖中爲徐州兵備副使故事驛馬辦自富室分給各驛守者多不加護惜芻牧役使每不均斃則仍責富室補償最爲民病節酌定上中下之直聽各驛自買尤嚴差役之序民多稱便罷石山驛開新河皆節主其議

劉經縉江西進賢人隆慶二年爲徐州兵備副使才識精敏狷介絕俗威惠並行每蒞學與諸生講論皆根極理要徐人士佩服之以艱去行李蕭然屬吏以贖鍰助之固辭不受

馮敏功浙江平湖人隆慶三年爲徐州兵備副使時黃河大決民多不相保敏功力請賑之諸賦役不便於民者一切停罷督理河務往來洪波中未嘗憚勞尋遷山東叅政士民建祠祀之舒應龍廣西全州人萬厯初爲徐州兵備副使潔已愛人作興士類黃河決溢屢侵州城應龍與知州劉順之度地量財周城築隄以捍衛復延名人纂修州志士民爲建祠

陳文燧江西臨川人萬厯十七年爲徐州兵備副使爲政持大體朔望必詣學與諸生講論庚寅辛卯連年大水城市以舟交



燧相地城南鑿支河以洩城中積水至今賴之

袁應泰字大來鳳翔人萬曆末爲淮徐兵備叅議山東大饑設粥廠哺流民繕城濬濠修先聖廟饑者盡得食更搜額外稅及漕折馬價數萬金先後發賑戶部劾其擅移官廩時已遷副使遂移疾歸祀名宦

趙謙山西忻州人天啓三年任徐州兵備副使丰標俊整志擊强豪不少避以直忤俗僅再閱月卽掛冠去其志竟未伸云

徐標山東濟甯人崇禎六年爲徐州兵備叅政整飭屬僚訓課諸生河決常山數十里力塞之流賊至率將吏晝夜城守賊西走遣將追至馬家林俘馘而還以憂去祀名宦

何騰蛟浙江山陰人崇禎十五年爲淮徐兵備僉事時徐境土

寇蜂起張方造王道善分掠豐沛程繼孔踞蕭之饒山四出焚劫騰蛟至卽率兵渡河攻剿以次皆平以繼孔本蕭民與他盜異單騎抵其巢諭降之明年冬擢巡撫湖廣

郭昇字騰霄潁州人天順間以工部主事督徐州洪洪舊與呂梁同稱最險歲壞舟常百數昇相要害募人盡鑿去其石水勢遂平擢郎中仍泄洪事後民於洪上立祠祀之一統志

杜謙字益之昌黎人景泰間以工部主事分司徐呂二洪鑿治洪石舟賴以濟山東淮北饑流民號呼乞食謙勸賑糜粥全活甚衆行水金鑑引杜公墓志

高貫字曾睢江陰人宏治間爲都水主事分治三沽諸閘釐正蕭碭豐沛歲役夫修昭陽湖隄及沽頭南北隄濟漕便民爲河



渠重者三年

行水金鑑引邵寶高君墓志

吳嶽字汝喬汶上人嘉靖中以戶部主事督徐倉清操絕俗於利秋毫無染待人坦易時進諸生講學嘗建躡雲亭於學宮之北以增勝槩既去人皆思之

何源江西廣昌人嘉靖中以工部主事任呂梁洪分司端凝介直遇事剖析無滯御下未嘗少假辭色洪民有武斷者繩以法無貸風裁凜然

姚體信浙江平湖人嘉靖四十年由進士任工部督徐州洪事夷曠平易與人不設機防人有片善輒敬愛之相接諸執事嘗屈己推誠時謂其元風高節不愧古人

朱光字河南祥符人隆慶中以戶部主事督徐倉才識精明搜剔積弊殆盡雅尚儉約崇儒重道先是學圯於水形家嘗以永福倉地爲利光字慨然卽易爲學諸生因建祠學內與翁大立馮敏功章世禎劉順之並祀

鄭繼之湖廣襄陽人萬曆初爲戶部分司主事性至明敏人不敢欺事亦無畱難關津商民交口頌之其廉介之操纖塵不污人方之吳介蕭嶽後仕至吏部尙書

奈毅中銅陵人萬曆四年以主事分司呂梁洪毅中少有清望在官興利革弊商民德之性嗜學讀書每至達旦竟以勤致疾卒於官副使莫與齊爲祠鳳冠山以祀焉

姜士昌丹陽人萬曆十年以戶部主事管徐州倉時方弱冠洞燭利弊老吏不及胥吏畏若神明恤軍惠商羨餘萬金悉以贍



州帑尤謙恭下士加意學校及去士民爲立碑

梅守相字台甫宣城人萬厯中授工部主事分司夏鎮自劉東星開浚韓家莊至李化龍鑿泃河皆守相爲之佐理身歷塗潦冒艱險九載績成有功漕河不亞於二公

陸檄字羽行長洲人萬厯間以工部主事分司夏鎮以隄東水以水滌沙疏濬啟閉皆親自經畫功績甚偉進秩郎中

王命禹浙江蕭山人萬厯三十九年以工部郎中分司呂梁洪御下嚴而內寬厚立社課諸生文藝四方至者甚多河決狼矢溝命禹露處河干晝夜督役逮功竟未嘗輕笞一人以憂去士民懷之

宋統殷山東卽墨人萬厯四十四年爲戶部分司主事政崇大

體商民懷惠接士子以禮尋遷淮安知府

郭長發福建惠安人天啟二年任戶部分司主事性仁厚爲政務崇寬大惠商恤民作典士類人多頌之

張璇高邑人天啟四年爲戶部分司主事才識明練商民多被其澤時黃河暴漲璇於六月二日促裝移戲馬臺之聚奎堂是夜河決城陷獨璇典守無失人皆服其先見因築垣修宇遂爲署焉鑿義井修放鶴亭衆爲立碑建祠

唐鍊字純之由進士知縣擢工部主事管呂梁洪預築鯉魚山缺口省帑金萬餘徐境得無衝潰以才能改御史萬厯間復兵備徐州亦有惠政

聶雲翹直隸曲周人天啟七年以工部郎中分司呂梁洪甚得



同治徐州府志卷第二十一 五  
士民心解任歸舟次新安湖中有羣盜駕小船數十向之左右  
皆驚賊眾曰爾無畏我眾來爲百姓叩謝使君耳乃各叩首以  
去

史啟元字蓋卿江都人進士督徐州倉務以廉幹稱

文景宗合肥人洪武初自婺源州同知來知徐州事廉介有守  
時天下初定民多流離景宗招徠賑貸勸督農桑民以安集歷  
任久創建州治壇廟學校民不勞而事集遷濟南知府去祀名  
宦

劉秩字伯敘豐城人吳元年由內翰典籤檢閱經史官出爲徐  
州同知文章政事皆見稱當時與知州文景宗協力修政尋詔  
入議大禮遷崇明知州民爲立生祠祀名宦

楊節仲湖廣樊城人洪武末以薦舉知徐州爲政一以厚風俗  
爲務州大疫遣醫四出療治躬自督視貧者則捐俸給之喜獎  
拔士類在任六年政化大洽擢大理知府去祀名宦

楊秘山西遼州人宣德四年知徐州多惠政得民心州中公署  
廟學悉爲改置秩滿當代屬邑民乞留詔增秩復任先後凡十  
八年民迄今頌之不衰祀名宦

宋誠字彥實湖廣蘄州人景泰中由劍州知州改知徐州時方  
饑疫與巡撫王竑協力共濟多方賑救往吏多怠玩廢事誠繩  
督弗少假借凡公署廟學次第葺治政暇修纂州志政務具舉  
吏民畏服遷敘州知府去祀名宦

王敘字大倫臨汾人天順中知徐州廉節自持涖政嚴明廢墜

宦績傳

同治徐州府志卷第二十一 下

六



多所修舉遷慶遠知府去祀名宦

陳廷璉字宗器湖廣攸縣人成化中以進士知徐州才識通敏爲政散勸風俗宏獎士類遷南京刑部員外郎去

和鸞字廷瑞山西平定人成化中知徐州性鯁介廉儉自持遇事不爲遷就監司初不悅久之轉加敬信軍衛事赴訴者皆獲平反在任八年深得民心遷襄陽守去祀名宦

樊準南昌人正德中知徐州廉介彊立不畏權勢政務節省先是中貴督廣運倉儲左右恣肆莫敢誰何準至一以法繩之無敢犯者會進鮮中使橫索驛遞供應不貲準廉得其所挾私物裁抑之尋被誣逮繫老幼號泣隨送者幾萬人抵京事白得調任歷官山東按察僉事

張淮字本豫義勇前衛人正德中知徐州時駕南幸百姓惶懼咸思竄匿淮與判官董相慰安之經畫供億秋毫不以擾民時服其才

王重賢交河人先爲御史以言事落職嘉靖中再遷知徐州初州以里胥分直供應豪猾緣以培剋重賢至革之改用贖金以亭老司其出入民間始無擾累有州佐恃結納贖貨重賢因考察入京白吏部罷之遷東昌府同知

孫光浙江蕭山人嘉靖中知州事性謹厚仁慈約己愛民痛裁冗濫里甲徭役悉爲更定民獲安息焉

劉順之廣西馬平人隆慶六年知徐州廉介精明善剖煩劇徐頻年被水爲築張村站隄塞房村決口創築護城隄遍歷郊野



問民疾苦請賑恤之力行條鞭法裁定賦役學宮新遷日爲臨  
視以底於成歲旱禱雨輒應火延燒城樓望拜卽滅居四年百  
度具飭遷瓊州府同知百姓爭乞畱不得後上官疏畱爲淮安  
同知徐人懷其德常往謁之

章世禎字克昌餘千人嘉靖間舉人由知德州移判徐州尋爲  
六合令治行第一復知徐州以治河奏功晉秩致仕

孫養魁直隸容城人萬曆四年知徐州以寬大得民心在任凡  
十年

唐民敏廣西全州人萬曆十四年知徐州州錢糧頻年爲奸胥  
上下其手緣是甲乙不均民敏清審釐正宿弊盡除百姓大悅  
以不阿上官左遷去士民懷之

劉萃洛陽人萬曆二十一年知徐州操守最堅後被白簡未行  
有奸民盜府庫者潛置數百金於中堂案上求脫重譴萃出見  
之大怒隨以金白兩臺正其罪其不以去位易操如此嗣守曾  
士毅四川巴縣舉人其罪徹賈事亦類此人謂先後繼美云  
徐鄰浙江上虞人萬曆三十年知徐州愛民禮士性至勤未旦  
卽起視事一郡稱治遷保定府同知祀名宦

夏崇謙湖廣京山人萬曆三十三年知徐州坦易明敏判斷如  
流無所撓枉尤注意學校多所培植在任四年考最加秩以病  
去士民攀送百里外爲棠風亭於雲龍山設石主祀之

張正綱福建晉江人萬曆四十年知州事沉靜練達不動聲色  
而事治民安待士子隆重有禮修城建學不憚勞費士民頌之



傳惟翼四川富順人萬曆四十五年以邳州知州遷徐州爲政簡要凡可因者因之不可者務與衆參酌而後去在任四載賦平役省時有四野不識胥吏一州不知有官之謠循良爲一時之冠

沈同和字尙中烏程人成化中同知州事清介有守臨民不縱不苛在任九年遷州守去

王之葵撫甯人由明經任徐州判智明膽決不肯阿徇當流寇之亂州牧自焚之葵亦堅求自盡士民力救得免以徐水陸要衝憲司勉以代篆視事三載撫恤瘡痍安輯流離民得復業一時賴之

項情江西德興人嘉靖中爲徐州判官潔己愛民未嘗苟取嘗

以秋冬久旱徒跣爲民祈雪雪大降人以爲精誠所感

吳嘉言湖廣漢陽人崇禎二年爲河務同知駐徐州以廉潔稱馬良崑山人洪武初以薦舉授徐州衛知事明習法令糾繩軍政上下咸服嘗與指揮蔡祥協建衛治後擢德慶府同知其孫紀遂占籍於徐

趙燹字秉衷虹縣人其父兄皆以忠死燹由永平衛指揮僉事遷徐州衛指揮使永樂十三年鎮徐州政令嚴明居心平恕官軍咸畏愛之

應廣平浙江黃巖人成化中爲州學正端慤不苟善立教規胡崇易四川墊江人正德中爲州學正動履端肅率人必以矩矱迄今傳其遺風



張德瑄福建侯官人景泰中爲州學正守正不阿或懷百金求爲請託輒麾去多士敬服有司重之

宋驥餘姚人周易番禺人袁堯臣江陰人皆爲徐州學正有志操勤於教誨必以行誼爲先

陳璽福建福清人萬曆五年爲州學正性嚴正人不敢干以私上官皆敬禮之當時推學官之賢者必曰陳先生擢翰林孔目卒於官

何懋基字仲修武進人性孝友選徐州學正俗好爭競基諭以禮義廉恥人多化之

張涪孝感人天啓三年署州學正嗜學不倦立教本諸躬行王登哲柏鄉人天啓三年任學訓性方正醇誠有古人風教士

以敦行爲先居官七載悉却貧生之饋直指薦之以艱去

林維傑廣東番禺人以舉人署教事天資近道啟迪不倦或有餽遺多却不受甫三月以憂去諸生垂涕送之

雷永祚潛山人崇禎五年任州學正性至孝植行方正不阿於俗教士先行後文修學官明倫堂至嚴整未幾以憂去多士懷之

朱夢弼浙江秀水人崇禎十三年爲州學正博學工翰墨持身清正上官敬禮之使署徐屬河防又署戶部事皆有清節惠政

以上  
徐州

汪致道字成德徽州黟縣人洪武初知蕭縣兵燹後致道盡心招撫民祿負歸耕庶務咸理治爲諸邑最

宦績傳



鄭恕浙江仙居人建文時知蕭縣燕將王聰破蕭恕不屈死籍其家二女當配亦死之祀名宦

郝玘山西吉州人初由賢良方正任邯鄲令調知碭山所至政教修明民懷其惠鄰邑皆稱慕之以憂去永樂初服闋謁選京師蕭父老乞爲蕭令從之治績視碭益著邑人請祀名宦子孫因占籍於蕭

閉悌廣西橫州人成化中左遷蕭縣丞律已厚下民德之請爲令尋遷韶州府同知祀名宦

馮裕臨朐人正德三年知蕭縣歲饑發廩以賑仍日煮豆粥三百釜食之又撫流移墾荒田補助不給邑人依若慈母祀名宦王隆鄆城人嘉靖中知蕭縣山東羣盜剽掠郡縣人情洶懼隆

爲營緝城守民賴以安又改建文廟作新人才遷安慶府通判去士民思之祀名宦

孫重光山東海豐人嘉靖十六年知蕭縣廉介剛正倜儻有爲蕭苦田賦不均重光履畝步量緣地起稅境內翕然稱平後遷知州

唐文華河南懷慶衛人隆慶三年以曹縣教諭遷知蕭縣敷政慈祥與民休息持已端嚴操守廉潔懲治奸蠹境內帖然蕭人立祠祀之有去思碑記

宋煇江西豐城人萬曆二年知蕭縣外嚴內慈勤民愛士操守耿潔吏民敬畏歷二載以憂去歸裝蕭然不啻寒素

梁樞江西宜春人萬曆九年知蕭縣首革庫貯糴夫代補洪閘



等役銀六千餘兩立鄉約教民蕭人德之

王衮山東陽穀人萬曆十一年知蕭縣聽斷精明數年強豪屏

跡百廢皆興上官薦凡七上以憂去邑人頌德立碑於三仙臺

山明彭縉王侯德政碑記明定鼎初蕭尚為蕃衍之區迨正德

尤甚今上之五年丁丑夏復遭崩城之慘夷廬侵畝害難殫述

於是播遷新治而昔之河渠淤墊一望皆湖水蕩漾矣民苦之

癸未夏值仲山王侯以東魯魏科來牧茲邑目擊時艱欲經理

之顧民力未克有濟閱二年許乃揚然諭眾曰今不治終為廢

縣速鳩我工我其有事於渠道遂聞之當路與厥工首缺濬治

南土形浮緩姪村永堀四湖次及山西瓦子杜缺三坡次則疏

通兩河口綿巨龐家窩二十餘里俾各缺積水乃平復念及舊

治南北孔道三仙臺橋梁與夫楊家口七處決口彈力圖維為

經久之計侯且捐俸犒眾萬姓忻然荷鍤操畚樂效子來選邑

之廉能者得李遂縱鱗輩董率惟勤工竣邑父老張泮等僉感

侯之德請余言以勒諸石余惟禮有功德於民者加地進律能

禦災捍患者祠而祀之余侯濬河以救民田築堰以防泛濫修

途以便車馬建橋以免徒涉抑亦勛強扶弱百廢漸興計侯之

功信與古循良而並峙鐫而紀之永世其忘之耶是為志侯名

衮山東陽穀人領鄉薦

高進孝河南獲嘉人少事母以孝聞成進士萬曆十四年除蕭

令沉靜慈祥諸所聽決惟恐失當務為真懇時值儉歲盡心賑

恤所活無算閱二載大吏嘉其廉能調上海僅三月以憂去道

經於蕭士民泣送者踵相接焉

康煇山東武定州人萬曆十六年知蕭縣息訟省刑修學建署

葺城垣纂邑乘採辦壽工花石具有功績

臺存道山東諸城人萬曆二十年令蕭歲大饑請給民牛種截

畱漕米二千餘石以賑全活萬餘盡除里甲應官浮費立亭老

辦事里長止催鞭糧人皆稱便

劉夢熊山西沁州人萬曆三十五年知蕭縣事會大水築兩河

宦績傳

司台余川守志卷第二十一



口隄開常家樓黃河數十里一月報竣民不疲勞

管爲國浙江黃巖人萬曆四十一年任蕭令性嚴正疾惡如讐蠹吏驚民舉畏憚斂迹行鞭糧易知單民甚便之尤喜文士樂與諸生講課娓娓無倦色建羅星臺祀文宿刻幼學寶訓頒惠童蒙四門各立社學社師復其家各給官湖地二頃爲修脯資歷三載卒於官邑人士爲私祀焉

蕭學儼字耐士江西廬陵人萬曆四十六年令蕭政尙明察胥吏無敢欺隱奸民強族皆震懾改行捐俸募資改遷儒學及察院刊四體簡儀以教民

張鏡心字湛虛磁州人天啓四年知蕭縣訊鞫必盡其情里長苦丁糧繁費過多鏡心自爲解兌不以累民革除舖戶供應縣

西故有湖久涇疏通之得田千頃盡以予民調繁去蕭民爲立

生祠

陳會江福建莆田人天啓五年任歷任三年卒於官祀名宦

名宦

祠題名碑會江令蕭拊循勞來釐奸剔蠹稽尺籍議蠲賑所全活者

亡慮億計

李思誠陳侯喜兩碑

鄭繼僑江西九江人崇禎元年任蕭令時民俗好奢繼僑以廉約化之上官過境廉從擾民悉裁以法上官敬之每聽斷慈祥懇摯息訟甯人

袁國祥徐州人以胄監爲光祿署正改宛平令尋告養歸里崇禎末年蕭邑邱墟長令遁去民無所依閣部史可法以國祥素爲鄉里推重乃請授屯田通判委攝蕭縣事國祥至邑凡遺黎

宦績傳

同治徐州府志卷二十一

三



殘喘招徠而安輯之掩骼埋骼移粟就民以活垂斃一時賴以補苴云

歐陽安廬陵人永樂初以商水教諭徵修大典上章忤旨謫蕭縣訓導日進諸生論文講道由是蕭人始知向學宣德中卒官年九十六諸生追思倡明文學之功請祀名宦子孫遂家於蕭沈种雲南趙州人蕭蔚廣西馬平人皆以嘉靖間任蕭教諭課士有方樂與人言忠孝蔚復捐資葺學舍親課諸生

耿介元城人嘉靖三十七年由歲貢爲蕭訓導性純朴淡泊自甘課士先行誼而後文藝常捐俸以周士之貧者蕭人稱之祀名宦

姚應龍浙江慈谿人喻思敬江西上高人萬厯初爲蕭教諭教

士整肅清介有聲

胡廷用湖廣蘄州人楊邦泰廣西鬱林人宋道光山陽人張一翰山西翼城人江鯉河南汝甯人皆萬厯間蕭學官課士有法勵節操又有汝甯鄒仕普安蔣克顯江都彭承蓋皆司訓之良者也

吳曉通州人真純簡直勸勉諸生如訓子弟常出橐中資餉寒士張邦和遼東廣甯人醇雅有儒者風每遇事毅然直任魯汝亭江西南城人性廉直喜規人過然課士多所獎勵三人皆崇禎間蕭邑教諭

齊福東湖廣石首人洪武中爲蕭縣丞廉潔不苟臨事公平吏民畏服以最遷知嘉定祀名宦

宦績傳



劉世泰江西南城人嘉靖二十三年爲蕭丞政多仁愛邑人稱  
劉佛

王伯金浙江山陰人萬曆三十七年選蕭縣主簿器量豁達能  
任事時蕭有河務柳草之役伯金殫力區畫革除吏弊民若不  
知有其役者尋轉衛經歷

高應魁山陰人崇禎十四年授蕭主簿忼爽多智略時土寇蜂  
起輒芟人麥禾爲糧應魁隨宜捍之竟不敢犯國變棄官去又  
趙永福河南洛陽人萬曆五年以刑部司獄遷蕭邑主簿習諳  
刑法而性仁恕聽察盡心務在平反值縣境濬河往來督工徒  
步繭足官舍蕭然弗顧也後遷清豐丞去蕭人懷之

吳道中山西馬邑人嘉靖八年任蕭典史性寬平民感其德歷

九載終始如一

孟朝紀山東青城人嘉靖三十二年任蕭典史性清介是非必  
嚴辨雖上臺前能力爭聽斷明決不畏強禦人服其戇直

王階福建將樂人萬曆十六年以掾史爲蕭尉優於文學而持  
己剛方遇事平恕歷二載以從事河工擢睢甯主簿去

何希貞江西南昌人萬曆十八年爲蕭典史狀貌豐偉學優才  
裕諸所裁決仁恕寬平邑人悅服遷高郵州吏目

樓應登浙江諸暨人崇禎五年以曹掾任蕭尉操行伉直處事  
慈祥決斷能盡人情而不可干以私時邑多火災術家謂東山  
石剝琢過甚所致應登培築之火患遂息邑大旱禱雨應登取  
水龍潭炎暑烈日中徒步往返數十里翼日乃大雨章山盜剽



掠民財徒黨甚強悍應登率眾捕之躬擐甲胄不避矢石所討  
悉平

賈之騷山西平陽人崇禎十五年為碭營守備駐趙家園時盜  
賊充斥之騷年少善騎射每出剿臨陣先登從劉將軍破賊碭  
山戰最力及征蕭西南山賊以山徑盤屈失道後軍不及從猝  
與賊遇遂單騎突入其陣賊眾披靡所乘馬忽蹶之騷步戰手  
及數人賊圍益眾力戰死事聞贈奮勇將軍以上蕭縣  
劉伯吉宣德間知碭山縣以親喪去服除碭山民守闕下求再  
任吏部言新令在碭山已二年矣帝曰新者勝舊則民不復思  
今久而猶思其賢於新者可知矣遂易之

鄒旦江西樂安人正統間任碭山令重士愛民有古循吏風聲

稱藉甚改宜興令萬曆州志

杜釗直隸衡水人繼鄒旦為碭山令政善民益安之秩滿父老

借畱增秩還任萬曆州志祀名宦

張夢輔陝西澄城人成化中舉人知碭山事剛果有為百廢具

舉尤能弭盜四境晏然遷知潁州去南畿志祀名宦

胡希顏陝西乾州人宏治中由進士為碭山令其政大都類夢

輔頗尚嚴明風猷赫奕擢御史萬曆州志祀名宦

田禋河南祥符進士知碭山縣廉介不苟政務息民綽有聲績

擢御史萬曆州志祀名宦

李金字宣之江西豐城人正德中進士任碭山令性仁厚律已  
廉潔時盜賊猖獗悉心調度捍衛防守民賴以無恐後洪水衝

宦績傳

司台余州府志卷第二十一

六



決屹然保障遷兵部主事歷台州府知府舊志記名宦

劉陽字一舒江西安福人初從劉曉受經曉告以王守仁學遂往謁於贛州舉於鄉知碭山縣有惠政教民敦崇孝弟公餘輒引士民訓諭賢愚胥化俗多盜陽捕其首撲殺之奸民震懼邑苦河患乃齋沐七日率父老請禱河忽自疏者二十七里廟學公署多所修建徵授御史引疾歸父喪哀毀廬墓講學務實踐不尚虛寂明史王守仁傳江南通志卒記名宦

王紹元江西金谿人嘉靖中知碭山縣築隄三十里以捍決河招逋民給籽種民多復業又立均地三限等法清隱田之弊飛蝗蔽日禱於天得大雨蝗盡死擢御史碭人立祠祀之萬曆州志並

記名宦

季木浙江會稽舉人嘉靖中爲碭山令值歲饑賑卹多方全活甚衆河水衝潰復築隄衛城以免水患百姓德之遷贛州府同

知舊志

戴偉山東鄆城人爲碭令性剛介諳練敢爲復厚自標植篤中勿欺事交於前迎及而解有宜民善政七事上之監司報曰此法可永永行之也命鐫石於堂萬曆州志

王廷卿荆門州舉人知碭山事議減協濟開役諸費歲省七千餘金建書院課諸生置義田以資貧寒者碭素無志乘廷卿又創爲之薦贖凡七上萬曆二年入覲上問循良吏得二十五人廷卿與焉遣回時麥穗有四歧五歧六歧者人以爲善政之應明年擢戶部主事民範金像祀之江南通志舊志

宦績傳

同治徐州府志卷二十一

三



熊應祥金谿縣舉人爲碭山令政尙和緩而於邑中多所興作  
公署一新築隄禦河惠民尤德之

張汝霖清江舉人爲碭山令政平和不任刑罰於學宮尤多修  
葺

陳秉良東莞縣舉人知碭山縣政尙簡要有慈父之稱值歲饑  
煮粥賑濟全活甚衆重修邑志以遷去碭人懷之

蔡一熊字齊璜閩人宋端明裔也萬厯丙辰進士任碭山多實  
政碭濱大河洪水氾濫一熊百計捍禦河不爲害歲大旱一熊  
終日向城隍虔禱祝曰聖人且以六事自責此旱乃我之罪罪  
加於我勿苦我民祝畢甘霖大霑蝗飛蔽空民甚徬徨一熊復  
跪禱於天蝗輒他徙時雜役煩興事尙操切士民往往破產一

熊爲汰其煩冗與民休息性醅朴服御簡約風俗爲之一變旋  
以擢去士民留之不獲乃立生祠復肖像祀之

張兆璋惠安人任碭山養民也惠陬流賊殲渠魁民不忍其去  
易世璧字崑良雩都縣人崇禎元年恩貢任碭山有惠政

劉芳清苑縣人令碭山性敏捷有惠政官署墮堞多所修建葺  
月去人咸惜之

李春鯨北直開州舉人崇禎七年知碭山縣時值荒亂無藉之  
民乘間攘竊春鯨至翦寇頑邑大治被誣去邑民數百人千里  
擁從號泣辯冤事始白復建祠祀之

宋坤瀋陽人崇禎間令碭山時流寇方熾坤修城隍建樓櫓置  
礮其中日練兵守禦賊至命其兩女爲右翼城守營爲左翼開



門出戰追至河南界駱家集而還後賊大至又以計退之尋調去民感其德爲立生祠并祀其二女豐叢滑縣人爲縣簿多諳練嘗攝碭篆簡易不擾

江泰崇禎十三年爲碭山令時災異疊見餓殍接踵前令日夕征比丁糧民益苦之饑民羣起爲寇上官欲勦除之泰不忍請兵多方撫御民盡革鄉里安堵泰以過勞卒官百姓哀之罷市數日

黃溥廣西籐縣人董槐代州人王珠潁州人黃思齊宜興人劉朝孚順德人皆爲碭山教諭善立教操履方嚴

葉楚華松陽人徐天麟龍陽人嚴淮太和人胡一化鳳陽人爲碭山教諭博學有師法楚華入名宦

葉孝友婺源人爲碭山教諭不苟取與攝縣篆幾四旬金僅三十兩買學田以資寒素構魁星樓令多士肄業其中

謝廷諫亳州人爲教諭買柏槐二百餘株周值翼宮士有甘棠之思任訓導者賈夢鯉嶧縣人性豪爽任氣節魯蘭含山人真誠無僞未幾致仕去

劉承傑鄉里失攷明末爲邑教諭立品高潔善課士邑人化之甲申京都陷傑泣曰何以官爲卽封印掛冠去囊橐盡棄弗顧也時同城主簿王應昌典史胡晉錫皆有胆識值流寇至分城堅守能却敵聞傑行慕其義卽棄官同去邑人高之傳爲掛冠三雋云

陳應奇會稽人爲碭典史心仁恕適管河工夫役患疫應奇親



調湯藥多全活遷主簿去以上

曾本零都人曹仲簾鉛山人闕膺奉新人陳善弋陽人吳文光高安人五人皆隸籍江西爲豐令廉潔仁愛有聲績本膺善仲簾並祀名宦

鄺頤南海人以廉惠稱張泮鄞縣人大水壞民舍躬自巡撫民安其居眾甚德之皆任豐令

裴爵澤州人令豐六載公廉勤慎開積荒通商旅築隄以殺河勢均賦以恤民災高祿博興人爲豐令政簡約會黃水陷城祿徙眾華山斬茨以居出入鄉村問民疾苦張叔宣內江人繼高祿爲令廉潔嫺吏治李崇信潛江人爲豐令值邑遷華山未久殫心經畫曠墜畢舉四人皆祀名宦

任惟賢黃陂人由舉人任豐少績學明易禮二經有幹略築新隄崇節孝抑奸貪雪幽滯緩征薄歛與民休息坐堂皇不設門隸任其自投告行之三月一邑帖然去之日老幼數千攀轅號泣立碑志之

莊誠成都人由舉人任豐錢糧先給清單能剖疑獄開涵洞洩水城無積潦建社倉設文課皆時政所未及者費思箴荆門州人豐城易土爲磚自思箴始孫延掖縣人悃悞無華秋糧舊有陋規延悉裁革起常平倉三所貯穀豆五百石備賑後擢任刑部卽值邑歲荒移文散濟如在任時

李先春延慶州人爲豐令剛毅有幹局時權法行有瑞踞徐州橫甚左右緣爲奸屬內苦之豐獨晏然

宦績傳



戴一松儀封人以五河令調任豐值河決朱旺口民多蕩析一  
松加意拊循節減馬遞夫役歲省二千餘金核正丁地以均錢  
糧奸吏不得任意增減

熊應祥內江人愛民以誠禱雨輒應孔道源錢塘人涪朴廉介  
新祠宇修邑志未嘗病民二人皆豐令有去思碑

常思溫明練敏決人不能欺午溝有水賊爲害思溫盡殲之於  
學宮尤加意焉王三益講學說書不屑屑於簿書而縣事自理  
二人皆河南永城人爲豐令者

宋士中爲豐令崇尚德化不爲苛急而應變銷萌迅若發機天  
啓二年山東妖賊破鄒滕陷夏鎮邑人震恐士中浚城隍督鄉  
勇守禦賊至三戰皆勝凡數月始安

劉調羹禹州人由進士令豐清淨寡欲愛民如子值河決徐邳  
夫役椰梢動輒踰額調羹力請多所裁免後以績最遷侍御有  
遺愛碑

王體蒙虞城人令豐案無畱獄一夕有寇警體蒙偃旗鼓誘其  
至擊之遂遁去

劉光貴州人令豐精嚴勤幹剿平土寇流賊攻城光力禦之城  
潰殉節邑生員皇甫世明依光不去併死之

譙拱極四川人令豐樸貌醅行不露圭角而內實剛明奸胥某  
一縣巨蠹積惡漏網拱極廉知之立斃杖下未幾以憂去

劉昂廬陵人爲豐邑教諭學問淵博尤長於詩賦毛志尹新建  
人性孝能愛護士類范景曾昌邑人坦中直氣不爲姸媿忤直



指挂冠去李洛高淳人和厚善講解以文字來質者欣然為評  
品且出壺漿酌之咸佩德焉又有段徽陳璜陳讓皆能持已以  
正入名宦祠

張以誠青浦人持正秉禮風節矯矯龔奭湖廣景陵人英毅有  
為臨事屹然山立龐濬敦朴質直王緝敬文雅通書卷常俸外  
一無所受湯夢禎寶應人課士文行剛而能溫皆為豐邑司訓

人士德之

以上豐縣

顏伯瑤名瓌以字行江西廬陵人建文元年以賢良徵授沛縣  
知縣靖難兵起李景隆屯德州沛人終歲輓運伯瑤善籌畫得  
不困會設沛豐軍民指揮使乃集民兵五千人築七堡為備禦  
尋調三千益山東所存皆疲弱不任戰燕兵攻沛伯瑤遣縣丞

胡先百夫長邵彥莊間行至徐州告急援不至遂命其弟珏子  
有為還家侍父題詩公署壁上誓必死燕兵夜入東門指揮王  
顯迎降伯瑤具衣冠嚮拜畢自經死有為不忍去復還見父屍  
自刎福王時贈伯瑤太僕少卿諡忠惠有為翰林待詔諡孝節  
唐子清沛主簿也不知何許人在沛有善政民愛之顏伯瑤守  
沛專調兵食邏察事皆付子清燕師入被執燕將欲釋子清子  
清曰願隨顏公地下遂死之福王時贈工部員外郎諡義節

黃謙字損之武進人以儒士為沛縣典史果敢善戰能戢下燕  
兵薄沛謙與顏伯瑤唐子清集民兵築堡備禦燕兵不克去謙

尋統死士往東昌援鐵鉉及燕兵入沛遣謙往徐州招降謙不  
從亦死福王時贈工部員外郎諡果義

以上顏伯瑤子有為唐子清黃謙四人死事相

宦績傳

司台余刊守志卷第二十一

三



連俱本明史  
兼參舊志

常瓘內鄉人古信嘉魚人馮謙諸暨人永樂景泰間皆以舉人知沛縣平恕不苛勤民事遠近德之

馬時中太原人成化中知沛縣持守廉介爲政簡易以忤權宦謫慶遠衛經歷

姚祥字應龍歸善人宏治中知沛縣自奉清約愛民如子天旱虔禱郊外大澍如注民有負官租數年者久拘於官祥與之期而遣歸果如期至常詣學進諸生課之甫八月擢御史去王琛松滋人政寬平篤意學校粟鉦潞州人在官清慎徐輅海甯人亢直不私倪民望黃梅人溫和坦易皆任沛令

楊鳳府軍前衛人宏治中以進士知沛縣剛明果斷事無停滯

麻芝榆林衛人令沛性剛才敏彊禦懼服

胡守約字希曾合州人知沛縣中官吏宣進貢經沛陵轍官吏橫索無厭守約與宣訐奏被誣繫獄比鞫對持論侃侃無屈撓竟罷歸後復起用官至湖廣按察司僉事祝希哲江西德興人平易近民馬日丙四川南部人築隄護城民有遺思周治升四川新津人有治材符璽龍陽人慎重得體不任吏胥  
王治字純甫永年人由國子生知沛縣沛故無城治爲創築又撤龍泉寺徙建學宮

李禎新昌人由舉人知沛縣縣田多蕪禎給牛開墾盡成畝發奸摘伏如神明政暇集諸士論文不倦尋擢御史

李汝讓字遜菴直隸永甯人萬曆癸卯沛大水汝讓時知虹縣

宦績傳

司台徐州府志卷第二十一

三



以才能調沛居城埋理事悉心撫卹諸廢圯漸次修舉尋遷知  
鄆州邑人乞畱詔改授邳州知州仍畱管縣事初汝讓補築護  
城隄修學宮遷縣治未竣至是益專力營治修築太皇潰隄縷  
水缺隄纂輯縣志百務具舉

周涇字澄之貴溪舉人知沛縣強毅有爲百廢俱興

滕霽字子開建安人由舉人署沛學教諭歲饑沛適缺令未以  
災報霽爲請上官發倉賑之全活無算遷嘉善知縣沛民請於  
吏部遂知沛縣鋤強抑暴禮士愛民以不善事上官投劾去  
操松字廷節浮梁人正德中爲沛教諭勤於立誨捐貲濟貧生  
于喬高唐人嘉靖中以歲貢任沛教諭性剛方不能容人之過  
清節自持却貧士餽且捐俸助之

張慶暘泰順人以貢任沛訓導篤學能文志操端潔其師模之

善與喬先後見稱

隆慶以後郡邑志皆缺載

張俊同安人爲沛訓導清潔善

教人魯師問字汝祥和州人爲沛訓導散名行崇教化拔才俊  
計口食俸貧約如諸生時

李文憲字從周北直人嘉靖二年由國子生授沛縣丞明年三

月二十八日夜忽有賊百餘人入城劫掠憲率民兵往捕挺身

當先矢盡遇害

以上沛縣

陳葵慈谿人洪武中知邳州興學勸農甚有遺愛祀名宦

申梗金華人洪武十三年知邳州平易不苛民無怨讟

舒文秀荆門州人建文時知邳州興學勸農士民懷之

孟琳

鄆志作林

蒲州人成化間知邳州彰善癉惡士民悅服升本府

宦績傳

司台余州府志卷第二十一

下



同知

郭珏新安人成化間知邳州廉勤愛民時以趙成建言珏坐隱

蔽田糧遣戍大臣力為辨明尋復任焉援直河巡檢司署正統十三年郭珏建此云成

化間任必有一誤也

郭定澤州人成化間知邳州涖政明爽百姓稱便或曰天順間任

周廣榮吉水人十六年知邳州文章政事並稱於時祀名宦

毛深聊城人十九年任邳州愛民禮士有聲或曰天順間任也

李惟聰杞縣人宏治二年任邳州政平訟理嘗修葺州學升工

部員外郎祀名宦

蘇泰歷城人進士任大理寺評事坐事謫邳州判宏治七年知

州事六事兼舉上下康樂升陝西按察司副使

雷爵朝邑人十二年任邳州廉出天性政通民安有古循良之

風祀名宦

周尙化太和人正德四年任邳州涖官公勤時流賊劉六犯境

修築州城建皇華金勝永康三樓勒兵防禦州人賴以保全為

立生祠祀之祀名宦

沈珂湖州人九年任邳州政尙寬仁調廣西橫州

高巖瀘州人十二年任邳州不畏強禦而優禮士人人亦稱之

祀名宦

馬京真定人嘉靖十二年任邳州勸州人種棉有種木棉詩蓋

志於民者調山西平定州

陳柏廬陵人十四年任邳州廉能敏惠百廢修舉一時守令推



柏爲最時下邳驛前民家火風盛柏往禱風火頓息州人以爲誠感

同知邳州事者武甯大同人成化間任以公勤稱馬憲睢州人成化間任篤慎能恤民龔華南昌人宏治三年任華雅有儒術王景隆隆慶州人宏治十二年任敏決有幹吳憲江夏人嘉靖十四年任有惠政張德恭光山人慈惠愛民

曹卿銅梁人進士歷官御史成化間謫爲邳州判官卿不以降黜憐於其職修學校及州署興利除害百廢具舉終明之世佐貳中未有如卿之任職者也遷滁州知州祀名宦又有武忠遼陽人嘉靖元年任邳州判以篤實愛民見思馮清淇縣人三年任邳州判以才濟稱楊政南昌人四年任邳州判治河有功宋惟哲嘉定州人五年任邳州判勤謹有操持彭繡麻城人七年任邳州判設施多方克稱委任

蕭瓊武岡人才識敏贍長於誨人顧維四川人以嚴整見憚成化間邳州學正

林初甯德人侯汾臨海人鄧鏞豐城人三人皆宏治正德間任邳州學正學優操潔充聘考官稱得士

程阜奉化人正德十三年任邳州學正不苟於職寬而有體周亮長泰人德器宏深學問廣洽陳賦高安人以經明行修稱嘉靖間任俞縉鄱陽人儲弦甯海人馮守中濟甯人俱有學行爲邳州訓導在正德間

魏俊鞏昌人宏治十年爲邳州吏目剛正不阿臨事有斷張祥



范縣人明敏爲百姓所服王貴萊陽人善決事有快吏之譽王  
緒邢澤人以平易稱皆邳州吏目之可紀者也

以上邳州

梁孟嶽江西貴溪人永樂七年任宿遷令歷二考賦均訟平貧  
民婚姻死葬皆有賙恤民深德之張嶽山東福山人宏治中任  
百廢具興政績顯著二人皆祀名宦

甯直滕縣人宣德元年宿遷令持身端謹處事公平尤善決疑  
獄吏民悅服史珍德化人天順四年任持已嚴而御衆寬尤能  
作興士類朱光正四川大足人成化十三年任以廉正稱王雄  
順天人正德九年任刑清政簡庶民樂業

李錦陝西人嘉靖七年任宿遷令剛正廉平積商稅餘銀養士  
恤民張榮祥符人十年任興學養老政平獄清謝文正湖廣人

知宿遷事純厚不擾民皆悅服

李九功裕州人罷不急之務捐額外之征抑中貴需索減權要  
賦役魏鐸汝甯守禦千戶所人愷悌慈祥清廉不苟莫抑廣西  
馬平人廉厚寬仁威惠並著崔元吉歷城人有治才賞罰必當  
請減夫馬不避權要四人皆嘉靖間宿遷令

宋伯華益都人隆慶二年任宿遷令體恤民隱不尚法律喻文  
偉南昌人萬曆二年任有深識愛民重士縣治圮於河文偉改  
建馬陵山下築城隍立學校設義倉勸官舍民歌思之建祠肖  
像歲時羅拜孫湛滄州人萬曆十二年任廉平明敏不事敲扑  
聶鉉江西南城人萬曆十八年任文章政事可方古人

何東鳳江西弋陽人萬曆二十二年宿遷令廉明慈惠時縣遷

宦績傳

司台余川府志卷第二十一

下



二十年城工猶未竣東鳳力完之築捍水長隄六十里振起積

弱招撫流亡條陳民瘼懇惻當理政績最著知縣何東鳳為酌

蒙會調職當求牧與芻不容立視其死是敢冒昧僭越上陳招

徠逃竄之窮民以復故業曲蠲舊逋之錢糧以錫更生清衙門

之弊叢復往昔之良法宿遷可次第理矣一議設法收徵錢

糧以杜侵冒夫編審條鞭原為便民今反病民宿遷上年稅糧

力差向遵賦役成規預造赤歷由票令民自封投櫃完納是以

官司易於催徵可絕左右侵冒之弊後自萬歷六年前任喻知

縣遷縣之後官更代不常兼連年旱疫及河決之害民罹困

苦流散逃亡奸譎遂起歷年以來將印信赤歷藏匿不給花戶

由票惟憑櫃頭及管收條鞭書手標寫私單與押鄉皂隸拘催

而櫃頭里長率多奸猾不係殷實及拘人戶到縣先被各奸索

詐不帶見官以致十無一二完公其富實豪民又與衙門人役

交接互相影射致累貧戶包賠民何得而不窮也請乞天恩軫

念民艱將宿遷應徵條鞭銀兩每年於春初令造廠經二本一

本存府備查一本發縣以憑開立各戶花名由票列為十限給

散花戶刻期自稱自封完納當堂投櫃櫃頭就於五十九里之

內點選殷實守法者六人登記赤歷凡遇花戶完銀櫃頭於由

票內親註銀數鈐以圖書如此小民可免包賠亦足以杜奸猾

侵漁之弊矣一懇請蠲停逋欠以救災傷宿遷因河南及西

河雨水衝盪入泗震驚皇陵于萬歷六年議築歸仁隄三十餘

里塘攔兩水凡昔入泗之水皆入宿遷是宿遷獨當諸水之衝

以故水災視下流諸縣尤為極苦南孝順三鄉周圍四十餘里

田粒不收遂致錢糧逋欠今查自萬歷十七年起二十一年止

約欠起存錢糧共計數千雖經前官追比十無一完卑職赴任

剛抵縣界而窮民沿途哭告求豁荒糧率皆骨立鬼形奄奄待

斃一面准行撫恤外當此大祲各項逋負尤多彼行乞之民惟

日望賑濟活命尙有完官之力哉舊欠未完新徵復急筆楚加

之於枵腹不至殞命必愈逃亡目擊心傷何忍為此卑職痛切

是以冒昧上陳乞將以前未完蠲豁庶流移之眾可漸招徠垂

撫流移可甦殘喘其拋荒地錢糧俟委官助明另議一招

責難堪只得挈家遠遁行乞之處可免差徭反為樂地悉無懷

士之思矣雖前告復業而竈土未乾舊欠新徵一槩追納加之

富豪逼取私債是致窮民惟以一逃為大幸也卑職昨赴任時

沿途告復業者計數百人皆以差之免不免為去雷除面諭撫

恤外仍刊示遍諭以後復業之民不許富豪逼取宿債其新舊

錢糧姑暫停徵俾逃移窮民得獲更生之望一請量減死逃

丁口以豁賠差宿遷名有五十里實因水荒貧苦逃竄者將

半死亡者又多而舊欠新徵追呼不已現存之窮餓者包賠者

拘繫者比較者皆籲天哀號叩地慟哭卑職每相與對泣涕泗

官績傳

同治初年

卷之二

下



沾襟似此責賠丁口將去者無復歸思存者益有去志且怨聲  
 載道上干天和安有轉否為泰之日乞將丁口之現存者量減  
 分文使正身上納而於饑疲死亡者久逃不返者一審除之則  
 現存者可保流移者肯歸待其歸來復業再令當差未晚也  
 一請革冗役以省民財查得宿遷力差內額民壯二百二十名  
 此外又有添設扣壯五十名每名歲費工食銀七兩二錢共約  
 費銀三百六十兩仍於正戶項下額外加添每名五兩不等  
 俱係卸桃及鳳陽五河等處無籍棍徒包當往往逃回是以災  
 民脂膏供無益差役請裁革之革一役民除一役之害省一分  
 民受一分之惠亦救災節省之一議也一禁緝窩訪以安善  
 類今間宿遷有等窩訪奸徒與衙門棍惡交結大張騙端令人  
 畏懼訪人一來彼與情熟先請到家藏之密房獻之艷妓待之  
 酒席傾入之腹心遂將平時稍有微嫌小隙之人即捏無影不根  
 之詞填入行訪單帖之內仍帶伊名作証被害之家自辨不及  
 何敢申言坑陷善良莫此為最請乞嚴禁一議聞商稅據本  
 縣民何九功等告稱本縣軍餉錢糧師生俸廩舊規出自稅銀  
 支解近奉明文禁革加派丁之內因致累逃大半原申過逃  
 亡人丁四千一百一十七丁涉銀二千三百八十六兩後蒙本  
 縣加意招撫日有人回今審尚有逃丁三千二百餘丁實涉銀  
 二千餘兩如將逃銀加派見戶速民以死竊查本縣董家溝埠  
 子湖及本縣城內行戶往來載船車脚貨物應照舊例納稅以  
 補前銀等情到縣查得原額里甲均徭驛傳民壯四差并續奉

文加減共該銀一萬四千八百七十一兩九錢八分一毫二絲  
 五忽五微今審見在人丁一萬四千七百五十八丁除優免外  
 上實存銀八千九百六十七兩六錢二分內審逃亡人丁四千  
 一百一十七丁該銀二千三百八十六兩七錢五分本縣逐日  
 招撫陸續回過三百一十餘戶尚涉銀二千餘兩無從派補查  
 出水面銀三百零七兩鹽斤銀四兩新淤灘地浮糧銀六十  
 兩異鄉銀一百餘兩及申准各差減去銀九百九十七兩三錢  
 通共補過銀一千五百餘兩不足原額尚少銀五百餘兩委無  
 可補若再加之見丁則存者復逃逃者永無歸期今董家溝埠  
 子湖之船皆係潛由小溝小口載貨出河而其把溝把口人等  
 竟自取討牙用肥其家在城各店家凡出入船車每驢討銀  
 五六分不等船車討銀兩許幾錢不等皆取以自潤既不納官  
 額不助民乞俯賜准行量納牙稅以補逃亡庶民困稍蘇而賦  
 本縣淺夫原額一百四十名以聽河工應用今增至二百三十  
 名比前多九十名矣現被災傷誠為苦累似應除豁一乞處  
 銀差以前多九名本縣原額夫廠應付銀二千兩各州縣協濟銀  
 六百兩凡入仕山東回籍本地者原係船來及至宿遷則取捷  
 起早動輒用車三二十輛人夫七八十名或百十餘名不惟一  
 時僱募不前抑且錢糧卒然無措輕則打罵人役重則濬毀報  
 害則各縣水路之幸宿遷獨受此大苦累也宿遷億困正額正  
 供尚然不足焉有此項額外之供雖有額銀二千兩近因地方  
 宦績傳



迭罹重災百姓累逃過半卑職每踏安北二鄉旱災及南孝順  
三鄉水患離城三二十里四顧無復人烟舉目令人淚下正差  
難應再如此枉道重累民益難存乞軫念衝殘急加拯濟一  
議減冗役本縣皂隸二十四名禁兵六名南北察院并正堂佐  
貳門子共六名水次預備二倉斗級共二名每名歲該工食銀  
七兩二錢共該銀二百七十三兩六錢各減一半似亦可行  
一議減新派本縣奉派海防同知皂隸工食銀二十一兩廟灣  
遊擊供應銀二十七兩遇閏加銀四錢本縣災傷至極乞賜刪  
除一議減朝覲盤費本縣入覲例該盤費銀九十三兩三年  
一次每年徵銀三十一兩卑職甲午冬應朝見民苦極分毫未  
徵似應裁減以寬民力一減新增水夫查得本縣原額水夫  
八十八名因不敷用議增十四名今縣治凋疲民不堪命將新  
增水夫十四  
名悉行裁革

楊舒英四川洪雅人萬厯間宿遷令吏事精敏董則喻光州人  
萬厯間任招流移課農桑得為政大體周鴻圖卽墨人泰昌元  
年任才具絕人卒祀名宦

劉璋莆田人彭廷瑞湖廣人陳諷都昌人皆嘉靖間宿遷教諭

有學識和以敷訓學者多忻慕焉

林德廣侯官人萬厯間宿遷教諭高邁有氣節又有陳鳴鳳永

嘉人任訓導學問宏碩儒雅爲一時最張相陵縣人高嵩江西

高安人張健廣東高要人皆以嘉靖間任宿遷訓導行己端厚

士林稱之

方鐸石首人元末任宿遷丞鼎革後百務廢弛鐸一一振興之

利國便民者輒舉行之卒祀名宦

孟芳歸安人胡柱甯鄉人唐從訓全州人皆爲宿遷丞多能績

石崑白水人龔森餘姚人白居易山西清澗人張繩直江西宜

春人皆宿遷主簿實心能任事持身不苟森有德政碑祀名宦

古道行字達可揚州人崇禎末年任宿遷護漕叅將流寇袁時

宦績傳

司台余川子志卷第二十一

三



中寇宿遷道行與戰凌城廟賊眾五千人圍之道行奮勇衝突

與協鎮副總兵戴國柱力戰死明史可法祭古參將文維崇禎十四年歲次辛巳孟冬癸卯朔

越九日辛亥欽差總督漕運提督軍務巡撫鳳陽等處地方兼

理海防戶部右侍郎兼都察院右僉都御史可法謹以剛鬚

柔毛庶品之儀致祭達可參將之靈曰嗚呼宿遷為南北之樞

漕河一線係國家大命干城重寄當事難之將軍以才勇膺簡

任其初至也創營壘招精勇制火器造兵船無不井井具而疋

馬所到雖聚嘯千百皆望旗而靡宿人倚將軍為長城幾于外

戶不閉今歲漕粟百萬一帆直達繫誰之功子不佞以督漕至

河上見將軍忠義慷慨勃眉宇間竊為重地得人慶無何鑿

土大寇深入宿之西南鄉烽火照河干可歷歷而數子進將軍

商之將軍曰是無難此蠡爾輩聞某至輒竄走向為某所殺縛

所解散不知凡幾某且為大人渡河平之子戒以兵寡宜持重

須暗襲而將軍慨然曰子馳驅邊腹二十年從來不愛錢不

死若應死即待罪薊鎮墻于路足死某矣死亦安可避今筭無

餘帛困無餘粟房屋無片瓦隻木貧則貧矣而有子三長者讀

儒書入膠庠今試且高等某即捐軀報國亦何恨焉子問之為

之感動竊以為將軍懷此志何賊不可殺何功不可成孰知相

對數語竟為將軍殺身之讖也竟成將軍殉國之志也嗚呼慟

哉將軍步兵纜四百問其被圍之日與戴將軍奮擊而前左右

有勸之笑圍者將軍曰此即我輩死所耳他何往少頃賊益四  
而集又諭部曲曰爾等得走即走我以臣子當以死報朝廷爾  
何為也士卒咸感泣無不願隨將軍死者嗚呼慟哉將軍有功  
于宿聞報之日無論士與民莫不為將軍動即子亦安得不慟  
既而思將軍所言捐軀報國者竟捐報矣家雖貧有令子殺  
身成仁將軍豈不含笑入地耶嗚呼子與將軍初相見而知極  
深今日之事又奉子命而往殺身成仁將軍固無憾子不能大  
展將軍之才以盡蕩妖氛致國家失干城之寄子安得不慟且  
悔耶將軍往矣將軍之子則子之子也訓迪而成全之子之責  
也旦夕蒙恩恤邀世廕繩繩孫子克纘忠勳將軍果釋然身後  
之慮矣嗚呼

哀哉尚饗  
案舊志崇禎十五年十二月袁賊東犯鳳皖至睢甯參將古  
道行總兵戴國柱戰死凌城廟舊志崇禎九年古公住宿  
遷護漕參將戴公任山東副總兵官崇禎九年調協鎮俱于  
是年九月與袁賊戰死而史閣部祭古公于十四年十月年  
月俱不相符宿志蓋承上之九年而誤而其月則與祭文合  
又周承熙妻蔡氏傳舊志謂承熙明末從征陣亡宿志謂明  
季征賊陣亡攷明末袁賊之外別無從征事亦無征賊事則  
承熙之死為征袁賊與古戴二公同死可據又俗傳袁賊犯  
境時從征有武舉張姓者亦陷賊中遇其故佃為賊頭目謂  
之曰此陣已成君等必死此矣導之從生門出事雖無他據  
宦績傳  
司台余川守示卷第二十一



而流傳既久亦可知當日從征者不一其人而周承熙死于賊之一証也宿志年月多誤又不載周承熙之死且恐有疑其不死于袁賊者故附辨于此以上宿遷

何暉公安人任睢甯令治有異政蝗不入境甘雨瑞麥疊見邑人建瑞麥碑亭祀名宦

陳嘉畧貴州安莊衛人任睢甯令六載愛民節用撫恤流移睢故土城嘉畧甃以磚石比去百姓攀轅不忍舍申其學日照人任睢甯令河決後城池官舍蕩然無存其學創建城署築護城隄八百五十餘丈設立官莊給民牛種墾荒地萬一千四百三頃有奇逃亡者漸歸修學宮建社學設橋梁鉅細畢舉政化大行二人皆祀名宦

邢清濟陽人爲睢甯令持身清謹積粟萬餘斛以活民劉景沂長清人爲政廉平振舉廢墜喬鎮遵化人莅睢三年不聽近習不畏強禦被誣罷去

黃益純福建永安人爲睢甯令時派睢協濟邳州名曰坐廠罹此差者輒破家益純白當道奏免其役歲止解銀民甚便之魯佶湖廣景陵人任睢甯令值大水偪隄佶守禦完固復加築隄高至一丈三尺頂寬一丈嗣後水不爲患民思其德稱魯公隄林翹楚福建莆田人爲睢甯令捐俸置學田百二十畝是皆有心於爲民者

高岐鳳涼州人崇禎九年流寇犯睢甯焚戮殆盡存者不過數十家岐鳳以十年之官撫綏安集築城練兵民賴以安有小袁營數萬衆駐我溝集蹂躪萬狀時岐鳳已去聞報卽偕總兵劉



良佐到睢親冒矢石破逐之蕭賊程肖字恣屠戮直逼徐州城下誠其徒不許犯睢境岐鳳獨率軍搗其巢愛民養士有瑞麥五歧之應祀名宦

林德乾莆田人顏希烈安福人持己嚴教士有法黃廷敕番禺人才學優裕佐令纂修邑志皆睢甯教諭也有訓導陳魁福松谿人以易學授諸生

卬紳浙江龍泉人金聲大嵩衛人皆正德間任睢甯主簿二人以劉寇屢破睢城相繼捍禦陣亡祀忠臣祠

袁浩睢甯典史正德七年與主簿金聲禦賊陣亡祀忠臣祠朱世隆杭州人敏達善禦變崇禎十二年袁賊犯睢境世隆拒守

有勞以上  
惟甯

國朝

陳嘉允東平人王惟屏陝右人張雲翼淮陽人皆順治間以戶部郎中管徐倉為政清簡惠商恤民顧大申華亭人工部主事分司夏鎮河道廉幹有才

康基田山西興縣人乾隆間任徐道捐修府城疏通溝瀆改建雲龍書院增齋舍作勸學箴親為講授士民感澤立祠書院祀之

鼇圖鑲紅旗漢軍于氏由太倉州調徐督催引河發災賑嚴戒侵冒窮民咸沾實惠旋授徐州府擢徐州道葺祠廟增書院膏火遇河水異漲搶護勤勤士民設位四賢祠祀之

王夢齡字雨山大興人咸豐元年由蘇州守遷徐州道會粵賊



渡河北擾徐當其衝捻逆復張甚往來劫掠無虛歲夢齡創集團練就隄築長圩俾民知守禦擴堅壁清野之法下屬邑仿行之聞警輒身先士卒指麾截殺遇風雨猶登陴不少休在徐十年講戰守甚備募兵徵餉蔽遮兩淮徐州獲全夢齡之力也旋擢江甯布政使署漕河總督卒民思其德列勛上聞

詔許建專祠徐州並祀名宦

時有太湖嚴良珏佐夢齡守禦倡立諸善舉加道銜以積勞卒

朱善張字山泉平湖人同治元年授淮徐揚海道屬捻逆俶擾善張撫馭有勞山東流民與沛民爭田擊殺數十人洵洵幾致亂善張率兵捕斬疽發於腰卒於沛館贈都御史入祀鄉賢高梯字雲浦彭澤人咸豐初舉孝廉以軍功擢官同治六年授徐海道梯廉正勤苦志趣堅卓約束官吏人不敢干以私在徐

二載修水利課紡績擒巨盜鋤豪強設書院置義地勤察民隱實事求是故俗役夫舁棺必視買棺之數而索其值少靳則鬩然散去喪家多不得葬梯聞大怒勒碑嚴禁其風頓革時寇難初平輕滑游勇往往煽亂梯綏戢有方四境靖謐以勞卒徐人懷之贈光祿卿祀名宦

江雁卿江西新城人康熙八年知徐州約己率民不事刑卹州舊有版荒地四千七百餘頃丁糧未除久爲民困雁卿力請免之卒官無一錢州人爲具棺殮祀名宦

孫枝蕃陝西三原人康熙十二年知徐州河溢出私財募夫築石隄護城徐民夙苦協濟夫役力請免之滇閩變作官軍多道於徐枝蕃竭力供億公帑不足繼以假貸不一擾民間坐逋負



憂勞卒祀名宦

佟國弼奉天人康熙三十九年知徐州值歲饑力請蠲賑發常平倉麥二千餘石貸民間明年又饑民不能盡償國弼代償之復出私錢築隄捍水患歲得有秋貧戶生子多不舉乃捐貲立育嬰堂募乳媪哺養全活頗衆卒官無以殮人皆爲痛哭祀名宦

孫詔武威人雍正二年知徐州築州城治匪類禁淫祀以正風俗爲己任姜焯昌邑人牧徐州多善政徐人追思不置云石杰桐鄉人雍正間爲徐州牧精明渾厚澄敘官方是時徐州始改府杰由邳州擢守莊亨陽南靖人精於理學循循誨人性溫厚然內實朗澈人自不敢欺

邵大業大興人有文學歷任皆以清廉著知徐州府捐廉築蘇隄浚荆山橋河以資漑灌振興文教暇則集諸生童講說易春秋大義王兆棠錢塘人守徐州爲政多惠愛值大水晝夜巡視脫冠服塞滲漏隄得不潰宋覲光四川營山縣人乾隆五十一年守徐州歲大饑斗麥千錢覲光急請賑發米平糶設場五處親爲巡察禁胥吏侵勒全活萬人田自福守徐州矢心公平人不敢欺

松齡正紅旗人守徐州徐郡素苦飛料詳請裁免民困頓息伊楞額鑲藍旗人值歲饑捐廉賑濟分設粥場飭營伍嚴而有制飢民數萬不敢攘奪全郡以安

俞穎達字鳳臺山陰人任徐州府三年清慎明決平豐邑段氏



冤獄立致澍雨疏濬奎河荆山橋河郡中水害以息設義學修  
橋梁與士民言必以忠孝安分爲勗以憂去徐人泣戀不已卒  
立祠祀之

高攀桂陝西澄城人任銅山時歲饑爲民請賑躬自按給絕胥  
吏侵漁全活甚衆疏濬荆山橋蘭家山河以蘇民困虛心鞠獄  
用心仁恕不牽連平人士民至今猶尸祝云

伍承平金陵舉人咸豐六年署徐州教授復攝邑訓導課士取  
人必秉公慎值捻逆交闕奉檄辦團練圩砦及守城捐餉實事  
求是任勞怨不避艱險以功擢直隸州知州加知府銜積勞疾  
卒臨終遺書達上臺處分防剿要務贈太僕寺卿銜

襄安邦字古愚會稽人由武甲科道光初兩授徐州鎮慈祥廉

儉練兵修柵詰奸宄護行旅歲出俸金六百濟棉衣貧民復籌  
費二千繕建義學五所月朔親爲讀法講畫嘗行市中遇一婦  
虐其姑立捕撻之幾斃闔郡稱快愛民若子弟懇款無已徐人  
頌德弗衰卒立祠祀之

滕家勝字謹亭湖南鳳凰廳人咸豐間授徐州鎮善用兵忠義  
憤激徐方倚賴之臨陣戰歿

以上  
銅山

祖永勳遼東甯遠人順治五年任蕭縣縣值寇亂後數十里無  
人烟永勳斬荆除棘招徠流亡來歸者日衆旣一二年乃興學  
校定賦役輯邑乘百務具舉蕭人戴之如父母

趙忠仔浙江東陽人順治十七年知蕭縣莅事嚴明人不敢欺  
丁糧弊端釐剔至盡善折獄摘伏如神公餘引諸生論文藝軍



務勞午不廢吟詠而事亦集以望誤去蕭人戚焉

邵瑗順天大興人康熙十八年知蕭縣縣洊饑請蠲賑全活甚眾軍興供億多出私橐不肯累民十九年春邑西盜發瑗聞卽率眾往捕其魁餘黨遁散

閻允吉直隸盧龍人康熙二十年任蕭令時沛縣夏鎮閘夫緯夫每令鄰邑協貼科斂無旣允吉白上臺罷之又漕弊多端民不勝累允吉剔除積習民困乃蘇

紀遴宜直隸文安人康熙甲戌進士三十八年任蕭令興利除弊愛民若子比去士民攀轅遮道送者絡繹數里遴宜贈別詩有十年冰雪一郎官之句邑人屬和成編名龍城贈言集

張倬山東濟陽人乾隆二十九年任蕭令勤慎廉直有幹濟才

日端居署齋而民隱無不洞知奸宄斂跡邑有驚吏多不法倬發其隱吏懾服自此無敢橫行者時有河工歲料計畝攤派廳吏浮收加數倍民苦之倬親至料廠督察稽收嗣後無浮勒民深感焉大府重其才守調任上元

徐振甲浙江德清人乾隆三十四年由江甯丞擢署蕭縣外明察而內慈祥判決無滯僅半載合境頌神君振甲子端後官徐州兵備道振甲就養卒於署蕭父老持雞酒哭奠者以千數其遺澤感人如此

謝宣雲南楚雄人乾隆三十四年任蕭令善聽訟獄至輒斷決無踰十日者政尚嚴肅奸宄匿跡去之日貧無資斧士民感歎醵錢贈之以行



張紹祖河南原武人由舉人凡三知蕭縣公正廉明其再任也  
邑值灾祲饑民相鬩紹祖寬猛並濟四境帖然民逋賦至三萬  
金有奇紹祖閔之出家資代納之士民感泣

陳觀國浙江海甯人嘉慶五年任蕭令政尚簡靜不事操切而  
吏畏民懷百事俱集大河漫溢觀國晝夜防堵又捐貲數千金  
急募民夫增築子堰藁楗畚鍤躬自巡閱瀕河黎庶再慶更生  
皆其力也尤能作人興化兩造爭訟恒婉諭之使和解而去暇  
則集諸生講論經藝合邑稱慈父母云

趙毓丹雲南鶴慶州舉人道光十二年令蕭值大饑盜魁李大  
朋聚眾劫奪民畏之如虎毓丹衣短後衣跨馬腰劍會營弁率  
卒徒直搗其穴生擒大朋及其黨四十五人復單騎馳東鄉捕  
斬巨盜孫平清奸宄屏息於是請粟勸賑全活無算既又疏濬  
岱山湖農商大慰毓丹堅苦講求實用平生服膺湯文正公清  
操冠一時百姓樹旗表德三十六所云

夏衡陽建平人剛方正直訓蕭凡八年諸生薰而善良者指不  
勝屈徐基嘉定人爲蕭訓導教諸生分齋課藝不拘故常偶以  
微言啟發令聞者神會諸生以比歐陽安耿介姚應龍

胡溶鎮洋人蕭教諭立品卓卓不可屈撓訓課勸學藹然以和  
氣接人黃裳長洲人蕭訓導勵諸生以敢行爲先循循善誘一  
時成材者甚眾

朱名世遼東人順治三年除蕭主簿樸誠勤慎不避勞瘁時邑  
罹兵燹名世闢荒蕪護隄堰巡視畝畝遍察郊衢俞應貴金華



人順治十八年授蕭主簿多才略勇於任事黃河泛濫築黃家口隄工又補築長縷二隄拮据終歲民賴以甯歷任十一年注上上考

羅景芳漢軍鑲紅旗人順治三年改碭營爲蕭營守備景芳始授是職移駐城中老練誠實捍衛孤城士民樂服郭大乾京衛人任蕭營守備軍律嚴明民服兵畏以上蕭縣

李允正德州人順治二年任豐縣攝碭山事有頑民煽亂首惡已就擒鎮將欲窮治寇黨允正一夕爲十數書痛切陳請願以身家保之事乃寢撫綏招徠逃亡皆復業明年代者至百姓攀轅泣送聲聞數十里卒祀名宦

張楚材宣化府人知碭山縣強幹精明案無畱牘有朱生因誣陷父子俱除名楚材爲雪其冤復之魯國甯紹興人培士風恤民隱未幾調任去

楊維庚甯海人令碭山持己清正讞獄必詳慎假以和顏使民各抒其情有進賄關白者必嚴拒之不染一塵修朝彬萊陽人知碭山歲歉饑民嘯聚借糧居民恟懼朝彬執法峻厲盜烝一束者卽嚴懲之一邑安堵二人皆隸籍山東用法異而同歸於治

黃大均貴筑縣人任碭山令事母純孝治民以德教遇訟者先以孝順父母委曲譬喻乃聽獄情民多感化馬汝寬唐縣人知碭山縣聽訟詳切不輕責人有慈愛之頌牟朝宜日照人知碭山縣開水利築堞堰屢慶有年郭浩福清人有惠政民立去思



碑

王發桂正定縣人署碭山令性仁慈不輕加人罪督催工料牛車泥淖不能進發桂善言撫恤時時爲之隕涕民踴躍赴事比工竣未嘗扑及一人梅雲程江西南城人賑饑詳慎疏濬溝渠以達水勢不憚勤瘁

吳鼎位嘉定人任碭山教諭崇尚實學署邑篆數月有惠政士民感德立碑學宮團昇儀徵人爲教諭風流儒雅學者宗之章烜丹徒人任碭山訓導和正有文學誨人以誠移病歸諸生

惘惘多泣下

以上碭山

閻昭太原人順治三年知豐縣慈祥樂易興利除弊革諸陋規時逋寇侵掠昭出貲築土城不以擾民民德之爲建生祠且輸

祀田若干畝昭固卻之因用爲義學以其田贍養生徒

佟吉年奉天人令豐多善政舊有里老之役重爲民累吉年毅然除之民爲建祠孫毓璘奉天人豐令弭盜除奸立義館清賦法築樓隄置義塚實事求是去後士民爲建祠立碑

盧世德奉天人康熙三十九年知豐縣先是夏鎮聞夫取之各縣屬豐縣者皆鎮人代役要素無厭世德令計工予直自是不敢多求前令匿災稱豐地如鍤背水不能爲患後雖以水告上官多不聽民皆怨忿世德力爲申明遇水災捐貲施粥不待符下輒開倉平糶復請撥他縣倉助之全活者二萬餘人去之日邑人追送境上擁馬不得行

張志周字蓮渠密縣人初署邳州咸豐初兩任豐令撫綏饑民



築堰禦水宅心仁恕善決訟以禮化悍俗粵賊結筏渡河猝抵城下志周集民兵固守糧器俱盡益不支城陷志周急歸取印懷之賊踵至遂投水死僕蘇福徐錦李晏皆被戕

馮調鼎豐教諭咸豐四年粵逆陷城率家屬赴水死

高青選豐教諭咸豐八年捻逆陷城青選大罵被拷不屈遇害楊璟巴縣人謝昌運定遠人皆爲豐邑司訓遇寇變能勤事陳彝善造士倡修學宮

顧言丹徒人孫曰繩宣城人嵇宗禹安東人孫超六合人吳昉桐城人皆爲豐邑司訓端嚴有守言祀名宦

江能容海州人施燮長洲人江學佐歙人黃師晟六安人顧賓王嘉定人喬守愿寶應人風雅和厚豐庠皆樂其教

柴雲縉紹興人任豐縣主簿順治六年榆賊千騎突攻南門雲縉堅守無譁半夜擊五鼓以誤之賊近城忽發三砲賊大驚奔潰城獲全董國祚順天人順治間任豐主簿時豐沛初附國祚盡力安撫去之日父老泣送杜華然陝西人豐主簿坦心質行政事廉平何中覲紹興人爲豐主簿淡泊有清操人稱爲衙官僅見者

施積福紹興人咸豐四年任豐縣典史粵賊破城率子傲仗劍守獄門俱被害

王九齡爲豐汛千總咸豐八年捻匪入境登陴守禦不少懈城陷出城迎戰殺賊多人力竭死之

唐俊德任豐縣把總二十餘年兵民多受其惠厯捕蝗蝻不憚



勞瘁愛護民田不啻已產歲荒監賑公勤忘私邑有去思

以上豐縣

趙世禎字與公開原人順治七年知沛縣沛志失載政績豐志云世禎以順治壬辰兼攝豐事政尚簡易舊例有收糧大戶每一僉報輒數十家繹騷不甯世禎悉裁之民皆稱慶

郭維新宛平人順治十一年知沛縣豐志云維新以沛令署豐性聰敏長於吏治發奸摘伏朗如鑒照未幾擢去

方曰璉建安人康熙二十九年知沛縣自奉儉約絕賄賂雅意作人

楊宏績正黃旗人康熙三十九年知沛縣有吏才善剖斷時縣連年大水宏績力請蠲賑全活甚衆

聖祖南巡閱河前後四經沛境役夫數千宏績捐貲日給口糧

民皆樂從在任八年修邑志建義學善政甚多坐催科不力罷總督阿山復題授丹陽知縣臨行民涕泣以送

沈瑞鶴葉縣人康熙五十三年知沛縣乙未丙申再遇水災瑞鶴竭力撫綏居二載以憂去人皆歎惜

施霈宛平人雍正九年知沛縣初雍正五年河決護城隄民奔避無所八年水又至民益恐霈至卽集邑中士庶議築凡兩月而成今賴其保障

陳麟乾隆四十六年任沛令時青龍岡決河漫水淹沒沛城麟

死之

南河成案

雲茂琦廣東文昌縣人由進士知沛縣多善政去後人益思之祀名宦鄉賢

宦績傳

同治徐州府志卷第二十一

三



同治徐州府志卷第二十一  
三  
丁炅字煦谷河南永城人副榜署沛縣知縣時咸豐七年流民被水初復山東客民雜居爭地界焚掠洶洶而皖逆由銅蕭入邑境炅撫良鋤暴督民團嚴守湖口要隘賊不得逞姦宄亦斂跡旣而巡緝劫盜遇盜燕家集力戰不敵勇丁皆潰散炅厲聲罵被害 賜卹如例

許邦行河南魯山舉人同治初署沛縣時值山東團民墾種沛地劫殺劉莊若居民邦行欲往驗吏民阻之不從幾至不測乃申文請兵偕總鎮會剿團民糾眾來拒邦行匹馬厲士擊退之盡復所占之地民甚德之

以上沛縣

李成棟遼東人順治十年知邳州事有惠政州人至今思之杭如蘇東昌人順治十三年知邳州事廉潔仁慈有儒吏風孫家

棟安邱人康熙九年知邳州事性清介在官常蔬食自給

黃日煥永定人康熙二十二年知邳州事性清苦耐勞二十四年水大至日煥訴諸大吏情詞剴切大吏據以入告蠲免賑濟皆其力也以呈議去初城圯於水議遷治艾山之陽日煥實始經營之而終於孫居湜云居湜大興人二十六年任明年以鳳麥後期呈誤屬

大駕南巡州人相率以牧有四德上疏籲留旣復以盜被劾州人再列狀上大吏奏復其官在州七年甚有德於邳

呂大雅正紅旗人雍正六年任邳州建常平倉支本固大同人乾隆六年任嘗修新城金秉祚當陽人十二年任賑濟盡力皆有聲



丁觀堂宛平人嘉慶十二年任邳州觀堂在州久善達人情好營造建置民不苦罷役父老云丁侯之操履無卓卓可稱者然至今思之未有能及之者也王鳳翥二十三年署邳州興學愛士馬紹援章邱人二十四年任以廉稱胡晉二十四年署有風力杜絕請謁衛哲治知邳州盡出賑贏設棧流所以贍窮民全活無算

謝肇瀛道光四年署九年復署州人曰肇瀛疾惡如仇人亦不怨也李正鼎吉水人七年任公正有度黃耀明宜賓人十年署嘗修學宮屬沂水大漲興築堰工有勞保先烈昆明人十六年任人稱廉明

劉同纓甯都州人再署邳州同纓廉而不濶寬而有體卓然不可干以情勢董用威宛平人再任邳州和易有禮喜愠不形於色姚維城安福人道光二十八年署邳州能以勞勤民州人稱之

蘇嶺大興人高承爵遼陽人皆康熙間邳州河務同知精力於職承爵監賑絕侵冒民懷其惠

王廷彥錢塘人嚴煇仁和人朱楹長興人馬光瀛吉林人萬醇南昌人顏爾懋連平州人金漢天津人黃欽飛湘陰人蔡允壽歷城人皆嘗助修舊城學宮捐建書院備膏火邳士愛之楹遇歲歉施粥又積穀以恤兵俱嘉慶道光間邳北通判也

言啟方江蘇陽湖舉人道光間任邳州學正治經能文章著書數十卷爲葬殤說合葬答問以勵邳俗云

以上邳州



焦文華趙州人順治九年任宿遷令端方廉幹嚴以御左右吏不敢欺周祚永西安人十一年任招流移墾荒瘠用制斛收米麥革除陋弊祀名宦

王如春金華人順治十三年任宿遷令綜覈明敏賦役起派親為科算不假吏權諸弊盡除鄭應兆金華人十七年任仁厚不喜苛察奉臺檄列逋賦紳士名應兆獨不肯具報曰我安忍以數百人身名博一官哉竟以此去李燦遼東人十三年任沈毅

有經濟畧力請蠲賑招集流凶刑清政簡民懷德焉

胡宗鼎永城人康熙三年任宿遷令才識精敏籲陳災傷建白

多惠愛知縣胡宗鼎為仰乞憲裁急救殘黎事宿遷為淮屬極至孝二孝三等鄉但見滿目衰草黃沙一望並無熟地亦少人烟間有茅屋數椽竟無雞犬之聲并無耕作之影止有十數鵠

面鳩形者環道而迎叩馬而泣曰某等不幸而生斯土也田地硠薄歲遇凶荒賦役繁興民皆逃竄某等雖因故土難忘不忍捨去終不免為溝壑之鬼矣卑職聞之涕淚俱下不可觀查縣志言撫慰及莅任後閱視各鄉各里此離情狀俱不可觀查縣志額編五十九里僅存三十餘里尚可頂戶當差餘則凋零殆盡半屬邱墟卑縣初見之不勝淒然乃今思之不勝皇然至查其錢糧逋欠節年積累數萬則又不勝其茫然也宿地多荒有以熟包荒之苦宿民多逃有以現包逃之累且驛遞繁難夫差重困兼漕米較之別縣獨多宿有五累百姓焉得不疲敝錢糧焉得不逋欠卑縣今叨民牧與民痛癢相關甯忍坐視斯民之疾苦而不之告也仰乞憲臺救黎於水火之中全衝邑於疲廢之際一查本縣原額糧地八千零四頃七十五畝自順治十六年洪水泛漲連淹三載高者積為流沙窪者衝為湖蕩有糧之地失額二千六百七十四頃五十八畝前任郭知縣查明造冊詳報未蒙題編近因賦役繁重里甲逃亡田地荒蕪更倍于昔而每年錢糧仍照原額徵解現存之戶不免包賠可憐災殘之民本身正項尚且難完豈能包荒賠納即日事敲朴而額數終屬拖欠究無益于國儲矣伏候憲裁一查本縣原額丁銀三千九百四十兩順治九年清審戶口因額不敷搜括頂補以致一戶編丁銀數兩包賠苦累重見逃亡前任郭知縣查明失額丁銀一千二百五十八兩九錢造冊詳報日望題編以甦民命卑職今查前任呂知縣遵奉審編僅合老幼丁銀二千三百六十

宦績傳



四兩七錢因災失額丁銀仍照原額科徵苦累現戶包納若不  
亟請題蠲將來縣治盡為邱墟矣一查宿邑漕糧獨倍他縣每  
斗止納粟米一斗四升且係本地所產獨宿遷每頃納糧米八  
斗二升一畝有數倍之多况本地不產粳米每年遠糴高寶鳳  
泗等處轉運艱難有盤脚使費稍一遲緩又受官旗勒索均係  
王士莫非王民邳睢之糧何輕宿邑之糧何重宿民是以有向  
隅之泣也哀懇俯查宿邑漕米或照三縣均派或照往例以麥  
代米庶可甦民而全敝邑也又為練餉久頒成例徵輸未奉定  
派懇請批示以便徵解事宿邑為淮北第一殘區兼以連年水  
旱洧臻田地荒蕪賦役繁重人民逃散萬苦情形難瞞憲鑒查  
前任鳳曾將練餉一項具題請照晉省錢糧從銀糧起派督撫  
各憲詳酌區畫乃依藩司詳定九釐地畝一律編徵飭行在案  
今宿邑糧地八千四頃七十五畝練餉奉派八千六百五十四  
兩零若照九釐地畝則多派三千四百二十九兩零矣仍照  
初派每畝編銀一分亦多派六百四十九兩零除完過外欠解  
北各屬原共派練餉五十七萬八千一百餘兩除完過外欠解  
二十五萬九千有奇除議江甯加徵五萬九千二百餘兩以  
加徵一萬八千餘兩江北止徵五十萬五千餘兩以江北五分  
七萬餘頃之地派以五萬五千餘兩今多派二千一百餘兩  
宿邑止派六千五百餘兩今多派二千一百餘兩糧減一分便有舉  
知所措况宿邑為荒殘之區災疲之民錢糧減一分便有舉

加額之慶多一分即有疾首蹙額之悲乃今宿邑除完解五千  
兩外節奉提催未完銀三千六百餘兩較之照畝之議並較之  
照九釐之數俱不相符小民無所適從縣官無從追比實為公  
私兩悞也合乞憲臺或照每畝減入釐三毫起派或照每畝  
一分起派或照九釐地畝起派頒賜明示庶易于催徵欠案得  
以早結矣又為蝗蝻肆毒殘子無生事宿邑額編五十九里止  
存三十餘里其餘盡屬逃亡田地荒蕪一望荒草黃沙此離情  
形觸目難堪卑職設法招徠僅有二三歸耕意今歲邀天之眷  
迄可小康煢煢子遺稍有生機但見遮天蔽地樹棚聲揚撲之  
蝗蝻害我稼穡卑職親往查勘但見遮天蔽地樹棚聲揚撲之  
不盡驅之復來麥食其實豆食其葉黍稷粟梁盡食其根卑職  
目擊而涕流心傷而嘔血泣思宿邑土瘠地衝差繁民累雖遇  
豐收尚難存活乃今蝗災突起民不聊生甫集哀鴻將又冥冥  
天外不但正供雜差無從出辦而彈丸疲邑立為邱墟因知卑  
職溺職致降天災然修省有心補救無策乞憲臺軫念蒞督蚤  
繪鄭俠之圖亟上請蠲之疏又為蝗害未除水災踵至懇恩急  
救民命事宿邑土瘠民窮差繁賦重又彼蒼不祐當二麥告成  
之候蝗蝻陡起截食一空禾豆黍稷皆受其害殘黎已苦無生  
卑職不勝切切詎卑職職天譴難回六月霖雨連綿決旬不  
止西河黃流陡發北泗清漲沸騰二水交匯一派汪洋廬舍衝  
頽田地滄沒四野哭聲不絕令人慘見慘聞一年穡事既已絕  
望計自今歲之秋以待來年之夏荒朔甚長夫民一日不得食  
宦績傳



則饑甯能枵腹終歲乎况新舊錢糧無項不緊民命皇皇無措  
卑職惴惴難安惟冀憲臺軫念兩灾疊見事出異常速行查勘  
亟賜題請則宿邑灾民或可少甯子遺矣

尚登岸京山人康熙十七年任宿遷令邑罹河患土荒民流繪  
圖申請逋賦分年帶徵又改徵稻爲粟米民深賴之指其憩息  
處曰惠政菴趙良臣遼東錦縣人十九年任慈惠廉明恤民養  
士有官清民自安之頌

胡三俊餘姚人康熙三十五年任宿遷令慈惠不尙苛察預買  
漕粟爲貧困者墊兌而緩其償浚僮河故道捐借口糧數百石  
隄車路口泛溢之地數十里民田賴以耕獲久之民情契洽每  
當量移輒泣籲大吏請畱凡任二十五年前此未有也後六十  
年有謝宣者乾隆間任宿遷令勸農興學引經斷獄不尙刑名

有屬吏懷金求直其寃者久之不敢獻事平反矣乃以金還其  
人曰公以廉潔自持吾不忍污其名也其感人如此後移蕭令  
其里貫事蹟見前傳

李異臣金壇人通敏博學章得簡蕭縣人陳重蕃常塗人胡兆  
麟江浦人皆能持身端嚴課士有法俱宿遷司訓

以上宿遷

殷岳雞澤人爲睢甯令

國初軍需迫急岳治事敏決不繁修建學宮獎士課文藝聽訟  
明用法剛斷豪強斂跡卒祀名宦

石之攻陝西甘泉人爲睢甯令請罷額外科地四千餘頃又邳  
州險工橫派睢甯協夫料之致力爭河院拒之郭允屏陝西高  
陵人安靜不擾二人皆以催科不及去任人多惜之

宦績傳

司台徐州府志卷第二十一

七



謝乃實山東福山人令睢甯勸課農功省雜派設十戶滾單法  
疲頑者亦勇於輸納葺學宮課文童若嚴師然段仔文四川簡  
州人令睢甯爲政平易近人而方正不苟

王相呂泰州人睢甯教諭李之實延慶州人睢甯訓導順治十  
年膠賊陷城皆抗義不屈被害

張其仁韓城人爲睢甯縣丞分理河務十三年勤勞盡職伏秋  
水漲督率守險常露宿野處終任無河患不擅受民間一詞卽  
奉上批發必秉公審理賢聲甚著

宋文耀直隸東安人黃應登直隸通州人俱爲睢甯主簿時河  
員不多設專以主簿管理而令總其成二人有才幹練達河務  
以勤敏著績以上  
睢甯

### 宦績附錄

伏隆字伯文琅邪東武人建武二年張步兄弟各擁強兵據有  
齊地拜隆爲大中大夫持節使青徐二州招降郡國青徐羣盜  
得檄惶怖獲索賊右師郎等六校卽時皆降後爲張步所執不  
屈死後漢書伏湛傳

張純字伯仁杜陵人建武五年拜大中大夫使將潁川突騎安

集荆徐揚部後漢書本傳

張宗字諸君魯陽人建武十六年琅邪北海盜賊復起宗督二  
郡兵討之廼設方畧明購賞皆悉破散於是沛楚東海臨淮羣  
賊懼其威武相捕斬者數千人青徐震慄後漢書張宗傳

樂巴字叔元魏郡內黃人漢安初以光祿大夫與杜喬等八使



循行州郡觀省風俗巴使徐州

後漢書本傳

趙昱琅邪人徐方名士黃巾作亂陸梁五郡郡縣發兵以為先辦徐州刺史巴祇表功第一當受遷賞昱深以為恥委官還家徐州牧陶謙初辟別駕從事辭疾遜遁謙重令揚州從事會稽吳範宣旨昱守意不移欲威以刑罰然後乃起三國志陶謙傳注引謝承漢書關東兵起東海王朗為謙治中與昱等說謙曰春秋之義求諸侯莫如勤王今天子越在西京宜遣使奉承王命謙乃遣昱奉章至長安天子嘉其意拜謙安東將軍以昱為廣陵太守王朗傳是時徐州百姓殷盛穀米豐贍流民多歸之而謙背道任情昱以忠直見疎由是徐州漸亂後賊笮融從淮見討迸入郡界昱將兵拒戰敗績見害陶謙傳引謝承書

蔡裔字元子兗州刺史殷浩北伐使裔率眾出彭城卒於軍

晉書

蔡裔傳

謝靈運義熙末以黃門侍郎奉使慰勞劉裕於彭城

晉書本傳

褚裒字季野河南陽翟人穆帝初拜征北大將軍遣將伐沛獲偽相支重降二千餘人石虎死裒表請大舉拜征討大都督督青揚徐兗豫五州軍事率眾三萬進次彭城河朔士庶歸降日眾裒皆撫納甚得其歡心晉書本傳

謝元字幼度陳郡陽夏人太元初授兗州刺史監江北諸軍事三年救戴逵於彭城敗秦師加領徐州刺史八年授都督徐兗青諸州軍事大敗苻堅於淝水九年詔元經畧舊都率眾次彭城堰呂梁水以利漕運公私利便晉書本傳

宦績附錄

司台徐州府志卷第二十一

下



田泓不知何許人爲兗州刺史謝元部曲將元帥衆萬餘救彭城軍於泗口欲遣間使報戴遂而不可得泓請沒水潛行趣彭城元遣之爲秦人所得厚賂之使云南軍已敗泓僞許之旣而告城中曰南軍垂至勉之秦人殺之

晉書謝元傳

劉義欣封長沙王元嘉初南兗州刺史七年到彥之率大衆伐魏義欣進次彭城爲衆軍聲援彥之敗退青齊騷擾將佐慮寇大至勸義欣委鎮還都義欣堅志不動遷豫州刺史

宋書劉道憐傳

王歆之元嘉三年以撫軍參軍使徐州周行郡邑觀察吏治訪求民隱

宋書裴松之傳

周山圖字季寂義興義鄉人泰始初爲殿中將軍張永征薛安都於彭城山圖領二千人迎運至武原爲虜騎所追合戰多所

殺傷虜圍轉急山圖據城自固然後更結陳死戰突圍出虜披靡不能禁衆稱其勇呼爲武原將及永軍大敗山圖收散卒得千餘人守下邳城還除直閭將軍

南齊書本傳

張惠紹號令嚴明所至獨克軍于下邳下邳人多欲降者惠紹曰我若得城諸卿皆是國人若不能克徒使諸卿失鄉里非朝廷弔民之意也今且安堵復業勿妄自辛苦

通鑑

韋元恢京兆杜陵人孝昌初值刺史元法僧據州外叛元恢招聚同志潛規克復事泄爲法僧所害時人傷悼之

魏書韋合宗傳

鹿念字永吉濟陰人官殿中侍御史監臨淮王彧軍時蕭綜據徐州密信通款衆疑之念遂請行曰若綜有誠心與之盟約如其詐也豈惜一人命也時徐州始陷邊方騷擾部將成景儁胡



龍牙並總強兵內外嚴固念單馬間出徑趨彭城與景儁龍牙  
反覆辯難衆莫能屈未旬縶果降莊帝時東徐州城民呂文欣  
殺刺史元大賓南引賊衆屯柵曲術詔念與行臺樊子鵠討破  
之尋詔爲使持節東南道三徐行臺魏書本傳

賈顯智持節征南將軍假衛將軍與行臺樊子鵠討呂文欣於  
東徐州平之加散騎常侍及爾朱仲遠爲徐州刺史顯智隸仲  
遠赴彭城仲遠舉兵向洛顯智不從擁部下出清水東招勒州  
民與相拒擊莊帝聞而善之除右光祿大夫武衛將軍鎮徐州

魏書賈顯智傳

劉渴侯不知何許人性剛烈太和中爲徐州後軍以力死戰衆  
寡不敵遂被禽嗔目大罵終不降屈爲賊所殺高祖贈立忠將

軍平州刺史上庸侯賜絹千匹穀千斛有嚴季者亦爲軍校尉  
與渴同殿勢窮被執終不降屈後得逃還除立節將軍賜爵五  
等男魏書節義本傳

李璨字世顯身長八尺五寸衣冠魁偉受學於梁祚天安初劉  
彧徐州刺史薛安都舉彭城降詔鎮南大將軍博陵公尉元鎮  
東將軍陽城公孔伯恭等率衆迎之顯祖復以璨參二府軍事  
軍達九里山安都率文武出迎元不加禮接安都還城使遂不  
至時劉彧將張永沈攸之等率衆先屯下碭元令璨與中書郎  
高閭入彭城說安都安都卽與俱載赴軍元等入城收管鑰其  
夜永攻南門不剋退還時永輜重在武原璨勸元乘永之失據  
攻永米船大破之斬首數千級時大雪寒永軍凍死者萬計於  
宦績附錄



是遂定淮北加璨甯朔將軍與張謏對爲兗州刺史綏安初附以參定徐州之功賜爵始豐侯加建武將軍魏書李靈傳

元法僧將謀爲逆張文伯領主書兼舍人奉使徐州法僧謂文伯我欲與卿去危就安能從我否文伯曰安能棄孝義而從叛

逆也法僧將殺之文伯罵曰僕甯死見文陵松柏不能生作背國之虜法僧殺之北史陽平王熙傳

崔亮字敬儒清河東武城人徐州刺史元昫撫御失和詔遣亮馳驛安撫亮至劾昫處以大辟勞賚綏慰百姓帖然北史本傳

周羅暉字公布九江尋陽人陳宣帝時爲句容令從大都督吳明徹與齊師戰於江陽爲流矢中其左目齊師圍明徹於宿預諸軍相顧莫有鬪心羅暉躍馬突進莫不披靡太僕卿蕭摩訶

因而副之斬獲不可勝計進師徐州與周將梁士彥戰於彭城摩訶臨陳墮馬羅暉進救拔摩訶於重圍之內勇冠三軍明徹旣敗羅暉全衆而歸拜鍾離太守隋書本傳

李廓字建侯揚州江都人徐州張建封卒兵亂囚監軍迫建封子愔主軍務德宗以廓剛敢拜宣慰使持節直入其軍大會士衆喻以禍福出監軍獄中脫桎梏使復位衆不敢動愔卽上表謝罪稱兵馬留後廓曰非詔命安得輒稱之削去乃受旣還稱旨遷吏部郎中唐書本傳

張奉國定徐州平李錡有功遷金吾將軍唐書白居易傳

曲環陝州安邑人李納逼徐州環與劉元佐救之敗其衆功最

唐書本傳

宦績附錄

司台徐州府志卷二十一

下



董裔爲武甯軍節度劉贊判官漢臣迎贊指揮使張令超率步  
兵宿衛行至宋州而郭崇威以騎兵至裔說贊急諭令超使以  
兵劫崇威募士卒北走贊不能用是夕崇威盡奪贊部下兵裔  
遇害

十國春秋湘陰公傳

郭忠恕乾祐中爲徐州推官周主命宰相馮道迎湘陰公贊將  
立之忠恕從行至宋州知事變乃正色責道曰令公累朝大臣  
誠信著於天下四方談士無賢不肖皆以爲長者今一旦返作  
脫空漢前功業並棄令公之心安乎道無言對忠恕因勸湘陰  
公殺道以奔河東公猶豫未決遂及禍忠恕竄迹久之

五代史補

解元字善長保安軍德清砦人建炎三年隸韓世忠麾下擢偏  
將出下邳聞金兵大至士皆駭愕元領廿騎擒其生口知賊動

息俄逢數百騎身自陷陣橫刺酋長墜馬餘皆遁去六年從世  
忠出下邳以數百騎破敵伏兵十年畧地淮陽至劉合莊騎纔  
三百當敵數千

宋史本傳

元鄭德温河間人從攻徐州冒及陷陣而死

宏簡錄鄭義傳

楊傑只哥寶坻人太宗元年師次徐州阻河不得濟傑只哥偵  
知有賊操舟伏草澤中夜率勁旅憑河擊之奪其舟衆畢渡獲  
河南諸郡降人三萬餘戶

宏簡錄本傳

元明善元仁宗時奉旨出賑山東河南饑時彭城下邳諸州連  
數十驛民饑馬斃而官無文書賑貸明善以鈔萬二千錠分給  
之曰擅命獲罪所不辭也

元史本傳

陳祐至元初南京路治中適東方大蝗徐邳尤甚責捕急祐部



民丁萬人至其地謂左右曰捕蝗慮其傷稼也今蝗雖盛而穀已熟不如早令刈之庶民力省而有益或以事涉專擅不可祐曰救民獲罪亦所甘心卽諭之使散去兩州之民皆賴焉元史本傳遂魯曾至正時遷淮南宣慰使領軍事募丁五千人克復徐州

宏簡錄

李稷從丞相脫脫平徐州

宏簡錄本傳

也速蒙古人至正十二年河南賊芝麻李據徐州也速從太師脫脫南征徐州城堅不可猝拔脫脫用也速計以巨石爲砲晝夜攻之不息賊困莫能支也速又攻破其南關外城賊遂遁走以功除同知中政院事元史本傳

嚴實泰安長清人時兵由武關出襄鄧實在徐邳間以爲河南

破屠戮必多乃載金繒往贖之且約束諸將毋敢妄有殺掠元史

嚴實傳

嚴忠嗣從大帥按脫救蕪縣復徐州元史嚴實附傳

丁鎡南陵人永樂中戶部主事出使徐州以便宜發倉賑饑全

活萬計統志

張達泰和人正統末工部主事督漕運呂梁適歲饑徐淮民相

食達遽發倉賑之然後以聞活民甚衆江西通志

李香字汝蘭分宜人正德辛未進士初授工部主事抽分徐州

值歲荒捐俸賑窮瘞死徐人德之轉刑部至四川巡撫致仕江

西通志

國朝伊興額字松坪吉林人咸豐間捻逆大起以副都統幫辦

宦績附錄



同治徐州府志卷二十一

五



軍事忠勇善戰爲徐郡保障逆徒常私誓曰立心不忠逢伊公  
遭命不造遇伊老其畏服如此旣戰不利度不支奮曰吾不死  
無以見滕公遂自刎滕公謂家勝也又有吉林開國久以參領  
從軍戰死徐州州同銜平陽屯屯官唐守忠衛千總唐振海皆  
山東鉅野人率練勇擊沛團捻賊被執不屈死游擊陳書廷奉  
檄剿匪酋高龜歿於邳守備王元基剿山東游匪歿於豐皆贈  
卹有差

代理徐州府學教授丁鎮瀛校



70003226



